

**SEVENTH LEGISLATIVE ASSEMBLY OF MIZORAM
(TWELFTH SESSION)**

LIST OF BUSINESS

FOR SECOND SITTING ON WEDNESDAY, THE 15th MARCH, 2017
(Time 10:30 A.M. to 1:00 P.M. and 2:00 P.M. to 4:00 P.M.)

OBITUARY

1. **Pu LAL THANHAWLA**, Hon[']ble Chief Minister to make obituary references on the demise of the following dignitaries :

- 1) **Pu ZOSIAMA PACHUAU**, Former Minister of Mizoram.
- 2) **Pu C. LALRUATA**, Former Member of Legislative Assembly.
- 3) **Smt. JAYALALITHA JAYARAM**, Chief Minister of Tamil Nadu.

QUESTIONS

2. **Questions** entered in separate list to be asked and oral answers given.

LAYING OF PAPER

3. **Pu R. VANLALVENA**, Chairman to lay on the Table of the House a copy of Statement of Actions taken by the Government against Subject Committee-III further recommendations contained in the Sixth Report, 2016 relating to Computerised Hospital Management Information System and Tertiary Cancer Care Centre under Health & Family Welfare Department.

PRESENTATION OF REPORT

4. **Pu JOHN SIAMKUNGA** to present to the House the Third Report of Committee on Local Fund Accounts on Action taken by the Government on the Recommendations contained in the First Report of Committee on Local Fund Accounts on Annual Technical Inspection Report on Urban Local Body and Rural Local Bodies for the year 2013-2014 relating to Local Administration Department.

DISCUSSION ON MOTION OF THANKS

5. Discussion on Motion of Thanks on the Address of the Governor (to be concluded).

NGURTHANZUALA
Secretary

....

SPEAKER : Rorelnaah thlei bik in nei tur a ni lo; mi te leh mi lian inang rengin in ngaihthlaksak tur a ni; tu mah in hlau tur a ni lo; rorelna chu Pathian ta a ni si a : in tana

thu khirh lutuk chu ka hnenah in rawn thlen thin ang a ; tin, chu chu ka lo ngaithla thin ang,' Lalpa'n a ti.

Deuteronomy 1 : 17

Vawiinah hian, nimina kan puan tawh member zahawm tak leh kan Deputy Speaker, Pu J.H. Rothuama, Pu R. Lalrinawma bakah kan Parliamentary Secretary zahawm tak Pu Z.S. Zuala hi official pawimawh avangin House chhuahsan a rawn dil a, kan phalsak a ni.

Vawiinah House hian sun tur mi pathum lai kan nei a, chu mi hun chu kan lo hmang ang a, tunah hian kan House Leader zahawm tak Chief Minister, Pu Lal Thanhawla'n Pu Zosiana Pachuau, Pu C. Lalruata, Pi Shrimati Jayalalitha Jayaram te chanchin tlangpui han sawi sela.

Pu LAL THANHAWLA, CHIEF MINISTER : Pu Speaker, vawiinah he House zahawmtak ah hian kan member pawimawh tak lo ni thin, Minister te hial lo ni tawh te sunna hun Obituary Reference kan hmang dawn a. A pawu ka tiin, a vanduaithlak hle a ni.

A hmasa berin, Pu Zosiana Pachuau hi he House ah member zahawm tak lo ni tawh in, Minister te ni in keini te pawh in kan thawhpui tawh thin a ni a, pa fel tak a ni. Pa rinawmtak a ni a, pa kawmnuam tak a ni bawk a. January ni 24, 2017 zing dar 7:15 AM khan lunglam thatlohna avangin New Life Hospital-ah a boral a, kum 72 mi a ni. Chhungkaw hlun tak, Mizo chhungkua ah chuan chhungkaw changkang tak atanga lo chhuak a ni a. August ni 15, 1944-ah Tualcheng khua ah a lo piang a, Pu Hauchhawna leh Pi Lalhnehi te fa 9 zinga a upa ber dawttu a ni a. An unau hi mipa 5 leh hmeichhia 4 an ni. Pi Lalhmingliani Kolasib nen June ni 26, 1974-ah an innei a, fanu 4 leh fapa 2 an nei a, tu 11 a nei bawk a ni. Zirna lamah chuan 1963-ah Sialmat Kristian High School, Churachanpur atangin High School a pass a, 1967-ah D.M. College, Imphal atangin B.A. a zova, 1972-ah Guwahati University atangin M.A. zo leh in 1975-ah B.Ed. Delhi University atangin a zo leh bawk a ni. 1969-ah Vairengte High School a din a, Headmaster hmasa ber a ni nghe nghe a ni. 1977-ah Mizoram Board of School Education (MBSE) ah lut in Assistant Academic Officer hna a chelh a. Senior Academic Officer-ah kaisangin, ni 23 March, 1984 thleng a thawk a. 1984-ah People's Conference (PC) Party a zawm a, he mi kum vek hian Mizoram Assembly Election-ah PC Party ticket-in Ngopa

Constituency-ah thlan tlin a ni. Ngopa Constituency-ah hian tum 3 a zawnin (1984, 1987, 1989) ah thlan tlin a ni a, 1993 inthlanpuiah Kolasib bial atangin thlan tlin leh a ni a, Cabinet Minister niin Higher & Technical Education; Soil & Water Conservation Department; Environment & Forest Department te a enkawl a ni.

Pu Zosiama Pachuau hi mi tumruh tak, thudik ni a a hriat chu huaisen taka tan thin a ni a, tin a tul chuan huaisen taka tlawm ngam a ni. MLA a nih lai pawhin House chhung boruak a ti nuam hle thin a. Ka la hriat reng chu, tum khat chu kan Speaker in a provoke deuh a ni ang, a lo kal chhuak a, a thutna atangin hemi kan piah ah khan Speaker kha a tlu nuai mai a, House chhung kan nui deuh dar dar a ni. Chutiang chuan fiamthu pawh thawh thiam tak a ni.

Heng Committee-ah te hian member alo ni tawh thin a, chungte chu: -
Committee of Privillages, Committee on Government Assurances, Rules Committee, Public Accounts Committee (chairman term 2), 1989-1993 thleng in. Tin, PAC Chairman anih lai hian a thawh tha hle a. A report te pawh a ngaihnam thei hle a. Tin, Sorkar tana tangkai tur thil tam tak recommendation ah leh report ah te hian an telh thin a ni.

Amah hi pa hrisel tak leh hnathawh tur zawng reng mi a ni a, mi taima a ni a. Amaherawhchu, ni 20, December 2016 atang khan khum bet in a na a, Ni 28 December, 2016 khan New Life Hospital-ah dahluh a ni a. Investigation hrang hrang tih nghal a ni a, a khawsik in a thlah theih loh avangin January Ni 16, 2017 ah phailam panpui turin engkim tihfel a ni a. Ni 14 January 2017-ah a nat zual thut avangin khawl (ventilator) hmangin thawk tir a ni a. ICU-ah dah luh a nih hnu hian a lung hi hun rei tak a lo thalo (Chronic heart attack) tih hriat chhuah a ni a. A khawsik hian a lungna a ti zual a, duat taka doctor te leh a nupui fanau te leh a tu leh fate'n an enkawl chungin, January ni 24, 2017 khan chatuan ram min lo pan san ta a ni.

Kan hriat theuh angin mi tumruh tak a ni a, pa kawm-nuam tak a ni a, a hun ah chuan thinchhe thei mahse pa zaidam, chutiang mi chu a ni a. Kan sorkar ah te pawh kan thawh ho avangin a hrechiang pawl tak ka ni ve in ka in hria a, pa kawm nuam tak fiamthu duhtak a ni. Chutiang mi he House ah pawh hruaitu lo ni tawh, member zahawm tak lo ni tawh, minister te lo ni tawh, thahnem ngai taka ram leh hnam tana lo thawk thin kan chan ta hi channa rapthlak tak a ni a, a kalsan a chhungkhat laina, atu leh

fate Pathian in awmpui in thlamuan se, tih hi kan tawngtaina a ni e. Pu C. Lalruata Ex-MLA hi, January ni 6, 2017 dar 1:15 p.m. khan pumna avangin Greenwood Hospital ah kum 72 mi niin a boral a ni.

Pu C. Lalruata hi Pu C. Lalthanga leh Pi Lalkaii te fa hrin 8 zinga upa ber a ni a, January ni 5 1945-ah Kelkang khuaah a lo piang a October 21, 1966-ah Pi Tlangthawmi nen an innei a, fanu pakhat leh fapa pakhat a nei a, tupa pahnih a nei bawk a ni.

Zirna lamah chuan 1966-ah Middle Scholarship exam-ah Mizoramah pathumna a ni a, merit scholarship a dawng nghe nghe bawk a ni. High School chu Gandhi Memorial High School, Champhaiah a kal a, B.A. chu sorkar hnathawk pahin Pachhunga Memorial College atangin a pass chhuak a. Zirlai a nih chhung hian zirlai movement hrang hrangah a inhmang nasa hle thin a ni.

Pu C. Lalruata hian a hun hmasa lamah zirtirtu hnate a thawk a, 1966 September atanga 1970 thleng Mizo District Council hnuaiah Lower Division Assistant (LDA) hna a thawk bawk a ni.

1970 atangin politics a khel tan a, Mizo Union Party a zawm a. 4th February 1974-ah Mizo Union Party a sorkar chawpa Congress-a a inchhun luh (merger) khan MPCC-ah Secretary hmasa ber a ni nghal a. 1972-ah Lungpho Constituency atangin First Member of Legislative Assembly, Mizoram UT atan kum 27 mi chauh a nihin thlan tlin a ni a, a naupang pawl tak a ni ang he House-ah chuan.

Pu C. Lalruata hi politics-a a luh hma pawhin khawtlang hmasawna atana theih tawp chhuah mi a ni a. Kohhran lamah pawh Senior Department-a lut lovin naupang Sunday Sikul zirtirtuah a tang nghal a. 1970 atang khan Ramhlun Kohhran puitling zirtirtu niin Mizo Sunday School Union chawimawina (Deploma Award, kum 25 chhung bahlah lova Sunday Sikul zirtirtu tangte an pek) a dawng a. Kumin hi Sunday Sikul zirtirtu a nih kum 47 na a ni.

Pu C. Lalruata hi pa hrisel tak a ni thin a, amaherawhchu, 1st January, 2017 khan pumna avangin Green Wood Hospital-ah dah luh a ni a. 4th January-ah dam deuh zawka a chhuak chu a tuk maiah a pumna a chhuak leh a, zana Hospital-ah lut lehin zing dar 9 velah thawk a harsat thu a sawi a. Oxygen

te pek a ni a, Doctor leh Nurse ten theih tawp an chhuah chungin 6th January, 2017 dar 1:15 p.m. khan chatuan ram min lo pan san ta a ni.

Tin, Pu C. Lalruata hi Congress party-a Union Sorkar kan rawn merger hma pawhin ka lo hre tawh thin a. Champhaia tum hnih thlan tlin ka nih tum pawhin khilaaiah party hrang nimah ila kan inhre tawh a. Tin, merger hnuah pheih chuan ka han din tumin khilam pang chhuak an nih avangin tangkai tak a ni a. Kan hotute min din tirnaah ani pawhin theihpatawp min chhuah pui thin a ni.

Tin, kan party hian kan chhawr hle a, a puipa ber hi a ni deuh reng a, kan merger hnu atang pheih chuan, committee nikhua reng rengin kan thurelte hi tumahin kan brief ngai miah lovin Press Release te leh a minute te hi tha deuh deuh a rawn chhuah thin a. Chuvangin, Pu Ruata hi a awm ve phawt chuan a awm vena apiangah party hminga thu chhuah tur kan neih apiang hi ama kutah hian kan dah chawt thin a, tha takin a rawn chhuah thin a ni. Tin, General Assembly kan neih apiangin ani hi kan Resolution draft-tu a ni a, chutiang draft-naah chuan Pu Ruata hi a tel phawt chuan kan hotu lian te pawh hian ennawn emaw han chhiar pui ve emaw tulah an ruat lo va. Chutiang khawpa kan hotute pawhina an rin, kan party tana mi tangkai a ni.

Tin, pa duhamlo tak a ni a, a mamawh te leh thil tul dang dangte pawh hi kan sorkar pawhin kan hotute hnenah a thlen ve mang lova, a tul anga tuar thin, a tul a nih chuan min la ngaihtuah ang chu tia tlawmngai taka nghak thei chi a ni a. Tin, hamthatna awm ang te pawh midangte tana kian thin a ni.

Tin, Pu Zosiama Pachuau nen pawh hian an mizia leh an tlawmngaih dante a inang hle a. An pahnih hian mi pamham lo tak, a tul anga mite tana kian thei, a mamawh zawkte ngaihtuah thin an ni. Hetiang mi Pu C. Lalruata kan lo chan ta hi an chhungte tan chauh ni lovin ram tan leh kan party tan pawh channa rapthlak tak a ni a. A kalsan a nupui fanaute, chhungkhat lainate Lalpan awmpuiin, thlamuanin an vanduaana an ngaih hi malsawmnaa chan tir turin kan tawngtaia duhsakna kan hlan a ni.

A pathumna chu India rama mi hriatlar tak Pi Jayalalitha Jayaram Tamil Nadu Chief Minister hi December 5, 2016 zan dar 11:30 a lung lam thatlohna avanga Appollo Hospital, Chennai a kum 68 mi nia boral ta kha a ni a.

February 24, 1948 ah Mulukote, Pandava Pura Taluka, Mandhya District, Karnataka-ah Pu Jayaram leh Pi Veda Valli te inkarah Pi Jayalalitha hi a lo piang a, pianpui unau mipa pakhat a nei, a unaupa hian 1990 khan a boral sawn tawh a ni.

Pi Jayalalitha hi kum hnih mi chauh a nih lain a pain a boral san a, naupangte anih lain film lam a luh chilh a, a hlawhtling chho hle a, politics a luhchilh hma hian film 140 chuangah a chang hman a ni. Tamil Cinema-ah chuan 'The First Female Super Star' tih a ni hial a ni.

Pi Jayalalitha hi lehkha thiam thei tak niin, Matric-ah pawh an state pumah pakhatna a ni hial a ni. Tawng chi hrang hrang English, Tamil, Kannada, Telgu, Hindi leh Malayalam te hi a thiam nal hle a ni.

Ni 18th June, 1982-ah AIADMK a zawm a, DMK Rama Chandran hruaiin a awm thin a, mahse an phir a. Rama Chandran-a hruai tak zawk All India AIADMK tih zawk hi a zawm a ni. 1983 ah AIADMK party propaganda Secretary-ah thlan tlin a ni a, Turu Chandur Constituency bye-electionah candidate-a thlan a ni. 1984-ah Rajya Sabha Member ah thlan tlin a ni a, 1989 thleng khan he seat hi a luah a ni. 1989 vek hian Tamil Nadu Legislative Assembly-ah thlan tlin a ni leh a ni. 28th January, 1983-ah bye-election-ah party candidate-a thlan a ni leh a. He state-a hmeichhe zinga Leader of Opposition hmasa ber a ni nghe nghe a a ni.

1991 a Pu Rajiv Gandhi-a thih hnu lawk khan INC nen tang dunin hneh taka thlan tlin a ni leh a. Tamil Nadu hmeichhe Chief Minister pahnihna leh a naupang ber niin 24th June, 1991 atanga 12th May, 1996 thlengin Chief Minister nihna a chelh a ni.

Kum 2001 Tamil Nadu election-ah khan Pi Jayalalitha hian thubuui a neih avangin a contest thei lova, heti chung hian a party AIADMK chu hneh takin a chak a, Pi Jayalalitha hi 14th May, 2001-ah Chief Minister atan dah a ni ta tho a ni. (Non-Elected Member of the State Assembly). Mahse kan hre vek a thla ruk chhungin MLA nih a ngai a. Pi Jayalalitha hi 23rd May 2016 ah a tum rukna atan Chief Minister a lakluh, leh a ni a a lak luh ni hian mipuite tan a thil tha ni a a hriat Kawlphetha chhung tin hman atanga unit 100 nuai bo te nuai bo tih

awmzia hi a man pek loh tihna a ni), Puan tah khawl neitu te khawlpheha unit engemaw zat ngaihdamna tur leh hmeichhia pasal nei tur apiang rangkachak 8 gram pekna tur thu pek a chhuah nghal vek a ni.

Pi Jayalalitha hi Tamil Nadu state mipui ten an ngaina em em a, Amma tiin an ko thin a, a theihna zawng zawng hmanga ram tana a thawh laiin ni 22nd September.2016 khan Chennai ah Infection acute dehydration avangin admit a ni a, ni 75 chhung enkawl niin, ni 5th December, 2016 khan chatuan ram min lo pan san ta a ni. A vanglai tak tak chuan a thawhpui Minister te pawh hian an pathian biak emaw ni chu aw tihawm takin a kalna tur chhuatah an lo bawkphek thin a ni. Pi Jayalalitha hian mipuite harsatna sut kianna turin food canteen man tlawm zawkin a siam a, zirlai tam tak hnenah a thlawna computer a sem bakah a thlawm thovin populist scheme an tia, chumi hnuahia food mixers leh grinders tam tawk tak a sem bawk a ni. Tin, a hnung zuitute chuan ‘Amma Canteens’ chaw tlawm zawk zawrhna te ‘Amma Bottle water’ ‘Amma Salt’ Amma Pharmacies’ tih te in a hming an vuah hial a ni.

Chutiang khawpa mipuite tana hruaitu tha kan chan ta hi, Tamil Nadu mipuite chauh ni lovin rampum tan channa nasa tak a ni. Hmeichhe Chief Minister West Bengal-ah kan nei a, Tamil Nadu-ah kan nei bawk a ani hian min boral san tak avangin tunah chuan West Bengal Chief Minister chauh hi kan nei ta ni.

Pi Jayalalitha hi kei pawhin vawi engemaw zat ka hmu tawh a saptawng kan thiam lo nain a thiam hmel kan ti thin a a lam te a nalh a, Parliament a member anih lai pawhin an tawng ve tawh hi chuan kan ngaithla deuh thup thin a ni, chutiang mi chu a ni a. Tuna an awm loh hnu pawh hian party an buai hle a, Tamil Nadu state pumpui pawh an buai hle a. Chutiang chuan a tih hnuah pawh hian a ropuizia leh a pawimawhzia a lo la lang ta deuh deuh a ni. Chutiang ang mi chu India ram pumpui in, Tamil Nadu chauh ni lovin, a lo chan ta a ni.

Vawiinah, Pu Speaker, kan member pawimawh tak tak Pu Zosiama Pachuau leh Pu C. Lalruata leh Tamil Nadu Chief Minister lo ni thin, hruaitu ropui tak Pi Jayalalitha-te kan chan a. An hminga sunna neih a ngai ta hi pawh kan ti a, vanduaithlak kan ti a. A bikin kan member pahnih Pu Zosiama leh Pu Lalruata te, an

kalsan tak an chhungte Pathian nungin thlamuan se kan duh a. Heng an vanduaina, chhungkua a lo thleng hi malsawmnaa a chan theihna turin Pathianin a kaihhruai kan dilsak a. Tin, Pi Jayalalitha pawh a kalsan Tamil Nadu state, vawiin thlenga buaina awm neuh neuhte pawh a ropuizia tilangtu a ni a. Amah avang hian an la kal tluan leh an beisei a ni. Mi ropui tak pathum, a bikin India rama hmeichhe Chief Minister ropui tak leh he kan House-ah ngei pawh member pawimawh tak tak lo ni tawh pahnih, Pu Zosiana leh Pu Lalruata te, vawiinah sun an ngai ta hi paw ka ti takzet a. An kalsan an chhungte thlamuan turin Pathian hnenah kan tawngtai a ni. Ka lawm e.

K.SANGTHUAMA : Pu Speaker, ka lawm e, Pi Jayalalitha, Tamil mipui tana a ngaihsan awm em em avangin leh nu ang maia an en, tin, Tamil mirethei leh mipui zawng zawng in a an pawm theih ram hmangaihtu nia an ngaihtlat leh mimal tin in a min hmangaih ta bik a maw ni tih hial khawpa Jayalalitha hi Tamil mipuiten an ngaihsan rawn a ni a. Amah pawh hi mi a hip thei hial emaw tih khawpin a thusawi te leh mi zinga a awm te hian min amah ah hian mit an lenin beng an chhi thin a. Tamil Nadu mipui mai pawh nilovin India ram chhunga mi chhuanawma an ngaih a ni a, hmeichhia a ni na na vangin mipa pawhin kan tluk loh hruaitu ropui niin India ram pawh hian an ngaisang em em a ni.

Tin, kan House Leader -in a sawi tawh angin film chanah hian a hlawhtling em em a, India ram film star ah hian a hlawhtling pawl tak a ni a. A la nulat lai kha kan hre pha ve a, a hmel kha a tha em em mai a India ram pawhin a ngaisang a, a film chan te kha an en duh em em a ni. Tamil Nadu State chauh nilovin India ram pumpuiah hian nula hmeltha leh mi mit la em em tu a chana film pawh an en chak em em mi ngaihsan a ni a. Hetiang ang mi bik hi Pathian hian ram khatah a siam teuh lem lova, ama'rawhchu, Pi Jayalalitha erawh chu India ramah hian mi bik zinga chhiar loh rual nilovin kei chuan ka hira a. Chutiang mi sunna neih a lo ngai ta mai hi an state chang ni lovin India ram pumpui hian kan sun nasa em em in ka hria a ni. A chhungte Lalpan a awmpui a, a hruai zel theihna turin kan tawngtaipui pawh an ngai hle in kan hria a ni.

Tin, Pu C.Lalruata hi han sawi leh ta ila, Mizoram a lo buai khan thingtlang lam chu a buaithlak em em mai a, keini pawh kan khua Sihfa atangin kan chhuk thla a, tin, Pu Ruata te pawh hi, an khua Kelkang atanga lo chhuk thla, Mizo Union pa thin kha kan ni a. Tichuan, Aizawlah kan hotute Pu Ch.Chhunga kan President hnung zuiin Pu Ruata te nen hian rawng kan bawl ve ta a; Mizo Union-ah, a ni hi General Secretary ah te, Secretary ah te a awm a. Chutih hunlai chuan kei hi Mizo Union Thalai Treasurer ka ni a. Chutiang chuan kan hotute hnungzuiin engemaw chen kan thawk ho a. 1970 khan Ramhlun Vengah sawn Middle School kan va hawng dun a. Chutihlaia Middle School a kan thawh dun lai chuan, nichina kan House Leader zahawm takin a sawi tawh angin kum 27 chauh mi niin kan hotuten ticket an rawn pe a. MLA-ah in candidate in tuna Er.Lalrinawma bial Tuikum kan tih takah khian vanneithlak takin an thlang tling a. Amah pawh hi naupang te nimahsela House-ah te leh rorel chungchangah hian a chhuanawm em em a. Mizo Union pawh khan kan chhuang em em a, amah hi mifel tak a ni bawh a. A thiltihah hlawhtlin tum tlat mi a ni a. Chuvangin Mizo Union a nih lai pawh khan kan chhuang em em a ni.

Tichuan hun a lokal zel a, 1974-a Congress-a kan merger tak khan loh theih lohna in Mizoram buaina chungchang leh Mizoram development a kal that zawk theihna atan tiin Pi Indira Gandhi, Prime Minister khan Mizo Union Ministry kha ‘merger mai ula a tha ang e’, a ti a. Tichuan kan ngaihtuah ta a, merger duh leh duh lo kha kan in hnial luh luh chung khan Congress a merger mai kha tha a kan hriat avangin kan hotuten min merger pui ta a. Tichun Congress-ah khan engemaw chen kan han in hrawn chho leh a. Tuna kan House Leader Pu Hawla hi kum rei tak, kei phei chuan kum 12 zet ka zui hman a ni. Pu Ruata phei chuan kei aiin a zui rei a, vawiin thlengin Congress-ah pawimawhna tak nei zelin leh Congress tan mi tangkai tak niin a boral ni thlengin Congress mi pawimawh tak niin General Secretary a la ni a ni.

Pu Ruata hi a chanchin sawi tur a tam mai a, amaherawhchu thui tak kan sawi lovang a. Pu Ruata hi Central YMA-ah pawh hian 1971 leh 73 khan General Secretary a ni a. Tin, chumai ni lovin YMA-ah hian Branch-ah kum 13 President in a awm a. Tin, Joint YMA-ah hian kum 2 President in a awm bawh a ni. Chutiang chuan YMA lamah pawh hnuhma nasa tak lo nei a ni a. YMA a kan thawh ve laiin ani hi chu Central YMA-ah a lut tawh a, Central YMA-ah kan thawhpui hman lo va. Naupang te

kum 25 a nih chauh hian Central YMA-ah pawh General Secretary a ni hman a ni. Chutiang chuan a kalna lamah mi hlawhtling tak a ni chho zel a ni.

Pu C.Lalruata hi mipuitling, mi rilru tha, mi itsikna nei lo, rilru thianghlim tak pu, mi tana hnawksak lo, mi tana zui nuam, mi duham lo, sum leh pai pawh dik lo taka ngaihtuahna hmang ngai lo. Corruption-ah pawh hian sawi sep kai lo zing ami niin ka hria a. Thusawi thiam tak, a sawi tum fiah fai taka sawi thiam, hotute kaihza ven pawh thiam tak, MLA a nih pawha kum 27 chauh nimahsela MLA chhuanawm ber zing ami a ni thei a ni. Pu Ruata hi saptawng (english) thiam tak a ni a, a sawi tum bahlah miah lo va sawi thei zing ami a ni. Ka rilruin MLA han tling leh se, Minister-ah te han awm sela kan ram tan pawh a tangkai dan tur hi ka sawi ka sawi ve thin a ni. Mahse tuna a dinhmun hi Pathian ruatah kan ngai mai aniang chu. Hetianga politician hlun leh fel, ram tan pawh a thahnemngai, theihtawp chhuah mi, Minister pawh nilova MLA chauh ni a, hun a hmang zo mai hi ka ui khawp mai. Congress pawh hian an tangkaipui khawp in kan hria a ni. Hetiang a mi tha leh ram tana chhuanawm kan chan ta mai hi kan ui em em a, kan theihngihl thei dawn lo a ni. Tin, a nupui fanaute, a tu leh fa zawng zawng te, chhung leh khat kan tawrhpu em em a, Lalpan a awmpui ang tih kan ring a ni.

Pu Zosiama chanchin hi chu han sawi ve hram lo ila, kan MLA Pu Thana hian a rawn sawi ve ang a. A zavaia sawi hi duh mah ila, kei chuan sawi zel lo mai ila a tha awm e.

S P E A K E R : Awle, Pu Thanliana tan khan a khek deuh a ni, amah ilo sawm ang.

Pu LALTHANLIANA : Pu Speaker, hun tha tak mai min pek avangin ka lawm e. Vawiin a kan sun tur Pu Zosiama Pachuau leh Pu C.Lalruata te hi ka bial a mi te ve ve a. A hmasain Pu Zosiama Pachuau chungchang hi han sawi hmasak ka duh a. A chanchin hi kan kum te a in rual lo deuh a tam tak ka hre lo va. Amaherawhchu ka hriat chhun, ka hriat ang ang te hi midangte hriat ve atan chhawpchhuah tlakah ka ngaih avangin sawi kan tum a ni.

Mizo politician zingah chuan Pu Zosiama Pachuau hi MLA te, Minister te a nih hnu, amah a la damlai reng pawha a tha zawnga a chanchin sawizui hlawh ber pawl niin ka hria a. A vui ni a kal te chuan a chanchin zia kha kan chhiar in ka ring a. Nichinah kan House Leader zahawm takin a sawi tawh bawk a. Kum 1944 August ni 15-ah a piang a, 1972-ah kum 28 mi niin MA Guwahati University atangin a pass thei a ni.

Khang hunlai khan rambuai te a ni a Mizo pa kum 28-a MA tluang taka pass thei kha chu zir tluan a ngai khawp in ka ring a, a chhuanawm ka ti khawp mai a. Chumai a ni lo va kum 40 anih in Sr.Academic Officer a ni hman a ni. He Officer hna hi bansan lovin thawkzui zel ta seng chuan a pension hma in nihna ropui tak, sang tak a nei hman in ka ring. Hetianga hma eng tha tak mai a nei chung hian, he hna tha tak mai hi bansan in politic lamah a luh san ta hian ram leh hnam tan a in pek zia te, ram a vei zia leh a hmangaih zia te hi a ti lang chiang em em in ka hria a. Politic a a luh dawn hian, he hna a bansan dawn hian MLA emaw, Minister te emaw a la ni ve dawn a ni tih hi a in hre chuangin ka ring lo va. Dinhmun tha, mitam tak hian chuan kan kalsan lem lo a ni. A ni erawh hi chuan a kalsan avang hian kan sawi uar duh deuh a. Mi tam takin dinhmun tha hi kan kalsan lem lovin ka hria. A ni erawh hi chuan khang pawh kha chan huamin ram leh hnam rawngbawl turin a pen chhuak a. He a in pekna hi ka ngaihtuah hian in a fakawm ka ti em em a ni.

Tin, mihring kum 40 chu, tunlai chhanah pheih chuan kan vanglai, kan taksa leh kan rilru a chak vanglai a ni a. Chu a vanglai hun tha tak mai chu ram rawngbawl nan a pe a ni. Ka hriatthiam dan chuan theirah ni ta se, a itawm leh a thlum tui hunlai tak tur kha ram rawngbawl nan a pe a ni. Ka mit in a hmuh ka theihngilh theih loh chu politics thila kan inkhawm naah thahnemngai takin thu a sawi a, lungchhia mittui tla khawpin a sawi thei a ni. Hetiang hi ka hmu tlem khawp mai a, hei hian ram a vei zia te, a thil tih a tih tak tak zia te hi a tilangin ka hria a ni.

Tin, a miziaa ropui ka tih leh awhawm ka tih em em mai chu mahni inrintawkna a nei tha em em mai hi a ni a. Tin, a huaisen bawk a, meeting leh titi nikhuaah te pawh hian in he a zia ropui tak mai hi hmuh leh hriat theih in a lo lang chhuak fo thin a ni. Tumah hi a ngaisang bik lem lo emaw tih mai tur a ni a, a chung en lova, huaisen takin ngam takin mahni inrintawkna nei chung in tupawh hi a dawr mai niin ka hria.

A chanchin hrechiang tuten a an sawi chu mi duham lo tak, a chan tura ruat loh chu it leh awhna nei miah lo, mi tumruh leh mahni mawhphurhna ngai pawimawh tak, hlen chhuak tur chuan mahni pawh inngaichang lo khawp a tumruh leh bei mai mi a ni tih kha a ni a.

Tin, a ngaihsan awm ka tih leh na em em mai chu a hawina lam apiang ah politics a ni emaw, zirna a ni emaw, sorkar hna a thawhna ah pawh, chhungkua a dinna ah pawh a hlawhtling viau vek mai hi a ni. Chumi a lanchianna em em mai chu a chanchin ah pawh khan kan hmu a, pawl ah a inhmang nasa em em a, ka hma ami member zahawm tak tak te khan an sawi tawh bawk a. Pawla a inhmanna zawng zawngah hian ti ila kan sawi sual tam lo ang a, member satliah mai a ni ngai lo reng reng a, office bearers kan tih zingah pawh a chung deuh hlek pawl hi a ni deuh zat zat vek a ni. Hei hian a nihna a pholang chiangin ka hria a. A chanchin han chhiar hian, Pu Zosiama Pachuau tunge a nih tih hi hai chi a nilo in ka hria a. Ka phulo a min fak thin tu, duhsak taka min fuih fo thin tu a nih avang hian ka ngaisang a, a chungah hian ka lawm em em bawk a ni.

Hetianga pa tha, mi hlu, ram leh hnam tan a mi inpe kan chan ta mai hi a uihawm ka ti em em mai a. Keini MPC party te pheichu kan hotupa hetia kan chan ta mai hi kan tuar in kan ui em em a ni.

Pu Zosiama Pachuau han awm ta lo mai hi ram leh hnam tan channa nasa takah ka ruat a ni. A kalsan tak a nupui, a tu a fate, amah hmangaih tute zawng zawng hi Pathian in awmpui se, tih tak meuhin ka tuarpui a, thlamuan se tih hi ka duhthusam leh, ka duhsakna a ni.

Tin, Pu C. Lalruata hi ka bial ami a nih mai bakah kum tam tak chhung veng khatah kan lo awm thin a, a chanchin ropui tak tak kan ngaithla a. Amaherawhchu, tawi te han sawi duh ka nei a, pakhatna-ah chuan thusawi thiam em em mai hi a ni a, a aw a tha a, commanding voice an tih ang chi hi a nei tha em em mai a ni. Thu hi a sawi thiam mai a ni lova, a sawi ngaihnaawm thiam a, a chiang bawk a, a thluak hi a tha tih a lang a, eng hun leh hmun ah pawh eng ang subject pawh hi sawi se awihawm takin, ngaihnaawm takin a sawi thei zel hi mi chhuanawm tak niin ka hria a. A hriatrengna pawh hi a tha a ni. Hetiang taka thusawi thiam leh aw tha hi tam tak kan piang lo niin ka hria. Fiamthuah min lo ngaihsak lo ula, lamtang atan ka mi it pawl tak a ni.

A dawt leh ah chuan hruaitu nihna thil pek tha tak mai leadership quality a nei hi a ropui ka ti a, chumi a lan chianna chu nichinah Pu Zosiama

Pachuaau ang bawk khan a thiltih tawhna reng reng ah, pawla a tel tawhna reng rengah hian hotu a ni vek tluk a ni. Chu chuan tunge a nih tih hi hai rual loh in a tarlang in ka hria a, a chanchin pawh kha kan chhiar a kan hre vek a ni.

Pu C. Lalruata hi dam chhung hun hmang tangkai leh hmang daih zai ber pawl a niin ka hria a. Amah a tha zawnga miten an hriatreng theihna tur hi a hnutchhiah hnem em em a ni. A chanchin atang khan mi satliah mai a nilo tih chu kan hre vek a. Hetia an kal ta mai hi a ni pawh hi ram leh hnam tan channa nasa takah ka ngai a. A kalsan tak a nupui, a tu a fate, amah hmangaihtu te zawng zawng hi thinlung takin ka tuarpui a, Pathian in awmpuiin thlamuan zel se tih hi ka duhsakna a ni e. Pu Speaker, ka lawm e.

SPEAKER : Pu Zoram Sangliana leh Pu Rinawma khan an phar a, in pahnih khan minute nga (5) in tawm teh u. Pu Zoram Sangliana.

Pu P.C. ZORAM SANGLIANA : Pu Speaker, vawiin niah kan hotu duhawm tak tak te sunna hunah hian han din ve ngei ngei ka'n duhna chhan a awm a. Kan house leader zahawm tak leh kan hotuten an chanchin politics lamah te, he House a an experience leh thildang tam tak an sawina piahlamah khan a bik taka han sawi belh duh ka'n neih te an awm ve a.

Pu Zosiana Pachuaau hi kuthnathawh ngaina em em mai leh mahni thawhchhuah a tui a nih na hi a chhuanawm ka ti a. An unau a BA an zawh tawh hnuah Vairengte ah zikhlum hmun an siam a, quintal 50 ngawt mai an tharchhuak a, mite tih hmuh tu an ni hi mite hriatrengna a ni a.

Tin, Vairengte-ah khuan mi pathum an awm an tih zinga pakhat, an sawi dan hi a hrechiang ten min hrilh a nih avangin Primary School pawh pass theih loh na, Middle School, High School-ah te result tha mumal awm ngai reng reng lo, helai hmuna an thawh atangin vawiin ah Vairengte khaw zahawm tak, khaw nuam tak lo nih tak na ah hian sulsutu pathum an awm a, chung zinga pakhat chu a ni tih an lo sawi thin a ni. Mizoram State a lo nih a, MLA te kan nih ve khan ama ho hian PAC ah te member kan han ni ve a. PAC kaltlang a hma a lak na, Chairman a nih laia a hnung kan zuina ah khan, Mizoram hmun hrang hrangte kan fang ho thin a, tampui kan tuar a, khatih hunlai khan bahra khurah nunau, an naupuak laite kawng a nihliap an lo zar hnan, a thlang lawk hmuhphak a bahralai laite ama ho a bahra kan han

laihpu lai te kha vawiin niah ka mitthlaah a lang lo thei lova, a thar lo thei lova, “hengte kan kalsan in le” a ti a. Kudam kan en zel a, a ruak nasa em em a, chungah te pawh chuan henga kan tih tur chu Sorkar ah kan thlen ang a, kudam ah hian mipuite eitur kan ngen dawn a ni a tih te, vawiin a lar ta em em Agriculture Link-road te ang te pawh hi vei tak takin a vei a ni. Kal peih dawn lova Officer ten an ngaihna hmun thlengin a member pui te nen hian hmun hrang hrangah Mizoram ah hian kan lo vak thin a. Vawiin ni a hlawhtlinna tam tak hemi kaltlang a lo awm ta te hi lawmawm ka ti a. Hengte hi Pu Zosiama, hun hnuhnung kan hmanna ah hian sawi tel ka duh a ni.

Tin, MLA a nih tawh loh hnu a miin a chanchin an sawi a an sawi tel ngei ngei, hriat nuam em em ka lo tih thin chu khawhar lusun fate hnen a thleng a ni an tih hi a ni. Chung hmunah chuan hmuh tur hi a awm deuh ngei ngei a. Heng te hi mi tam tak in kan tih theihloh fo a ni a, hetia sum leh pai lama va puih ni lo in, a hria a, a recognized a ni.

Vawikhat chu PAC 1987 kuma kan zin in, Lawngtlai-ah sawn thingpui dawr pakhatah min luhpu a, ‘Sanga, hei hi hre reng rawh aw, nidangah pawh, kan farnu te dawr a nih hi’ a ti a, chutianga chuan Lawngtlai hmunah pawh khan farnu te dawr tiin min kawhhmuh thei, chutianga chungkat laina leh thenrual hre mi a ni a.

Tin, politics ah pawh a thutna hmun azira in adjust thiam em em kha a ni a, vawiina kan Chief Minister zahawm tak bungalow leh office tlanga Assembly kan thut lai khan, Opposition lam tangin an rawn ti laih laih a, Minister zahawm tak a ni a. Opposition lam in an rawn chhah a, chuta a chhan na mawi em em mai chu, ‘ral leh lam atang khan a lo fiahlo em a ni’ a ti a. Opposition atanga fiahlo thin hi ruling atangin a lo fiah em em mai thin a ni. Sorkar dinhmun te Pu Zosiama tawngkam atang hian a chiang ta em em ani. Chutianga mi chu vawiin ah kan hnenah a awm ta lo a. Pu Speaker, i hnung lamah te leh sir lam atang te a vawiina a hlim-thla kan thlir te hi he House a kan thlir hnuhnung a ni ta mai a, an ngaihawm hle mai. A nupui a fanau, chhungte zawng zawng Pathian in awmpui se la tih kha kan sawi duh a.

Pu C. Lalruata chungchangah hian ka sawi duh chu, a thih ni hma chiah khan ka va tlawh a, tah chuan Happy Birthday kan in ti a, a tuk lawkah chuan ruang chungah pangpar ka dah leh ta mai a. Khatia a thih hma ni a Happy Birthday ka va tih ruala kan pahniha khum pindana kan titi dun te kha vawiin ah hian ka rilru ah a rawn thar

uai uai a ni. Kan ram kan hnam, natna khuma a awm mek lai pawh a vei zia te, tin, sawrkar kal dan tur angah te pawh thahnem a ngaih zia te, sawi tur tam tak kha a nei a, chung te chu kan han sawi dun a, chumi hnuah politics chungchangah a ni emaw Pathian thu lam ah pawh hian a titi pui hnuhnung berte zinga mi ni ve in ka in ring a ni. Amah hre chiang em em tu in a sawi pakhat, kohhran upa kum 51 ni tawh in a sawi hi a dik in ka ring a ni. Politics leh Kohhran thliar hrang thiam, khawtlang tan leh kohhran tana mi thahnemngai, a sermon pawh ngaihnaawm em em, fiah taka Pathian hmangaihna thu sawi thin a nih rualin, politics - ah pawh hian a thu sawi hi a fiah deuh thin a ni.

Kan ngaihthlak ang khan, kum 27 mi lek nia MLA a ni a. kan library ah hian kan sun mek Pu Zosiamah leh Pu Ruata te proceeding a an thu leh hla ka chhiar thin a. An ril zia leh thuthiam zia te, ngaihnaawm, tak tak te, chhiarnaawm a nuam thin a, chungte chu vawiiin niah kan hnenah an awm ta lo.

Ka hma chiah ah MIFCO Chairman lo niin, a hmun ah kan awm chho ve a, a kutchhuak, a sulhnu bawhzui tu nih hian ka tlin loh zia te hria in ka insit em em thin a ni. A bik takin Pu Zosiamah Pachuau leh Pu C.Lalruata te vawiiin niah kan hnenah an awm tawh lova, an hlim thla te kan thliar a, kan hotuten a ngaihnaawm taka an chanchin an sawi te ngaihthlak a nuama. Nakin ah erawh chuan hmun nuam zawk ah chatuan a tan kan la in hmu leh dawn tih rinna nghet tak neitu kan nih hi a vanneih thlak ka ti a, chung ang te chu kan sawi ve duh a ni e.

Pi Jayalalitha chungchang erawh chu ka sawi lo mai ang. Pathian in Pu Zosiamah Pachuau leh Pu C.Lalruata chhungte thlamuanin awmpui se tiin ka duhsakna kan sawi ve a ni e.

SPEAKER : Pu R.L Pianmawia, tawite in aw, hei hun a awm tawh lo.

Pu R.L.PIANMAWIA : Pu Speaker ka lawm e. Kan sun mek mi pawimawh tak tak pathum te zingah hian Pu Zosiamah Pachuau chungchang hi a bial ang pawh a au chhuah pui loh thei loh, sawi loh thei loh thil a awm a.

Pu Zosiamah hi thingtlang mi rethei te te te pawhin a kan chhawr phak, kan nel a nih zia tuna kan sawi tang hian in hre mai in ka ring a. Tunhma hunah Block President te ka han ni a, a ni minister a rawn nih khan ka bial Sunhluchhip te, Chhanchhuahna-khawpui te khi min rawn tlawh pui vek a ni. Chutiang ah chuan hmun hma pawimawh em em mai ka han sawi duh chu, Chhanchhuahna-khawpui kan tlawh

khian zirna sikul an la neilo a, amahin a min tlawhpui atang hian mamawh kan thlen a, tuna zirna kan neih takna bul hi Pu Zosiama Pachuau, Education Minister a nih chhunga min tih sak a ni a. Tin, Sunhluchhip kan tlawh hian Malaria natna avangin khawsik an lo tam em em a, tah chuan Health Minister ani bawk a, kan hawn in damdawi kan sawi dun a, damdawi Health Department ah ila ang a, enkawl dan ilo ngaihtuah anga ati a. Health Department ah Chloroquine mum, bawm hnih min ziahsak a, ka zu la a, chuan Sunhluchhip khua kha in tin kha nitin mumkhat ei turin kan ti tawp a, chumi atang chuan chumi kum ah chuan Malaria a thi pakhat mah an awm lo. Chuvang chuan, Health Department-in a damdawi a sem, FTD an tih hma daih khan khilai ah min lo tanpui tawh a, chuvangin damna min thlen saktu a ni tih kha kan sawi duh a. Chutiang khawpa harsatna tawh leh bial chengker ah pawh min rawn hmuhpui a, min rawn tihpui tu anih avang hian rilru ah a langsar em em a, ka ui tak meuh meuh a ni.

Tin, Forest Department a chan a min hrilh ka hriat reng chu, ‘Piana, ka thiltih that chu lo hre zel la, nakinah pawh a tangkai zia i hria ang a,’ a ti a. ‘Forest Department kan chang a, kan en a, RO leh DFO hian engkim hi an lo ti a, ACF a kar laka awm hi lal ve viau anga lang si hi engmah nilo hian an lo dah a, hei hi kan siamtha dawn a, hei hi ilo hre dawn nia’ ati a, Ani hun atang khan engamah a hman loha an dah thin ACF te kha pawimawh tak dinhmunah a dah chho va. Chuvangin he Department-a a thiltih min hrilh pawh hi a tak ram a thlen chho kha ropui ka ti a, ram tan thil chhinchhiah tlak tak ni pawhin ka hria a ni.

Chu mai bakah chuan, min ring tawkin min duhsak hle a ni tih a lanna chu, Education a chang a, Tuirini chhaklam pang zawng zawng ah chuan Education Department hi chu i kutah ka dah hmak a nia, min ti ngam a, a ropui hle in ka hria a. Tam tak tan chuan a nuihzathlak mai thei a, amaherawhchu, khilai Tuirini ral chhak lampanga Education mamawh hrang hrang tihna tur leh pawimawh tih tur ang chi reng reng ah chuan charge ka hlan tawp che ti a, tawngka ngei a min ti tu a ni a, chuvang chuan thil tul leh pawimawh ka sawi a piang kha khilai bial atana kan tih kha min lo tih hlawhtlinsak thin a. Chuvang chuan, kan bial tan khi chuan theihngilh theih rual a ni lo tih hi ka sawi duh a ni. Kan ui tak meuh meuh a, kan bial tana thil a tih that te avang hian vawinah hian, hmasawna kawngah te, rualpawlana kawngah te nasa takin hma kan sawn chho ani

tih ka sawi duh a. Vawinah chhungkua leh u leh nau te Pathian in thlamuanin awmpui zel se tih hi kan tawngtaina a ni e. Chung chu ka sawi theih tawk ni mai rawh se, ka lawm e.

SPEAKER : Awle, kan MLA chan tak pathumte sunna turin minute khat chhung kan ding dawn a, hemi chhung hian lusun chhungte tan kan rilru in itawngtai nghal ang u, i ding ang u. (One minute silence is observed) i thu tawh ang u. Hei hun kan hmang zo a, zawhna neitu te tan chuan Obituary reference a ni ve mai dawn a nih hi. Zawhna kan la hram ang a, zawhna no.1 neitu DR. K. Beichhua, MLA zahawm tak i sawm ang.

Dr.K.BEICHHUA : Pu Speaker, ka lawm e. Law & Judicial changtu Minister zahawm tak hnena ka zawhna chu: -

- a) Mizoram sorkar in High Court puitling sakna turin pawisa dawn a nei tawh em?
- b) Pawisa dawn nei ta ang se eng Ministry atanga dawn nge?
- c) Insak hna hi engtik atanga tan nge ni ang?

SPEAKER : Department neitu Judicial Department Minister Pu Lalsawta ilo sawm ang.

Pu LALSAWTA : Member zahawm tak Dr K.Beichhua zawhna Mizoram sorkar-in High Court puitling sakna turin pawisa dawn a nei tawh em tih chhanna chu, 'Aw nei tawh e, High Court sak nan hian first installment cheng 1471.9 lakhs chu nikum March thla khan hmuh a ni,' tih a ni a. Tin, a dawt leh zawhna, Pawisa dawn nita seng eng ministry atanga dawn nge ? tih chhanna chu hetiang hi a ni. Pawisa ni Ministry of Doner, Govt of India hnuiaia Non lapsable central pool of resources NLCPR atanga dawn a ni. tih a ni. Zawhna pathumna, insak hna hi engtik atanga tan nge ni ang? tih chhanna chu, reilo te ah sak tan tum a ni tih a ni a, reilo te tih kha tun atanga reilo te tak tak deuh a ni. Ka lawm e.

SPEAKER : Hun a awm tawh lo ve, tunah chuan Presentation of papers-ah kan kal ang a, Pu R.Vanlalvena, MLA zahawm takin Paper lay tur rawn lay sela a tha ang e.

Pu R.VANLALVENA : Pu Speaker, ka lawm e, tuna Paper kan lay tur hi Computerized Hospital Management Information System leh Tertiary Cancer Care centre chungchang a ni a. He House zahawm takah hian ni 22.3.2016 khan main paper kan present tawh a, chumi atanga department bawhzuina report lo lang chu a ni e. Pu Speaker, Statement of Action taken by the Government against Subject Committee III

further recommendations contained in the 6th Report, 2016 relating to Computerised Hospital Management Information System and Tertiary Cancer Care Centre chu he House zahawm takah hian ka lay e. Ka lawm e.

SPEAKER : A copy kha sem ni se. Aw le, tunah chuan Presentation of Report a ni ang a, Report pe turin Pu John Siamkunga, MLA zahawm tak i sawm ang.

Pu JOHN SIAMKUNGA: Pu Speaker, ka lawm e. Vawiina ka Report present tur hi Annual Technical Inspection Report on Urban Local Bodies and Rural Local Bodies, 2013 - 2014 tih a ni a. December 6.2016 khan a main report hi kan present tawh a. Khatah khan recommendation pali (4) department in a bawhzui tur kan siama. Chu chu an han bawhzui ta a, pali zingah khan pathum kan pawm a. Vawiina ka rawn present tur hi pathum kan pawm zing ami a ni a. Pakhat erawh chu department lam la inpeih theih loh avang leh an la bawhzui theih loh avangin recommendation pakhat chu la umzui leh tur a ni a. Heng kan report rawn present te hi Audit findings atang te a thil bawhzui ngai te kha an ni. Tichuan Pu Speaker, i phalna leh he House zahawm tak remtihna in 3rd Report on Action taken by the Government on the recommendations contained in the 1st report of Committee on Local Fund Accounts on Annual Technical Inspection Report and Urban Local Body and Rural Local Bodies for the year 2013 - 2014 relating to the Local Administration Department hi he House zahawm takah hian ka rawn present e. Ka lawm e.

SPEAKER : A copy kha sem ni se. Tunah chuan lawmthu sawina sawihona kan tan tawh ang a, ka han ruahman chhin danah chuan minute 10 zel pakhat tan hman ni sela ka ti a, House-in a remti thei mai em ? Aw, mi pakhat tan minute 10 ruat a ni a, tunah motion neitu Pu Robiaka i lo sawm ang.

Pu LALROBIAKA: Pu Speaker, motion sawiho theihna hun kan nei hi a lawmawm ka ti a, vawiinah hian thil tak tak leh thil hmuh theih sorkar hlawhtlinna tam tak Governor in a rawn sawi chhuah te sawiho tura a hmasa bera kan ding hi Pathian chungah leh kan hotute chungah leh i zahngaihna chungah lawmthu ka sawi a ni.

Sawi tur a tam khawp mai a, a move tu nih manah ka lo pel deuh a nih pawhin Pu Speaker, min ngaihthiam ka duh a. Ka sawi tak ang khan he sorkar hi Pathianin nasa takin mal a sawm a, chumi avang chuan hnathawh na hrang hrang ah hlawhtlin na kan hmu chho mek a ni. Tute tih dan tak ah emaw vung kan chhuah terh

turh a, Rail kawng te leh leihlawn tha tak tak te, kawng tha tak tak te hmuh theih in a awm tan a. Chutiang zingah chuan kan sawi hmasak duh chu, MLA ni chungin ka va lo hre lo em, hla in alo sawi ang deuh khan, ‘a then pawh kan hre thei lo he lui kam atang hian’ tih ang deuh kha niin ka hria a ni. Kan Minister te, a bik takin kan CM zahawm tak hruaina hnuaiyah hian nasa takin Zoram hian hma a sawn a ni tih hi dar rul khaia en duh lo hram hram dam ta lo ang chi ni lo kha chuan an hria in ka ring.

A hmasa bera kan sawi duh chu, vawiinah NLUP atang te, NEDP atang tein kawng tha zawk loneitu ten an lo neih theihna tur atan a engemaw zat he sorkar chak tak hian ruahman na nei a. Chutih rual chuan hun kal ta te kan thlir chuan Bamboo link road, sum tam tak bo na ram an sawi kha a ni ringawt mai a ni. Chutiang chu a nih rualin vawiin ah chuan Agriculture link road tha tak tak te, a fur a thal a an kal theihna tur atan leh nasa taka mipui in an chhawr theihna tur atan ngaihtuah na thui tak an nei a. A laih mai piah lam ah fur lai harvest period-a an kal theihna tur atan pawh ruahmanna kan sorkar hian a nei a ni. Chutiang kut hnathawk te hmangaih sorkar tha tak kan nei hi a lawmawm a ni tih hi ka sawi duh a, hemi atan hian nasa takin sum leh pai senso a ni a. Tin, kan bial tan pawh tam tak, kan duhtusam ni lo mahsela min pe a. Tin, NLUP link road atang te, abik takin Soil kaltlangin Chungtlang ramahte chuan in 84 tan rubber plantation kan siam a, chungte pawh chu a kalkawng Chungtlang khua atanga Tut lui thleng hian motor in a kal theih tawh a, khaw mipuite an lawm em em a ni.

Tin, kum danga an maipawl te, an mai te hlam tla mai mai leh phur chhuah ai chuan khatia dah mai kha awlsam zawk leh a senso ngaituah a hlawk si lo kha vawiin ah chuan Aizawl bazarah te an rawn zuarin an rawn hralh tawh a. Tin, anmahnin an rawn phur chhuah loh pawhin Aizawl atangin an rawn phur chhuak tawh a, chutiang chuan bial tam takah hian hlawhtlinna kan hmu mek a ni. Chutiangte chu a nih avangin a lawmawm khawpin ka hria.

Tin, Sericulture bikah hian hmasawna tam tak kan hmu chho zel a, silkworm te thar chhuah tam tak a lo awm ta a, a bik takin silk-ah hian kan ram hi potential tha tak mai ala ni dawnin a lang a. December 2016-ah khan NERTPS atangin project 1352.09 lakh lai kan hmu a. Tin, vawiin ah a hminga kan bial ve ngeiah South Sabual-ah te pawh muga chinna introduced chhoh a ni a, mipui te pawh an tui em em a. Tin, vawiinah China-te, India ram ngeiah pawh a hmangtu (silk) an tam zia te, a hralh

chhuahna lamah chuan harsatna awm dawn loh ziate kan chiangin ka ring a. Chuti chung chuan silk pangang hian climatic condition duh tawh eng ang emaw nei chi alo awm ve a, muga ang chi te pheih chu a nazawngin chin theih ani lova, kan ram condition nena inmil tak mai tur vawiin ah hian a lo awm chho mek te hi a lawmawm hle maiin ka hria a, helamah pawh hian nasa zawkin mipuite pawh kan thanharh a tul hle a ni tih te pawh kha ka sawi duh a ni. India ramah hian heti zat hi population kan awm a, sari tha an lei dawn chuan silk an lei a ngai tlat, chuvang chuan heti zozaiin an mamawh te, tin, Japan ramah te, China ramah te an hmang tangkai em em a ni. Chutiang chu a nih avangin vawiin ah hian a hralhna lamah harsatna a awm dawn hauh lo a ni tih hriain mipui te pawhin hela a Central sorkar pawhin inphal taka min rawn pek thin te hmang tangkai thei tur te, tin hei aia tam pawh dek chhuak thei turin hma kan lak hi a ngai takzet zet a ni tih hi kan sawi ve duh a ni. Chumi behbawm ah chuan Industry atangin, Apparel and Garment Marketing Centre, Luangmual-ah central sorkarin min pe a. Hengte pawh hi kan hotute remhriat na a ni tih hi kan sawi duh a. Hemi atang hian man man zawkin kan uniform-te phaia kan thui thin leh kan lei thin ang chi te kha vawin ah chuan kan Mizopui ngeiin a hlawkna te an lo dawng tawh ang a. Tin customer te pawhin man man zawkin kan lo lei thei tawh dawn a ni a. Chutiangte chu thil hote a lang amaherawhchu kan ram economy tan a ni tih hi kan hre awm e.

Tin, kawng chungchangah hian nasa takin hmasawn a ni a, kan ram mai nilovin Burma ram thlengin vawiin ah chuan hetiang hian kan Governor chuan a rawn sawi chhuak a, Pu Speaker i phalna in “The government of India has assured that Rih-Tiddim road of about 80km will be developed to improve the connectivity with Zokhawthar” a rawn ti kalh a ni. Chutiang chuan hmasawna kan hmu zel a, vawiin ah hian kan **(SPEAKER : I hmangzo ti tih a nia, i hun hi)** A chanve pawh ka la sawi lova Pu Speaker, move tu nih manah. Engpawhnise sawi tawi deuh te pawh kan tum ang a, amaherawhchu thusawi ah speed hi ka nei vaklo a, min hriatthiam erawh chu ka'n ngena. Nikum kumtirah khan multi-modal transport, kan Transport Minister zahawm tak nen hian kan va en a, a ropui khawp mai. Kan sorkar hnathawh nasat zia te. Tin chu mai piah lamah chuan mipui in kan chhawr tangkai tur zia te han chhut khan a lawmawm ka ti a. Tin, a hmuna thu ka sawi ve naah pawh “hmasawn kan duh a, hmasawna pawh alo thleng dawn a ni, amaherawhchu hmasawna hian thil tha zawng zawng hi, a tha thiau a

rawn thlen dawn lova, a tha lo te pawh a lo thleng dawn a ni. Chutah chuan helai khua leh a chhehvel ami te pawh in lo fimkhur a ngai a ni” tih thu ka sawi a. Chu chu keima mimal ngaihdan leh ka hmuh dan a ni. Hmasawna alo thlen dawn chuan a tha lo te pawh arawn keng tel ve dawn a, hei hi fimkhur taka lo thliar thiam a ngai dawn a ni.

Entirnan, sawlaiah pawh kawng kan nei dawn a, nasa takin kan inpuahchah tawh a, chutih rual chuan kawng kan neih rualin, anmahni Burma sorkar in an enkawl hleihtheih loh criminal tribes ang chi te kha an rawn pheih ve hun te pawh kha a awm dawn a ni, keini pawh kan pheih ve hun a awm dawn a ni. Chutiang hunah te pawh chuan a ram neitu te pawh kan fimkhur thiam a ngai dawn a ni tih te pawh ka va sawipui ve a. Democracy atanga mipui thiltihtheihna pek annih dan te, R.D kaltlanga urban Development-in hna an thawh dan tur te, khang zawng zawng, te a tam khawp a ni.

Tin, kan hlawhtlinna chi hrang hrang Sport & Youth Services-ah te hian sawi tur a tam mai a. I-league kan han tih te a ropuina em em leh vawiina kan hlawhtlinna, kan Chief Minister leh kan Sport Minister hova hmalakna avangin vawiin ah chuan India ram football khelhna ah hian Mizo tel lovin a tih theih tawh loh reng reng a ni, a serh zinga mei ang kan ni hial tawh a ni. Kan hlawhtlinna hi hmuh tur tam tak a awm a ni. Kawng chungchangah te thil chi hrang hrang, ei leh bar leh kan deh chhuah chungchang ah te pawh. Tin, (NLUP nichin khan kan sawi zawk a) NLUP chungchangah pawh nasa takin hma kan sawna chu vawiin ni ah hian deh chhuah a tam a, chumai piah lamah chuan afforestation, forest ram zau zawk kan neih phah a ni.

Tin, Food & Civil Supply chungchangah te sawi tur a tam khawp a, Opposition lam te pawhin lawmthu te sawi sela, gas te pawh hi kan duh zat zat kan la tawh mai ania. Tun hmate kha chuan lungte kan dah thin kha ania, chutiang te chu a awm tawhlo a, tunah chuan kan duh zat zat kan la tawh a. Ka hriat lohin keini pawh ka chhung ten 2 lai an lo la a, ‘pawisa neih loh laia 2 lo lak te chu a dik dawn emaw ni le? 1 chauh lak tur alawm te,’ kan ti zui a. Chuti khawp chuan a tam a ni.

Tin, tui ah hmasawna tha tak kan nei bawk a, tax chungchangah kan nei bawk a; tin, a pawimawh ber Power & Electricity chungchangah te hian a ni. Eng chungchangah te hian vawiinah Tuirial Hydrel Project, sorkar hmasain a lo tih chhiat vek tawh, mimal hausak duhna leh huamhauhna avang liau liau a abandon tawh vawiinah chuan, naktip maiah hawn theih tura a lo awm ta mai te hi a va ropui em ! Chutiang chu

kan ram dinhmun mek a ni a. Tin, chu mai piah lamah chuan Thlawva tih te, Kawlbem SEP te, Tuichang te, Tuirial te sawi tur tam tak a awm a ni. Tin, Health Sector-ah te sawi tur tam tak a awm a, amaherawhchu, kan sawi seng lo ang a. Tin, Health Sector bikah hian Thenzawl-ah private hospital, October 2016-ah khum 50 awmna hawn a ni te, North East-ah chuan hetiang hi a hmasaber a ni lehngal a. Ram kilkhawr, zirna lamah pawh ropui tak ni chuang si lo, state naupang te ni si hetiang kan han nei thei te hi achievement ropui tak kan ti lo thei lo tih hi ka sawi duh a.

Tin, sipaiah te employment generate nan kan thalaite an tan theihna turin nasa takin kan sorkarin Youth Commission atangte in hma a la a. Tin, chumai piah lamah wawiin ah chuan state-in a neih ngai loh Sainik School hawn mai theih tur kan han nei leh ta te hi a lawmawm ka ti a. Engpawhnisela, Education-ah te, Home atangte pawhin sawi loh theih loh in Aizawl City Surveillance Project kan tih te, thiamna te a sang tawh a, thil sual chhuichhuah zung zung theihna tur atana hmanrua kan neihna te; tin, Forensic Science Laboratory tha tak kan neih te, hengah te hian kan sorkar-in hna a thawh nasat zia te, tih tak takna leh chhutzui a duh ziate a lang chiang hle a ni.

Tin, kan tax collect te pawh a kum tel hian hmasawmna kan hmu chho zel a. India ramin a sawi ang deuhin, One Tax a tih ang deuh hlek khan, Good and Services Tax kan lak hnuah phei chuan rualkhai zawk leh tam zawkin Mizoram pawh hian kan la dawn a ni tih hi kan hmu thei in ka hria a ni. Chungte chu ka sawi duh a.

A tawp berah chuan, NEDP atangten tanpuina kan hotuten an siam a, wawiin ah hian kan Zoram mipuite hi a tanpui zel dawn a ni tih han hmuh hian future a bright a, kut hnathawktute tan hmasawmna a la awm dawn a ni tih hi chiang takin a lang a ni tih ka sawi duh a ni. Chuvangin, thil chi hrang hrangah hmasawmna kan hmuh leh kan ngaihthlakte hi a tak tak hmuh theih/ khawih theih vek a nih avangin lawmawm ka ti a. Chuvangchuan, kan Governor thusawi hi lungrual taka pass turin ka rawn ngen a ni e. Ka lawm e.

SPEAKER : Midang sawi tur kan la awm em? Pu Rinawma.

Er. LALRINAWMA : Pu Speaker, ka lawm e. Wawiinah Governor's address sawina hun tha tak kan nei leh hi a lawmawm khawpin ka hria, Tin, kumin chu nikum aiin an rawn present pawh hi a tha in ka hria a. Nikum kha chu kan ni deuh nei nuai mai a, mawilo ni lo sela, a phuailuai deuh kan ti dawn nge sawi leh sel te kha a tam a. Kumin

chu phak ang tawkah theihtawp an rawn chhuahin ka hria a, a thu rem pawh hi a tha khawpin ka hria a, a lawmawm hle in ka hria. Tin, central sorkar hmelhmang te pawh a lang deuh emaw ni chu ka ti a. Kan hriat ngai loh Centrally Sponsored Scheme a tlar thla thluai mai a, hengte hi a lawmawm a.

A hmasain kan Governor thusawia lawmthu sawina hmasa ber atan chuan section 9-naa Minor Irrigation-in project 14 lai mai an lo la thar leh hma an lo la hi a lawmawm hle in ka hria a. Hei hi ka lawm riau nachhan chu July 9, 2015 khan session kan nei a, khatah khan MLA zahawm tak Pu Beichhua hian, “ 2012-2015 chhungin project engzat nge awm?” a ti a. “2012-2015 chhungin project thawh thar pakhatmah a awm lo” an ti a, “Tunah project engzat nge awm?” a ti a. “tunah hian project thawh mek a awm lo,” an ti leh a ni. Khatihlai khan kan lo chau hle khan a lang a. Vawiin ah project thawh thar 14 lai mai leh a dang eng eng emaw a lo awm chho hi a ropui hle in ka hria a, lawmthu ka sawi a ni.

Tin, section 10-naah hian Sports lama kan hlawhtlinna hi hai rual a ni lova, zep thu pawh a awm lova, kan Minister-te pawh an fakawm ka ti a. Henga kan Mizo thalai tam takte hlawhtlinna an rawn tarlangte pawh hi a ropui ka ti khawp mai tih ka'n sawi leh duh a.

Tin section 14-naah hian Food & Civil Supply-in website an neih chungchang thu te leh khami atanga thil dinhmun zel a lo zirchian theihna te kha a rawn tarlang a. Duhthusamah chuan an website te kha han tarlang sela, han lut ve nghal ila a chakawm tehreng nen a rawn tarlang lova. Engpawhnise, kha kha hmasawanna kawng khat leh tunlai khawvela information chak tawh zia leh kan thil hriat duh te kan hriat zung zung theih nan kan lo hmang tangkai zel thei a ni tih lo lanna a ni a. Mipui pawhin kan lo hman tangkai ngei ka ring a, a lawmawm hle in ka hria a ni.

Section 26-naah hian Sainik School hawn tan tur thu leh nakum lawka class tan tur thu te a rawn sawi a, a lawmawm khawpin ka hria a. A hminga a bialtu leh kan bial chhunga lo awm te a nih avangin a ropui ka ti a. Tin, chutihruala ka'n sawi duh chu, Sainik ram pek chungchangah hian kan bial chhung Chhingchhip kuate khi an ti tha em em a. Zoram compensation kan buaipui laiin anni chuan compensate engmah beisei lovin ram hmasawnnan tiin an ram te an lo hlan a ni a. Tunah an hnathawh awm ang tawk te te te pawh IV Grade a ni emaw hetia han lak mai theih ang chi ah kha chuan

han in hriat ve hram hram nisela. Khitianga theih tawpa an thil neih pawh ui lova lo hlantu te khi duhsak ni se tih kha vawiin ah hian ka'n sawi duh a ni.

Section 32-naa District Council chungchanga State Level Committee leh District Council Level Monitoring and Review Committee te din a lo ni te hi a lawmawm ka ti a. Hei hian district-ah hmasawna zau zawk a thlen theih ngei ka beisei a. Engpawhnise, theih tawpin hmalak a tha a ni tih ka'n sawi duh a ni.

Tin, central scheme chungchang ah hian guideline monitoring leh vigilance te a awm thin a, Governor speech - ah hian central scheme a tam em avangin heng monitoring chungchang te pawh hi chak lehzuala kan um a kan zawm kha a tul ang tih ka sawi duh a ni.

Duhthawhna lampang sawi ve thung dawn ta ila, lawm reng kha a tih hleih theih bik loh a. Kan Governor speech hi niminah khan darkar chanve vel a sawi a; amaherawhchu department tam tak an hna thawh sawi lan ve loh ve kha a awm nual a. Entirnan Fishery Department-te Transport Department te hi sawi lan a ni ve reng reng lo mai a. Finance Department erawh chu helaia Mizoram Finance Commission report chungchang a rawn thai lan bak kha chu Finance Deptt. dinhmunte leh an hnathawhte tarlanna reng reng a awm lo a ni. Law & Judicial Deptt. te pawh khatiang zel kha a ni a, Disaster & Management Deptt.- te, Vigilance Deptt. leh LAD, Co-operation thlengin. Hengah hian an hnathawh thailan a awm ve lo lai chu ka'n vui pui deuh a. A chhan chu nimina kan Governor thusawi rei zawng kha darkar chanve vel a ni a, darkar khat pawh ni se hun a thawl a ni. Chumai piahlamah, nikum lamah chuan Section 56 thleng kalpui a ni a, kumin chu section 44-na ah min tawp pui a. Chuvangin, heng department, theihtawpa thawk ve tak tak te hi an hnathawhte tarlan han ni ve sela chuan an phur lehzual kha Pu Speaker, ka'n ring deuh a. Hun lo kal turah chuan hei hi a mawhphurtute in hriatsak hram hram ila. Mihringte chu kan in fak a, kan hnathawh kan inhriatpui atanga hmasawn zel tum leh phur kan ni tih lai kha kan hriat tlan a tha in ka ring a.

Tin, ka sawi leh duh chu section 15-naah hian Supply chungchangah godown 17 sak hi kan sawi lar khawp mai a. Hetiang hian ka'n chhiar teh ang, Pu Speaker, i phalna leh remtihain. Nikuma Governor speech section 53-naah heti hian a ziaak tawh a ni, "17 godowns are in the final stage of construction and will be commissioned" a ti a ni. Nikum tun ang hunah khan heng godown 17 te hi final stage ah

a awm tawh a, commission mai tur a ni e, an ti a. Tichuan kumin ah pawh hian a ngai te bawkin ti hian an rawn ziaik leh a , Section 15 na ah hianin, “ The FCS & CA Department is also in the final stage of constructing 17 new godowns and will be commissioned shortly” tih a ni. A ngai bawkin kum khat chu hna an thawk miahlo em ni tih hi ka ngaihtuah a, thu in ang, a ngai leh ngaia in present khum mai kha chu a ni ber dawn em ni ? tih lai kha ka'n sawi duh a. He thil bawk hi hetiang chiah bawk hian kan Chief Minister zahawm takin Independence Day 2015 khan a sawi chhuak tawh bawk a ni. Chu thil ngai inpek inpek kha, ram rorelna khawl sang ber a nih vangin a fel berin ka hrela a . Chuvangin henga mawhphurtute hian thil chiang zawk kan en a, mipui hmaa pharh tur a nih vangin, dik leh felfai deuha kal hi a tha a ni. Khang sorkar department te khan kum hnih chhung khan hna an thawk miahlo em ni tih kha kan sawi duh a ni.

A dawt leh ah chuan (SPEAKER : Ngawi rawh please, kan inthlak lawk) (Chairman – Nihar Kanti) Section 27 na ah hian Polytechnic Lawngtlai, Saiha te leh Mamit te sak mek a ni tih kha min rawn hrilh leh a, he thu bawk hi 2014 Governor's speech-ah khan an rawn ziaik leh a ni, ‘ Construction of a new Polytechnic Schools are being completed at Champhai, Kolasib, Lawngtlai, Mamit, Saiha and Serchhip’ a ti. Khatiang kha kan zo mek a ni tawh si a, tunah ongoing a ti leh bawk si a, hna kha an thawk nge tih lai pawh kha thil chianguang lo tak a ni. Chuvangin Pu Chairman, hetiang kan ti dawn a nih chuan felfai zawka kan kalpui a ngai a mipui an zahawm a ni. A mawhphurtuten tan kan lak ava ngai em tih kha ka'n sawi duh a ni.

Tin, Section 38 na ah hian 1st Mizoram Finance Commission Report chungchang kha a rawn tarlang a, helaiah hianin kha report recommendation sorkar in a pawm na ah chuan ti hian ziaik a ni a, 15% of share of states own tax revenue inclusive of state excise duty a ti a ni. Tuna a rawn pek ah hi chuan 15% state own tax revenue atangin tih kha a rawn ziaik a, excise duty a huam thu a rawn sawi lang lova. State excise duty chu tam tham tak a ni a, tun ah pawh cheng 53 crore vel lai kan hmu niin ka hria a. Engpawhnise helaia kan present dawn a nih chuanin thil kha chianguang zawka kan ziahlan kha chu a tha a ni tih ka sawi duh a. Chuti a nih loh chuan mipui hma ah kan sawi chhuak a, mi in chik taka an lo en khan sorkar tan pawh a mualpho thlak thei a ni tih ka sawi duh a ni.

Tin, hmanni lawka Mizoram 1st Finance Commission Report dungzuia VC hrang hrang te pawisa pek tur chungchanga an tehkhawng population base kha min lo ensak ula ka duh khawp mai. Ka bial chhungah pawh khaw inlen hleih tak ni a ka hriat te kha population in ang thuak in an rawn tarlang a. Chumai piah lamah 2011 census kha base tur nge ni a, ka han en ve thin na a, ka hmu thiam baw si lova. Chuvangin hei hi thuneituten pawisa sem chungchangah khan eng census nge an base? khang population kha khawi atanga lak nge, kha population kha pawisa tehkhawngah hman a nih baw si avangin, min lo hriatsak ula tih kha ka'n sawi duh a ni.

Tin, Youth Commission chungchang hi ka sawi leh duh a, Governor in tun Republic Day 2017 hmanna ah a rawn sawi a, zirlai sangthum chuang chungchang kha hetah hian chianguang takin a rawn zia ta a ni. Hei hi kan Governor in 26th Jan, 2017-a a sawi a ni a. I phalna in Pu Chairman, kan chhiar ang e. “ Eizawna kawngah pawh hma kan sawn zel a, thalai sangthum chuang Mizoram Youth Commission hmalakna hnuaiah skill training nei tawh zingah mi tlemte tih loh chuan Mizoram pawnah hlawh sang tak neiin hna tha tak an thawk vek a ni,” tih hi a rawn tarlang a ni.. Amaherawhchu hmasawna tam tak khata a sawi tho kan tarlan laiin he thu hi kan zia lang leh ta reng reng lova, (thil dang kan ziah lan leh laiin), kan zia lang ngam ta lo em ni? kan hnathawh tha taka kan tih te kha engemaw a lo thlen avanga kan phatsan leh zel dawn a nih chuan thil fel lo a awm a ni. Chuvangin an ni pawhin tha an thawh ang, he thil hi tarlan a ni ve lo hi chu a fuh ber em aw tih hi Pu Chairman, ka'n sawi duh baw a ni.

A dawt leh atan chuan MLA zawng zawngin, MLA 40-in model village kan thlang vek a, mahse engahmah hian model village-a kan hmalakna te hi tarlan a awmlo a ni. MLA te hi kan tlawm ta em ni? Central scheme tam takah hma kan la a, kan bei a, hetah pawh hian Centrally Sponsored Scheme tam tak a awm a, chutih lai erawh chuan model village-ah MLA tin ten, khaw hrang hrang kan thlang a, mahse hmasawna emaw, kan hmalakna te hi pakhatmah sawi a awm reng reng lo a ni, Hma kan la lo nge? Ka hriatsual loh chuan Central lam thurawn anga Chief Minister zahawm tak thu leh hlaa thlang vek kan ni si a, hei hi Pu Chairman kan ngaihtuah chian ava ngai em. Tunah thlan leh tur pawh ni se kan thlang leh ngam dawn em ni tih pawh ka sawi duh a ni.

A tawpna atan chuan NLUP chungchang hi tlem sawi leh ka duh a. NLUP chungchangah hian kan chau deuh nge tlemte a rawn thai lang a, a zuzi ta deuh nge ni,

ka hrethiam chiah lo a. Amaherawhchu ka lo beisei dan chuan NLUP huntawp lam a lo thlen dawn avangin a rah chhuah, helaiah hi chuan leilet ah buhfai kan thar tam e tih a rawn tarlang a . Tun ah chuan rah chhuah lai hi kan hmuh a hun tawh a ni. Chuvangin eng angin nge, economic impact nge social impact ? Khang zawng zawng kha kan report theih hi ava tha em. Pawisa tam tak vaibelchhia 1500 chuang kan hmang ral a, kumin ah pawh vaibelchhe 30 vel 2016 – 2017 khan ruahman ni in ka hria a, vawiin zawhna ah khan a rawn chhuak hman ta chiah lo a. Engpawhnise NLUP chungchangah hian report felfai zawk, eng hmasawna nge kan neih, vantlangah, social ah, agriculture ah, horticulture-ah ? Khatianga kan hmasawna zawng zawng kha min rawn tehchhuah sak thei se chuan a bengvar thlak zualin ka ring a. Mipuite pawhin agriculture sector-a kan hmalakna ah hian entirnan kan thlai tharte chu a man a to tual tual zawk a, NLUP hi hlawhtling ni se chuan, a man hi a tlawm kan beisei ve a ni. Amaherawhchu bawngnute a ni emaw, thil dang reng reng hi, tunah chuan nitina kan ei leh in ho hian to lam hi a pan zar zar zawk a ni tih hi ka sawi duh a ni. Pu Chairman, ka lawm e, ka sawi hnem ta khawpin ka hria.

CHAIRMAN : Tunge sawi ang le ? Pu K.S Thanga.

Pu K.S THANGA : Pu Chairman ka lawm e, chawhnu lamah programme pawimawh vangin ka awmlo mai thei a, ka'n chuh hma mai ang e. Vawiin ah kan Governor thusawia lawmthu thusawina member zahawm tak Pu Robiak'an a rawn putluh hi a hmasa in ka support a ni tih ka sawi duh a. Point tam tak a awm avangin kan sawi seng dawn lova, a pawimawh lai lai, ka sawi loh chu thiante kan khek tihna ah ngai mai ila, tul ka tih zual kan sawi ang a, chumi hma in ka hmaa sawi, member zahawm tak, Er.Lalrinawma'n a rawn sawi thenkhat, Finance te, Law te kha a rawn vei a lawmawm a, amaherawhchu an awmna hmunah ram tan thahnemngai takin an thawk a ni tih kha, he laiah rawn thailan a nih loh pawhin he ram hian a thatpui tho tho a ni tih kha kan sawipui hram duh a, chuvangin a thahnemngaihna rawn sawilan kha an phu khawp mai, sawi lan pawh an phu, amaherawhchu an sawilan loh pawhin an vuilo a, Financial Control leh management ah te. Tin, dan leh dun chungchangah, Law lamah te pawh, kan sum leh paite hi Law te pawh hian an lo veng ve nasa khawp mai a, Court lama thil tullo tam tak kan senso tur, pawisa luangral tur te pawh min lo ven sak a. Chutiang bawk

chuan, Finance lamah pawh kha a rawn vei kha a lawmawm a. Amaherawhchu khang ho khan an tihlan loh avang khan an vui viau hran lo e tih ka'n sawi duh a ni.

Horticulture efforts are on to construct several horticulture links road to connect potential areas of horticulture importance tih hi a lawmawm ka ti a. Kan ramah hian Horticulture hi India rama mithiamte, kan eizawna kawng lama ngaihtuatu, eg, Finance Commission thleng pawha an lo kal hian Horticulture-a tan la tur hian kan ram mipuite hi min rawn fuih a, chutih laia anmahni hnathawhna an chhip leh an kokia an phurh haw hian a hahthlakna leh a hlawkna kha a inmil thin lova, rah chhuah viau mahse a phurhna a hlat lutuk chuan hei hian harsatna a thlen theih avang hian Horticulture link road te, Agriculture link road te kan siam i a pawimawh hle a ni tih kha, hma kan la a, kan la la zel dawn baw k a, hei hi a rawn sawi chhuak hi lawmawm ka ti hle a ni.

Sericulture chungchang hi hmanni khan Finance, Planning Minister-in Mizorama Entrepreneurs te leh khatiang eng emaw pawimawhte titi puina te an nei a. Chunga mi pakhatin a rawn sawi pawimawh deuh chu Muga Silk hi khung Assam ramah te khuan a chin theihna a awm a nia. North India ramah khuan a chinna vak a awm lova. Vai mi lian zawng zawngin inchei nan leh intihropui nan hian Silk hi an duh a. Muga hi Assam-ah khuan khaw lum zel avang hian chin theih loh tulh tulh a lo ni tan a. Mizoram hi tunah hian a potential awm chhun deuh hi kan ni a, tan kan lak a ngai a ni tih a rawn sawi a. Khatiang tan lak ngaihna kha kan sorkarin a hria a ni tih Governor-in a rawn sawi chhuak hi lawmawm ka ti a, a Department ang pawhin tan lak leh zual sauh sauh a ngaiin ka hria a, ka rawn sawipui ve a ni.

Tin, rubber hi term hmasa lamah khan Soil and Water Conservation hi a enkawltute zingah ka tel ve a. Chutiangah chuan Tripura-a rubber chin chungchang hi zir turin Soil Officer-te leh Farmer Welfare, Mizorama Association hruaitute kan zuk tir a. A hlawhtlinna hi an rawn hmu a, a chiang a. Amaherawhchu, kan mi lian tam takten mahni thawk lova midang chhawra an tih ai hi chuan farmer-te ngeiin anmahni chhungkuaa an buaipui hian an la hlawk zawk ka ring a. Chuvang chuan Mizoramah hian kuthnathawktute, mahni chhungkuaa buaipui duhte hian a hlawhtlinna an la hmuh ngei ka ring a. Heng a rawn highlight hi a lawmawm khawp mai. Rubber lamah hian potential kan nei tha viau a, tan lak a tul viauin ka hria.

Tin, India ram Sorkar-in Rih-Tidim Road atana ruahmanna, Zokhawthar atanga connectivity a siam hi rawn sawi lan a ni bawk a. Hei hi pawimawh hlein ka hria a. Khilama kan unaute khi nakinah chuan Mizoram leh khawchhak lam, Myanmar sorkar democracy lamah a inlumlet chho zel a, a inher chho zel a, tunah phei chuan an inthlang a. Democracy sorkar ang chuan a ding a, amaherawhchu sipai roelna thuk tak a la awm a. A full-a democracy a nih hunah phei chuan Mizoram hian sumdawna leh thil tam takah hnathawhnaah pawh khilai hmun khi kan pan ka ring a. Khitah a tawp deuh rat thleng khian Rangoon-te, Mandalay-te pawh hi ka han kal ve a. Thil hmuh chhuah ti mai ila, ngaihtuahna tam tak ka rawn nei haw ve a ni. Chuvangin hetiang a kan sorkar leh India sorkar-in hmalakna a neih mek rawn thai lan a ni hi lawmawm ka ti hle a ni.

Sport hi kan sawi ve duh chu, nichina member zahawm tak leh mover leh kan thian dangte pawhin an rawn sawi ang khan sport infrastructure hi kan sorkarin a buaipui a. Kan thalaite thalah Lammual khu rum rum, furah diak em em maia an awm thin, 'Playground tha kan duh' tia an au hum hum kha wawiinah hi chuan a takin Mizoramah a thleng a. Infrastructure tha kan neih avangin kan infiamna lam, a bikin major games anga a huhova kan buaipui nasat ber chu football hi a ni tlat mai a. Chuvangin kan sorkar, kan Chief Minister leh Sports Minister-te thahnemngaihna wawiinah field tha, stadium tha kan nei a. Vai rama an khelh theihna ang ground kha hetah kan nei ve tawh a ni, Tun hma chuan khuti laia an ball boot leh helaia an ball boot pawh hi a inang loa ni. chuvangin ball boot hman ringawt pawh kha zir hran leh te a ngai a. Tunah chuan engkim mai heta an tih ang ang khan khutah a tih theih tawh a. Tunah hian Mizo tlangval hi vai ramah a za rual tak tak hi thla tina hlawh nei (salary) hian an awm ve tawh a ni.

Chutiang chu a nih avangin kan sorkar achievement ropui tak a ni a. Tunah phei chuan India rama Football League sang ber I-League an tihah hian Mizo hi a top, a team, eng nge ni, hemi a inkhelhna Leader-ah khan an han awm a ni a. A ropui hle mai a, Game li vel a la awm a. Kal tluan chuan Asia ram football, khami a sang berte khan, Asia rama sawrkar hrang hranga, ram aiawha a sang berte khan home and away-in an inkhel leh dawn a. Khi lam khawchhaka team ropui tak tak, sawrkar ropui tak takte hi Rajiv Gandhi Stadium-ah hian kan khel lo ang, kan lo mikhual lo ang tih hi a sawi theih tawh lova. Chu chu match liin min la dang a, match thum vela kan chak hi chuan Chiang

bangin kan lut thei tawh a. Match hnih vel kan chak pawh hian Mathematics eng emaw dan chuan a luh theih tan tawh a ni. Chutiang chu vawiin niah hian kan ram hian a tawng mek a ni a. Kan thalaite pawh an hlim hle a. Kan sawrkar vawiinah hian hetiang anga thalaite hmakhua ngaitu kan nei hi a vanneihthlak a. Heng hi kan Governor-ina a rawn thai lang hi a ropui hlein ka hria a, kan sawi duh bawk a ni.

Sawi tur a tam a, kan ti puat puat deuh mai ang a. LPG chungchang a sawi lang a. Mizoramah chuan hei hi a pawimawh khawp mai a. Ram phaizawl te kan nih ve loh leh a hmunpui atanga hla tak kan nih avangin g harsatna kan tawk viau thin a. Chuti chung chuan kan sorkarin tunah chuan ruahmanna chi hrang hrang siamin tunah chuan Aizawl khawpui mai ni lovin thingtlang hmun, zokhua hmun tinah pawh harsatna kan nei lo chho mek a. Tichuan Gas Bottling Plant te pawh lian zawka, a aia nasa zawka supply pe thei turin kan buatsaih chho zel a ni tihte a rawn ziaak a, a rawn sawi lang a, hei hi lawmawm ka ti a. Aizawl ah hian thingte hi tuah leh duh pawh ni ila tuah tur a awm chuang tawh lova. Chuvangin gas tel lo khan kan nung tak tak thei tawh lo. A mi lian/mi te, kan zavai hian kan mamawh tawh a ni. Helama ngaihtuahna nasa tak kan sawrkarin a seng a ni tih kan Governor Speech-a a rawn lang hi lawmawm ka ti a, kan sawi lang duh bawk a ni.

Tin, point 17-naah hian “I am proud to state that Aizawl, Champhai and Lunglei Towns have been declared Open Defecation Free. Aizawl City has also been declared as a ‘Littering-free city,’ and this will require cooperation from the public for it to be successful” a ti a. Ka’n sawi taka chu, Aizawl khawpui te, Champhai, Lunglei te, in thiarna tha tak an nei vek tawh hi a lawmawm hle a. Zun leh ek avanga hri leng awm theite pawh hengah hi chuan a him chho dawn tawh turah a ngaih theih a.

India ram ril zawkah te kan kal chuan vai hote chu an khawpuiah te pawh hian khawpui sir mai maiah, an khawpuiina a huamah ngei hian an inthiar lai hmuh tur hi a awm fo mai a ni. Mizoram hi thianghlimna lamah te, inthiarna lamah te, hnam naupang te, sawrkar naupang te kan ni chung hian hmasawna hi chak takin a kal a ni tih hei hian a tilangin ka hria a. Chuvang chuan heng hi lawmawm hlein ka hria a, kan sawi lang ve duh bawk a ni.

Point 23-naah hian Health and Family Welfare-ah State Referral Hospital, Falkawnah hian hmasawna chak taka kalpui a niin tuna a dinhmun upgrade ni zelin

Institute of Medical and Education and Research (MIMER) din tura sawrkar inbuatsaihna rawn sawi lan a ni a. Pu Chairman, ka zo tep hei chiah hi kan zo ang e. Aizawl khawpuiah Civil Hospital kan nei a, mahse a hmun leh a building engkimin min zo lova. Tichuan kan sorkarin ngaihtuahna thui tak hmangin, Referral Hospital, tun hma an hun hmasaka din tawh, kum sawm chung ngaihsak lohva lo awm kha rawn tipuitling tura hma lak lehna hi a ropui hle mai a. Hei tunah pawh hian NEDP hmangin khawl tha, India ram kan zuk pan chhan thin tam tak khawl kha vaibelchhe 28 tunah hian kan sawrkarin sawlai Falkawn a hman bik tur saw an pe leh ani a. Hei ringawt pawh hian saw hospital saw a tichangtlung hle dawn a. Department hrang hranga thawktute pawh an phur a. Khatiang a nih kha chuan Civil Hospital-a kan chep lutuk leh harsatna tam tak hi a chhawk ang a. Sawtah sawn mipui tam zawk ten saw hmun saw an pan zel dawn a ni. A awm na saw hmun thengthaw nuam leh boruak thawveng tak ania. Nakinah chuan VIP te thleng hian sawlai hmunah sawn admit vek theih turin sorkarin a la buatsaih dawn niin ka hria a. Chutiang taka hmun tha sawlaia kan sorkar hmalakna thailan hi kan sawrkar chungah pawh a hminga bial neitu ka nihna ang pawhin ka lawm a ni. He Governor speech hi hun a tawi avangin sawi tur tam tak awm mahse kan sawi seng vek lo va. Khang ka rawn sawichhuah chinah pawh thusawi tha tak a ni tih a hriat a ni. He House hian lawmthu kan sawi a kan pawm ngei ka duh a, ka rawn support a ni e. Ka lawm e.

Dr. K.BEICHHUA : Pu Chairman, ka lawm e. Kan Governor zahawm tak speech sawihona hun kan nei thei hi lawmawm ka ti a. A hmasa berah chuan kan Assembly sana leh kan Governor sana lo inanglo kha paw ka ti a, min 4 in a in millo a ni. Hei hi kan hmalam a kan insiamthat nan kan ngaihpawimawh a tha in ka hria a.

Nikum lama a thusawi a in prepare leh kumina a thusawi in prepare ah kha chuan kumin chu tha thawkhat viau in ka hria a. Nikum lama a thusawi erawh kha chu duhthu a sam vak lo a. Kumin erawh chu a tha thawkhat viau in ka hria a ni. Sorkar hmalakna hrang hrang kan ram dinhmun leh hmathlirte a rawn sawi a. Chung zinga pawimawh zual a ka ngaihte tlem han tarlang ve ta ila.

A pakhatna ah chuan inkalpawhna kawngpui neihthat a tulzia a rawn sawi a, a dik viau a ni. Inkalpawhna kawng tha neih loh chuan hmasawna hi a kal thei lo reng baw a. Chuvang chuan inkalpawhna kawng tha hi a pawimawh tak zet a. Chutihlai chuan tun sorkar pawh hian theihtawp chuan hma a la a, a lawmawm. Chutih rual rual

chuan tuna kan ram inkalpawhna dinhmun hrechiantute chu mipui nawlpui hi an ni tih ka sawi duh a. Ram mipui hian helaia kan sawi loh pawh hian. kan inkalpawhna hi chu kan hrechiang hle in ka hria a. Kei pheih hi chuan ka rilru hian ka vei em em mai a. Ka rilrua kan inkalpawhna kawng leh kan leihlawn dinhmunah chuan tun aia insanmar a, thahnemngai zawk leh chak zawka hmalak hi a tul em em a ni. Pu Chairman.

A pahnihna ah chuan ei leh bar chungchang kha a rawn sawi leh bawk a. Crop production a agriculture hmalakna a tulzia leh pawimawhzia a rawn sawi a, a lawmawm viau in ka hria a. Hei hi sorkar leh mipui pawh hian mutmawh hnarmawha kan neih a, kan zavaia kan tan tlan a ngai hle in ka hria a. Tin, tun dinhmunah chuan kan ram kan intodelh lo hle mai a. Kan intodelhloh laiin kan Governor thusawi ami mak deuha ka hriat chu, NLUP inception atanga vawiin thleng a kan buhfai tharchhuah kuminah NLUP vangin a pung nasa tiin a rawn sawi a.

Hei hian tlangram lo neih, shifting cultivation a ti tlem a ti bawk a, dik pawh a dik in ka ring a. Mahse vawiina kan buhfai tharchhuah tum hi ka ngaih ve danah chuan leilet siamah te hma kan sawn viau te a nih loh chuan tuna kan buhfai tharchhuah hi a tlangpuiin tlang ram lo kan siam atanga kan tharchhuah deuh vek a niin ka hria a.

A bik takin kan district ah pheih chuan sorkar sum leng vak hi a tam vak lo va. Chuvangin kuthnathawktute hian thlawhhma, buhmun siam lamah hian nasa takin hma kan la a. Tlangram shifting cultivation atanga an tharchhuah deuh vek a niin ka hria ani. Kan buh tharchhuah a pung a tih hian Zoram thla khat ei tur kan tharchhuah ang em tih ngaihtuahna te min neihtir a. Chuvang chuan hengah pawh hian Pu Chairman, a mipui leh sorkar pawh hian tun aia chak zawk leh thahnem ngai zawka hma kan lak hi a tulin ka hre bawk a ni.

Tin, Pu Chairman, sorkarin horticulture a ngaihpawimawhna a rawn sawi bawk a, lawmawm ka ti hle a. Horticulture-hi a bik takin Mizoram tlang ramah pheih chuan kan dinkhawchhuahna tur thil pawimawh ber zing ami ti ila kan tihsual ka ring lo a. Chuvangin horticulture-ah hian mipui lam pawh, sorkar pawh kan zavaia kan tan tlan a ngaiin ka hria a. Tu pawh sorkar sela, MNF emaw Congress pawh ni sek sek, horticulture-ah hi chuan theihpatawp kan chhuah hi a tulin ka hria a ni.

Chutihlai chuan RKVY, central scheme tam tak kan dawng a, kan vannei hle a ni. Vawiina kan hmalakna a sawi tam zawk te kha chu central scheme deuh vek an

ni hlawn a. RKVY hmalaknaa self sufficiency kan neih theihna tur tia a rawn sawi ah hian a lawmawm hle in ka hria a. Chutihlai chuan keini a bikin MADC area-a awm te ho in RKVY kan hmelhriat dan saw a pawl ka ti a, vanduaithlak ka ti a ni. RKVY han tih chuan mipui rilruah sawn corruption saw a lang tlat mai a, chuvang chuan sorkar pawh hian sawlai saw rilruin min neihsak ta ula, a vanduaithlak hle in ka hria a ni, RKVY chungchangah, a bikin kan district ah sawn.

Tin, kawlpheha chungchang a rawn sawi bawk a. Hei hi mipui pawhin kan ngai pawimawh a, kan Governor pawhin a ngai pawimawh a, kan sorkarin pawh hian a ngai pawimawh bawk a. Chuvang chuan he thilah pawh hian party anga inpuhmawhna leh engemaw awmlo hian inlungual takin, kan ram zim te, mipui tlemte kan nihna hre ranin rilru hmunkhata Power & Electricity-ah hian tu party pawh ni ta ila, hmalak hi a van tul tak em tih hi ka rilruah lian takin ka nei a, hei pawh hi tha ka ti a ni.

Tin, Sport & Youth Services-ah khan member dang te pawhin an rawn sawi nual tawh a, kan hmalakna tam tak, kan hlawhtlinna te, tun hmaa kan la hmuh loh hlawhtlinna tam tak te pawh kan hmu chho zel a, lawmawm hle in ka hria a. Chutihlaia ka rilruah awm chu, district hrang hranga kan hmalak dan hi rualkhai tak hian hma lak ni thei se. Vawiina an talent an thur chhuah loh, thingtlang lam thalai tam tak talent tha tak tak nei kan thurchhuahna tur hian Sport & Youth Services hian district tin hi rualkhai tak hian hma la thei se tih hi ka sawi duh bawk a ni, Pu Chairman.

Tin, Tourism Dept. a rawn sawi a, a pawimawh a, promote te pawh a pawimawh a. Tourism atang hian mi state te chuan revenue tam tak an hmu thin tih pawh a hretu vek kan ni. Chutihlai chuan nimina kan Governor zahawm tak thusawi ah pawh Siaha District ah Tourist Lodge pasarih (7) kan hawng thar tih kha a rawn sawi leh ta a. Kan neihsa pawh privatise ngai khawpa kan run theih loh laia pasarih (7) Siaha District-a kan hawn thar kha engtingge maw kan run ang le tih te rilru ah a awm. Tin, chumi piahlamah chuan tourist hip luh kan tumna rilru hi engang atanga hip luh nge kan tum tih hi Pu Speaker, ka rilru ah lian takin a awm a. Tourist Lodge tha neih hian tourist kan hip luh ka ring lova, chu ai chuan an thil hmuh duh chu, kan tlangram chhengchhe tak tak te, kan nihna ang ang min rawn hmuh hi tourist tam tak te hi chuan an chak zawk a ni tih hi kan rilru ah awm se. Lodge aiin kan ram tourist tena an zin duhna tur ang zawnga hma kan lak hi a pawimawh dawn in ka hria a ni, Pu Speaker.

Tin, PMGY hnuai ah model village 2 kan nei a rawn ti a, third phase atan Haulawng a rawn ti bawk a. Hei hi kan MP zahawm tak tak te model village a rawn sawina a ni in ka hria a. MLA te hian keimah ni bial theuh ah hian model village kan nei ve theuh a ni, Kan model village hi PM policy a ni a, guideline tha tak kan nei a, mahse a guideline ropui ang hu hian tumah hian kan model village te hi kan chei hlei thei lova, kan ti hleithei lova, a lawmawm hun lai ber chu kan hawn ni hi ni mai in ka hria a. Kan hawng a, mipui a khua te an lawm viau a, keini pawh kan lawm viau a, a bak hi chu thil dang lutuk hi a awm lova, churang chuan hetah hian chak zawka hma lak dan ngaituah thei ila tih Pu Speaker, ka sawi duh bawk a.

Tin, Armed Force recruitment chungchangah khan mi 182 an tlin thu a rawn sawi bawk a. Kan thalai sipaia lut duh hi tam kan nei a ni. Hmana recruitment an nei ah khan, kan MLA zahawm tak Pu Nihar Kanti Chakma leh keinin recruitment-arawn tel kan mikhual ringawt pawh kha mi 200 chuang an ni. Churangin, kan Governor zahawm tak hi sipai hotu pensioner a ni bawk a, chak zawk in hma min lak sak thei se, district capital tinah te pawh hian recruitment hi neih ve theih ni se tha hle in ka hre bawk a ni, Pu Speaker.

Tin, service sector-ah khan thil hrang hrang a rawn sawi a, ngaihawh zawng tlem han tarlang ta ila. Health-care facility ah khan District Hospital tih changtlun kha a ngai pawimawh viau ang khan a rawn sawi bawk a, a pawimawh reng bawk a. Vawina kan District Hospital te hi dik tak chuan sorkar in a tih theih mai tur leh, tun dinhmun aia tlema changtlung deuh hleka dah thei dinhmun ah sorkar hi a awm in ka hria a. Churangin, kan District Hospital te hi tun aia tlema han tih changtlun deuh hlek hi a van tul tak em! tih hi rilru ah ka nei a ni. Example ah, hmanni Siaha ka va kal khan, kan khawtlang ami pawimawh tak mai a kal (kidney) a fail thut mai a, Aizawl-ah refer turin an rawn thawn phei a, kawng lakah a boral ta nghal mai a. Khang te pawh kha, Dialysis khawl nei ta ila chuan a thi miah lo tur kha a ni a. Chutiang chuan kan thihlohna tur ah hian kan district hospital tam tak ah hi chuan kan la thi fo a ni tih hi Pu Speaker ka sawi duh bawk a ni.

Taxation Department chungchang kha Pu Speaker, Revenue nikum aia kumina a pun chhohna pawh kha rawn sawiin, nikum ah `118.73 crore a nih lain kumin ah `278.11 crore a ni pawh kha a lawmawm viau in ka hria a. Chutihlaia ka rilrua awm

chu, kan revenue a pun hian leh lam a (negative) lama ka ngaihtuah chu kan chhiah hmuh tam nachhan zu a nih avang hian hmeithai leh fahrah te kan pung em tih hi ka ngaihtuah a ni.

Tin, a tawp berah chuan Pu Speaker, khawngaihin tawi te-in, Autonomous District Councils chungchang pawh kha a rawn sawi bawk a, plan leh non-plan sum atanga District Council pawisa kan pek zat te leh administration improvement chungchang te pawh a rawn sawi a. Autonomous District Councils hi chuan plan leh non-plan sum atang hian 92% hlawh a an hman chuan office expenditure te nena belhkhawmin mipui chan tur hi a awm miah lo a ni. Chuvang chuan, heng ah hian improvement of Autonomous District Councils chungchang ah hian kan Governor hian ama discretion a awm a ni bawk a, tun aia chak hian hma min lak sak se tul hle in ka hria a.

Tin, Lai District Council dinhmun chu kan hria a, care-taker a awm te pawh hi thil chhuanawm tak a ni lem lova. Heng te pawh hi sorkar leh Governor hian hma min lak sak vat se, min ti fel sak vat se a van tha dawn em tih hi ka sawi duh bawk a ni. Pu Speaker, ka lawm e.

SPEAKER : Tunge sawi leh ang, sawi duh kan awm ta lo em ni ? Kan awm tawhlo a nih chuan House Leader kan sawm tawh mai dawn nia.

Tunah kan House Leader, a duhzawng sawi turin i lo sawm tawh mai ang u (Pu LALRUATKIMA: Pu Speaker.....) khawvar dawn hnai ah i ding leh ta si a, i awm ta lo emaw kan tia lawm, ka tih palh a ni e.

Pu LALRUATKIMA : Kha lam kha i en tlat a, he lam i rawn en ta lova. i zin rei deuh hlek a, i awmluh hlanin kan lo ti chiam tawh a, a lawmawm khawp mai hun tha tak min pe a. Midang sawi duh an awm lo bawk a Pu Speaker, ka pum-hmawm vek thei mai turah ngai ila, a lawmawm hle in ka hria a. (SPEAKER : Kan House Leader in nakin ah a la sawi ve leh ang)

Nimin lamah te kan Governor zahawm tak thusawi kan ngaithla a, kan sana dik lovah pawh ka puh lova, Governor rawn tlai kha tun hnu ah chuan thleng nawn tawh lo se tha in ka hria a, Governor sana ai-in helai sana hi a pawimawh in ka hria. He lai Speaker sana, a chhunga kan tar hi a pawimawh em em a, tun hnu ah chuan thleng nawn tawh lo se tha in ka hria a.

Thil tam tak hmalakna tur te, hmachhawp mek te, hmalak tawh te kan ngaithla a, chungah chuan lawmna tur tam tak a awm lain, lawm tehchiam tur a awm emawni le tih mai theih te pawh a awm lo thei lova. Chu tih lai chuan, nikum lam 'ka dawhtheihna in test a ni' a tih ang te kha awm tawh lovin, tun tumah erawh chuan kimchang ang reng tak si, tawi fel takin a rawn ti a.

Pu Speaker, NLUP in bul a rawn tan a. NLUP hi kan sawi fo a, kei chuan a hlawhtling titu te lam chuan political measure a an teh avangin, political power a rawn pek avangin a hlawhtling an tih hi va dem ngawt theih pawh a ni lo a ni. NLUP, 2008 election ah leh 2013 ah a hlawhtling titu lam tan chuan a lo hlawhtling daih tawh a ni ti hi a chiang em em a. Chu tih lai chuan, sum vaibelchhe sang chuang kan sen tawh na ah hian economic measure a han teh chuanin a hlawhtlinna hmuh tur a tlem viau a ni. Nichina member zahawm tak ten an sawi tawh ang khan he thil ah hian thil man te pawh a tlawm zawk ang a, kan hnianghnar zawk ang, han tih tur ang chi NLUP trade hrang hrang ah hmuh tur a tam lemlo tih chu kan hriat dan a ni a. Chutihlai chuan, he laia Agriculture hmalakna hrang hrang te a rawn tarlan tam zawk hi chu central lam in project an neih-te, scheme an neih-te a ni a, heng ti hlawhtling tur hian theih tawp chhuah a kan tan tlan chuan kan ram pawh engtik ni ah emaw chuan kan la intodelh ngei ang tih hi chu ka ringin ka beisei tlat a.

Chutihlai chuan Link Road chi hrang hrang kan lai a, link road te hi chu zawh belh ngai te a lo ni a, kan zawh taimak lo chuan fur a lo ni a, lei a lo min a, alo block leh mai thin a, heng te pawh hi nikuma kan laih kha vawiin ah zawh tlak loh tam tak a awm in ka ring. Chung angte chu a maintenance lam te pawh hi thil tul tak ni te pawhin a lang a. A bik takin Agriculture leh Horticulture lamah te pawh hian chungte chu kan sawi tel duh a.

Pu Speaker, thil pakhat Sericulture Department-ah hian nikum lama Integrated Mega Silk Development Project kan launch tum khan ka zin hlan a nia ka telve hman ta lova, pawika ti khawp mai a. Kan MLA zahawm tak pakhat chu a haw leh tawp mai a ni. Gate-ah luh an lo phal lova, khang ang thil kha chu thleng nawn tawh lo se a thain ka hria. Receptionist-ah leh Security-ah tute emaw kan dah a nih chuan kan MLA zahawm tak takte hi an hre ve turah ka ngai. Khatiang thil kha a tuar tu tan thil hreawm tak leh zahthlak tak a ni a.

Chumi thlavang hauh chuanin kan member zahawm tak dang te pawh an haw nual a ni tih te kha kan hria a, pawl ka ti khawp mai a.

Tin, central sorkar leh Myanmar sorkarin MoU 2012-ah an lo siam kha, inkalpawhna tur Rih leh Tidim road-ah khan an siam kha lawmawm ka ti khawp mai a. Border trade te kan han ti a, mahse hmasawna a la tam lutuk lova. Bungrua tam tak khi lam atangin a lo lut thla a. Mizoram mipuiten man man zawk leh tlawm zawk, quality tha ve tho si kan hmuh theihna a nih avangin khilai kawng tha khi a pawimawh a ni. Chuvangin, a hlawhtlin thuai theih hi a nghalhlehawm hlein ka hria a. Chutih rual chuanin Kawrpuichhuah lam te pawh tichanglung leh zual tura tan kan lak nasat leh zual hi a tul a ni.

Tin, ram tikang lo turin kan inzirtir a, ram tam tak ram kang avangin kan chan a. Ram ngaw tha tak tak tur kan chan avang hian kan ram environment tur, kan ram sik leh sa hian nasa takin a tuar a ni. Lo hal hun te kan han bituk a, tukin lam chanchinbuahte kan han hmu a. Tun kar maiah ruah a sur avangin sorkar-in a hunbi tuk anga a ruahmanah pawh kan hal thei lova, hal hun tur tawlh dawrh a ngai a, chungah te chuan inzirtirna kan neih a pawimawh khawp mai a. Khawthlang leh khawchhak, kan lo vah hunte a lo in. an loh avang khan. Chung avang te chuan kum hmasa lamah te khan loneitu a hun taka lo hal ve thei ta lo, an vahchap a ro that hmaa halte kan han man ringawt a, court case kan awrh tir vak mai erawh kha chu kuthnathawktute hmangaihtu nia kan insawi hi kuthnathawktute tan chuan phurrit, kuthnathawktute jaila thawn ta mai, hruai ta mai sorkar kan ni ta mai tih hi kan rilruah awm thleng sela, khang harsatna te kha kan hmuh thiam pui a thain ka ring a.

Sports Department lam hmasawnnate a rawn tarlang a, a lawmawm khawp mai a. Chulaiah chuan a bik takin ka bial chhungah NEC sum hmangin Multipurpose Sports Complex, Aizawl West-I YMA Field-ah ruahman a ni hi lawmawm ka ti a. Tin, chubakah chuan, ka bialchhung nula Lalrintluangi NECC Cadet-in Mt. Everest a lawn chhuak hi Mizo mipuite tan achievement ropui tak a niin ka hria a, he House kaltlang hian lawmpuina kan hlan tel bawh ni sela.

Tourism Department chungchangah hian Tourist Lodge 7 kuminah kan hawng a, (Election awm dawn vang nge ni sawlamah kan phei dur dur mai

a) chutih lai chuan engemaw zat kan privatised lawi a, tuna kan hawnte pawh kha privatized tur nge ni tihte ka ngaihtuahnaah chuan a awm a. Kan sawi belh duh chu, khualzin mite thlenna tur kan ngaihtuah nasat lutuk ai kha chuan a hip dan tur kha ruahmanna kan neih a, kan ram rohlu tak tak hmanga kan hip theih dan tur kha ngaihtuah ni zawk thei sela, ramhnuaiyah pawh rawn riak ve mai rawh se. Kan thlam, rap inah pawh rawn riak ve mai rawh se. Khang kha nuam an ti zawk mai thei a ni tih ka ngaihtuahnaah chuan a awm a ni.

Tin, helaiah Construction of State Institute of Hotel Management, Bung Bangla ami te kha MNF sorkar laia hma lak daih tawh kha a ni a. Khangte kha hmang tangkai ila chu hmanni lawka kan buai mup mupna te Kolkata lama tirh ngailo khan kan hmang tangkai daih tur a ni a. Khang te pawh kha inzir ngai vek mai a ni a, chungte chu ka han sawi lang tel duh a.

Tin, para 14-na Supply Department-ah khan kan ngaihtlak tak ang khan kudam tam tak nikum lamah commission theih mai a ni a. Kuminah chutiang bawh chuan a rawn report leh a, hawn theih hnu ah kum khat hnu ah pawh la tih puitlin mai loh te kha a hun a rei mang e aw tih te kha ngaihtuahnaah chuan a awm a. Firm pakhat NABARD Godown ho in a sak hna an thawk vek mai bawh si a. Tunah phei chuan a chhuat thenkhat phei kha chu video clip te min rawn thawn a, thirtiing zum vak lo, rod bungte khan an han chhun a, a tlum thuih thuih mai a. Khangte pawh kha kan Minister zahawm tak te pawhin an lo hriat a thain ka ring a.

Ration Card hi kan sorkar hian world record kan siamna a ni ve a, lawmawm dangdaiin ka hria a. Kan sawilang ve hrim hrim duh a he House zahawm takah hian. Cheraw kan hmangin kan nula leh tlangval ten wold record kan siam a, a lawmawm a. Ration Card hmangin 1.1.2016-ah kan piang rual thup mai a. Kha kha Mizoram mipuite tana world record dang dai tak mai kha a ni a. Tin, Ration card diklo tam tak hmuhchhuah te khan kan buhfai lakluh engemaw zat a titlahniam ang tih ka ring a. Khang angah te pawh khan tan kan lak tlan a ngaihtuahna kan hman tlan hi a tul takzet zetin ka hria a.

Tin, kawng chungchang kan han sawi hian Sumo Driver te chuan kawng chhe lai chu ‘Congress Kawng’ an tia, tawngkam mawilo ni lo se Pu

Speaker. Khatiang kha a nih avangin kan image kha khalaiah khan kan put hlen tir mai ang tih ka hlau a, tan kan lak a ngai khawp mai a. Kuminah fur ruah a rawn tla hma a, duh aiin kawng siam hna te pawh a chak thei lo te pawh a ni ang e. Amaherawhchu, working season kan neih tlemteah hian ngaihtuahna nasa zawk kan hman hi a tul tak zet zet in ka hria a. Kawng a that loh hi chuan hmasawmna a kal chak thei lova. Ngaihtuahna chak zawk kan hman a tul khawpin ka hria a ni.

Tin, helaiah hian PHE lamin tui min pek danah Aizawl khawpui a bik takin ruahmanna thar an rawn nei a. Amaherawhchu, a kawng hnawh leh lamah hian SIPMIU lam hi an chak tawh lova, kawng a lo diak a, a lo khu bawh a, a hreawm ang reng khawp mai a, nasa leh zualin tan la leh zel se thain ka hria a.

Chubakah kan sawi leh duh chu Pu Speaker, minute hnih khat lek. Helaiah hian Tlawva Hydel Project, small hydel project ni thin kha Hydel Project HEP-ah kan chhuah fai ta vek mai a, (small hydel project te te kha hydel project lianah). Kha kha ziah sual nge ni? Chutih laiin nikuma Governor speech (ni 17 March)-ah khan Kawlbem Hydel Project kha 3.5 mega watt tur a nih laiin kuminah 4 mega watt a lo ni leh ta a. Khalaiah khan .5-a a lo pun lehna ringawt chhan kha enge a awmzia, kan fimkhur tawhlo nge ni? Khang te te kha ngaihtuahna kan neih a ngai a. Tin, Myanmar chungchang chu sawi thui lo ila, kum 2015 Governor speech ah ruahmanna thui tak a kal a ni kan ti a, kan la ti thei lova.

Tin, kan sawi leh hram duh chu Pu Speaker, Autonomous District Council kan neih te hmasawmna chu nasa takin a awm a ni tih kan Governor zahawm tak khan a rawn sawi a. Amaherawhchu, administration lamah chuan pakhat saw chuan tun dinhmunah chuan hma a sawn lo tih chu a lang chiang khawp mai a. Helai hi chu kan sorkar thuneitute pawh hianin chinfel ran a thain ka hria.

Chubakah chuan HPC(D) te nena inremna tura kawng sah mek a nih thu a rawn sawi a, a lawmawm khawp mai a. Helaiah hian Sixth Scheduled Autonomous District ang mai hi a piang ang tih ka hlau a, ngaihtuahna tak tak kan hman loh chuan ram inpek chungchangahte sawi thui vak chi pawh a ni lovin ka hria a. An inbiak dan engemaw chen kan lo hre ve lo thei lova. Kan fimkhur a tul khawpin ka hria a, Mizote min ti pumkhattu ni zel se thain ka hria a.

Tin, state own tax revenue nasa takin a pung niin ka hria a, a lawmawm khawp mai, kan pung zel ang, kan hman chhuah pawh a pung zel tur a ni a. Chutih lai chuan kan punna kha a lawmawm rual rualin tukin chanchinbuah te khan MLCP Act vang a ni an ti erawh kha chu ngaihtuah zui tham tak a ni. Kha khanin nawmsipbawlina lamah khan kan kal ta lutuk nge, Pu Speaker, chhiah kan hmuh tur aia tam daih kan hmu a, kan target aia atam daih kan hmu a, a that rualin khalaiah khan thil tak tak lam ni silovah khan kan ei leh bar leh a luang ral chi ang ah khanin kan inseng tam lutuk te pawh kha kan inzir a ngai khawpin ka hria.

Tin, NEDP kha Pu Speaker, kan han ti chho tan a, a lawmawm khawp mai a, kum 2015 Governor speech 36-na khanin hemi chungchangah hian hmalak a nih tawh thu hi sawi a ni daih tawh a, chuvang chuan he thil hi sawi thar hluai theih pawh a ni lova. Kan sorkar hian “Approach to Developmentfor Mizoram’ tiin a lo approved daih tawh a ni. Hei hi Planning Department-in hma a lak zelna tur a nih angin tunah hian kan han ti thar leh a, chutah chuan NLUP ka sawiselna ni lovin NEDP hian infrastructure development tak tak min thlen sela, chutichuan ram pawhin nasa zual in hma kan sawn ngei ang tih ka ring a ni.

Tin, Public Undertaking pathum kan thiah zingah MAMCO hi a la function reng a, contract hna te pawh a la reng a, mi engemawzat ban an ni tawh bawk si a. Helai hi engnge a awmzia aw ka ti a. Sorkar hian a wind-up tawh a ni a tih laiin la tihtawp fel loh hi a awm a ni tih hi chu a lang reng mai a. Heng te te ah pawh hian kan in en let a ngaiin ka hria a ni.

Tin, minimum rate of wages 1st April 2011-ah hman a nih tawh thu, revised a nih tawh thu kan hmu a, a lawmawm khawp mai a. Labour ho, MR ho hi ngaihtuah ngai tak an ni. Chutih lai chuan Department engemawzat minimum wages anga pe lo hi kan la awm a, sorkar kha a ti sual tu kan nih avangin kan ruahmanna siam kan bawhchhia a nih chuan Department ten in en letna tur tam tak kan nei dawn a ni tih tih kan sawi tel duh a ni.

Kan sawi vek seng lo ang a heng ah hian kan ram thatna tur atana kan thahnemngaihna te kan thutna a inan loh avanga kan ngaihdan a lo danglam

ta ni lovin thahnem kan ngaihna avanga khang kha han sawi chhuak kan ni. Kan sawi bakah te pawh khan Governor thusawi zawng zawng kan sawi vek seng lovang, he ram siamtha tur hian, he ram hian ramdang te hmasawna umpha ve tur hian theihtawp chhuah a tan kan lak loh chuan kan Governor thusawi hi a taka tihhlawhtlingtu kan ni lovang tih ka hlau thin a ni. Chuvangin keini lam pawhin constructive zawngin i dinglam ami te pawh khan min lo ngaihtlak sak se tha in ka hria. He ram hian hmasawna tak tak kan thlen theihna tur leh tan kan lak zelna turin kan rawn sawi ve duh a ni e. Pu Speaker, ka lawm e.

Pu T T ZOTHANSANGA : Pu Speaker, ka lawm e. A point a kan luh hmamin namin Vanglaini ah khan Speaker te pahnih leh CM tih loh MLA te chuan nitin thut man hi 700/-vek an hmu thin a ni tih kha a rawn lang a, kan Minister leh Parliamentary Secretary te hian kan hmu lo a nih tih kha kan sawi hmasa zawk duh a ni.

Pu Speaker, Governor thusawi hi duh aain a ziaak a sin deuh ka ti a, nidang a ang lo tlat mai a, a theih chuan hraw deuh in min lo ziaak sak thei ula tha ka ti khawp mai.

Pu Speaker, lawmthu sawina tur tam tak a awm a. A hmasabera ka rawn sawi duh chu, Rih to Tidim road chungchang hi a ni, Zohnahtlak hmun hrang hrang ami te leh khawchhak ami te pawhin tunah chuan Mizoramah hian sorkar tak kan nei ta e an ti ve a ni. Hei hi a lawmawm khawp in ka hria a. Tin, kan sorkar chhung hian an lung a muang a, Myanmar zin te pawh hi kan thahnem tawh in ka hria. Anni pawh lo zin an chak a, kan in ngaihsak tawn a, ka bialah te phei chuan competition ah football te pawh an rawn pet ve tawh a ni. Kan Chief Minister zahawm takin a remtihna angin Zokhawthar piah lamah pawh khian current kan pe a, Mizo te rilru ah hian Khampat Bung leh Rihdil khian hnuhma a nei reng dawn a, chuvangin Myanmar sorkar-ah hian kan pawimawh chhohna hi kan vawn nun reng a ngai dawn a ni tih kan sawi duh a ni. I veilam ami te sorkar lai ai kha chuan tha tak kan ni tawh a ni. Anni hian an sorkar lai khan an lo pal baw sa deuh hlek tawh a Tidim outpost te kha lo han bei lovin Falam Bank te kha lo han rawk lo phei se chuan kan innauna te hi tun ai hian a nghet tawh in ka ring a ni.

Kum 2007-ah i vei lam amite an lal chhung khan border fencing kha an han rawt leh nghal a, “khawchhak atangin a sual sual an lo chhuk a, kan dan loh chuan” tiin awr phekin an tang a, khatiang te kha ni lo pheise chuan Zofate reunification lam ah tun ai hian kan hrual mum tawh ang a, a fip viau tawh ang. Chuvangin, tun kan sorkar in kum 2012-a Rih Tidim Road an han ruahman hi lawmawm ka ti a. Tin, tunah khianin Champhai atanga Zokhawthar khi kawngpui lian takin kan lai mek a ni. Kan dam ang a khawchhak lamah kawng a tlang bawkw chuan, Champhai atangin Saitual kan rawn thlen hun ah hian Champhai atangin Tahan kan thleng daih tawh dawn a ni. Khi khi a ropui khawp mai a, Champhai bazar ah chuan Tahan thil hi kan ei kan ei tawh mai dawn a ni.

Chuvang chuan tun kan sorkar hmalakna hi tha ka ti a, khawchhak mite an rawn in thlahrung ta lova, Ukil kan nih lai pheise chuan khawchhak ami te kha, lehlam ami te an sorkar lai pheise chuan, a mihring te khan kan thawn chho va, a hlauhawm lutuk. Ka la hriat reng chu kawlmia ni a motor ah hian lei rap thei lo hian an thlungbet a, sipaiin an phur chho hmiah mai a ni. Khatiang khan kan in tih rei lutuk a ni. Tunah inunauna tha tak mai kan nei a, khawmpuite kan inchhim tawn a. Kan CM hmalakna leh kan hruaituten an tawiam thatna hi Zoram hian kan la seng ang tih hi ka ring tlat a ni.

Tin, para 22-na ah khan, Tuirial Hydrel Project tawl tawh kan han tuai thar leh a, reilo te ah hawn mai theih an ni tur hi lawmawm ka ti khawp mai. Ka document te kan en a, compensation ah khan kan lo pe hnem khawp mai a, `43,651,1161 kha i veilam ami te sorkar lai khan an lo pe hman tawh a, chumi pek bang `21,53,75,855/- kha a awm leh nghal a ni. Khatiang zawng zawng avang khan hei hi chu ti tawl tawh mai ang “kan hlawhtlin pui chuang lovang” tia awlsam taka hnungchhawn mai awm a nih laiin kan CM zahawm tak hian, ‘theihtawp kan chhuah ang a kan ti thar leh ang’ a ti a. I veilam ami te an sorkar lai khan vaibelchhe 24 vel kha an seng ral hman a ni, a tam khawp mai.

“Zoram thatna turin Zoram hian power hi kan mamawh si a chuvangin maimachhing in, zak chung pawhin hei hi chu kan puitlin tur a ni” a ti a, kan hotu pa ber hovin 14th January 2011 kan han tharthawh leh tan ta a, mi

tam tak chuan, ‘engtinnge an tih ang aw’! tiin ringhlel chungin an lo thlir a ni. Ama’rawhchu, thahnemngaihna tak tak karah chuan tih theih loh tak tak hi a lo awm lova, tichuan, vaibelchhe 913 in bul kan han tan tha leh a ni a, tun atanga reilo te ah hawn theih mai tura hmalakna hi lawmawm ka ti a ni.

Tin, Mizo te hian kum puan hi kan nei thin a, Mautam kum tih te kum zabi thar chho pheih kha chu compensation a kan thanharh kum niin ka hria. Compensation kha a nasa khawp mai a, tun thlenga kan buaina hi ani chhonzawm ta a ni. Tuirial compensation kan han tihchingpen in a hrin tha lo deuh mai chu Tuivai mega watt 210 ruahmanna awm sa te, Tuirini tih pawh kha ruahman na awm sa, a hmaa kan lo pal hnawh tawh avang khan tan thei lovin hun eng emaw chen kan han awm leh kha a ni a, a pawh khawp mai. Tin, Pathian zarah Tuirial hi kan han zo ang a, chutah chuan mega watt engemaw zat kan han ti chhuak ang a, 12% chiah kha Mizoram ta tur ani leh nghal a ni, 12% chauh kha Mizoram in kan chan tur kha a ni a, a dang zawng erawh kha chu company in keimahnia a hralh leh chhawn tur. Engati nge 12% chauh in chan an ti mai thei a, compensation kan lo pek uchuak lutuk kha kan rull leh vek a ngai a ni, hei hi a pawh lutuk . Engpawhnise in pute kih hnawh kan sawi a nih hi (interruption) in pal hnawh kha in sawi em? Hemi hi Assembly zawhna leh chhanna atanga ka rawn lak vek a ni, in sawisel miah lo, Assembly chhanna vek a ni hei hi. Naktukah in duh chuan a copy ka rawn keng thei ang. In duh tawh in sawi ang a, kan sawi zel ang e.

Engpawhnise, ka sawi loh tur kan sawi tel ang a, khawvel a bandh rei ber in nih kha chu in hai lovang. Chief Minister nau ngatin a kaihhruai, compensation pawh thingrem 4 a an ken pheih, thingrem 3 khat an hawn leh thleng khan ka sawi mai tur a nia. Engpawhnise, Pu Speaker, khalai kha chu ka sawi zel lovang a. Chhonzawm tlak tawh lo ang khawpa an lo kalsan tawh hetiangana kan Chief Minister zahawm takin ram ro atan a rawn siam chhuak leh kan Governor in a rawn puang chhuak hi a ropui ka ti a. He hmalakna thar avang hian thangtharte hian tunge ni fak tur tih hi chu an hre tur a ni, kha kha kan sawi tel duh a ni.

Tin, Pu Speaker, lawmawm leh deuh mai chu Referral hi a ni a. Anni khan MIMER chu sawi duh lo ila an ti a, sawi thawi deuh ang reng si, kan sorkar in a tih chhiat em em mai ang khan an rawn chhuah lek lek mai a. Khum 500 awm tur khum 50

vela han chhuah te pawh kha pawl tak a ni. Shillong-a NEIGHRIMS nen khuan a rual vela kal kha a ni a, anni chu kan pan hut hut tawh mai. Keini erawh chuan ar inah te kan chhuah mai mai a. Vaibelchhe 40.53 kan hmang a, chutah chuan, “in puitlin dawn lo tak ngial e” min ti a, vaibelchhe 35.53 min pe leh a. An sen zawng zawng kha vaibelchhe 76.06 a ni a. Chutah chuan an va endik a, chuta an va endik naah chuan damlo 17 an lo ruai chawp a. X-ray khawl pakhat chiaah a awm a, technician a awm lo lehngal a. Khawl awmchhun pawh enkawltu awm lo.

SPEAKER : Ngawi rawh aw, dar 1 a ri dawn a, a ri tawh a. I sawi zawh tir law law ang aw? A hun kha in lak sak teuh tawh si a, sawi leh tawh rawh le.

Pu T.T.ZOTHANSANGA : Pu Speaker, ka sawi tam lovang, point chu ka ngah mai a, mahse anni anga a hun lo thleng thleng han tawlh chi chu ka ni lem si lo va. Engpawhnise, damlo lem te kha a tukah an haw leh mai a. Khatiang khawpa Referral Hospital hlawhchhama kan lokal pui tawh, tunah a aia changtlung zawk Medical College level-a hlankai tum a hma kan han la hi ropui ka ti a. Mizoram history-ah hian, sorkar hmasa ten an lo tih tawh chhunzawm duh loh hi a lar em em thin a. An chhunzawm duh loh avangin ram ro hi kan chan a ni an ti thin. Amaherawhchu keini erawh chuan a tawh tura ngaih Tuirial kan chhunzawm a, Referral Hospital kan chhunzawm bawk a. Chhunzawm tur dang hi a tam lutuk. Chuvang chuan vawiin a kan Governor thusawi hi a lawmawm hle in ka hria.

Company ah te thlengin hralh an tum te kha a ni a, biak te pawh an han nei ruau ruau a. Tin, nichinah member zahawm tak Pu Ruatkiman NLUP hlawhtlinna hmuh tur a vang a tih te kha chu thingtlangah a kal ngai lo emaw ni chu aw ka ti a. Thingtlang bialtu kan ni a, keini chuan kan hmu a, kan ran te khi kan hung seng lo a ni. Tin, link road te pawh kha, a “chhe leh mai zel a,” an ti a. A chhe leh kha chu kan siam zel ang a, bamboo link road tih te pawh tihah chuan hmuh tur a awm tawh hlei nem maw le! Vawiinah hian kan member zahawm tak te hian thil tha tam tak an hria a, an sorkar ve hunah han ti mai se han ti dawn ila, an sorkar mai hmel dawn si lo va. Chuvang chuan lawmthu sawi ve mai kha an tan hian tha in ka hria. Member zahawm tak Pu Beichhua phei chu Doctor a ni a, kan indaih bawk si lo va, Champhai-a awmah hian ka awt khawp a. Engpawhnise, Pu Speaker, vawiinah hian kan Governor thusawi hi a lawmawm ka ti a, karawn support a ni e, ka lawm e.

SPEAKER : Awle, tunah chuan kan chawl rih ang a, dar 2-ah kan lut eh dawn nia.

2:00 Pm

SPEAKER : I thu ang ule. Pu Hmingdailova Khiangte hian House-a awm loh phalna a dil a, kan phalsak a ni tih House-in min hriatpui sela ka'n puang e.

Awle, sawihona kha kan tan leh tawh ang a, tunge sawi leh ang? Pu R.L Pianmawia.

Pu R. L. PIANMAWIA : Pu Speaker, ka lawm e. Kan Governor thusawia lawmthu sawina hun tha tak mai kan nei thei a, a lawmawm hle in ka hria a. A thuhma atang khan mitin tana thil lawmawm tak a rawn lang nghal in ka hria a. Mizoram mipui te leh keimahni member te mai bakah House ngaina taka a rawn sawina tawngkam mawi tak takte kan hmu a.

Tin, ram chhung hmasawna tluantling leh nghet kan neih theih na atana sorkar hmalakna pawimawh tak takte a rawn sawi a, a lawmawm hle in ka hria a. Heng hmasawna hrang hrang kan neih theih na atana he sorkar hmalakna hi a tak ram a ni tih hi a lang nasa em em a ni tih ka hria a. Kan hotu tam tak te hnathawh zinga pawimawh tak sawilan ngai chu hna kan thawk tam a ni tih a lang bawk a, 'a hawng, a hawng,' tih kha a ni vek mai a, hawn hna hi kan thawk a ni ber mai a. Hetiang hawn hna thawk thei, hawn tur a awm hi chuan hna kan thawk tam a ni tih kha a chiang mai a. Chuvang chuan thawh zawh tawh, ka bial ah pheh chuan hawng ve duh pheh ilang chuan hawn tur hi an tam ve tawh khawp a, hmarthimpui kan tih thin ah pawh. Kan chapo lo hrim hrim a, chuvang chuan kan hawng mualpho lo mai mai a, kan hawng lo mai mai zawk a ni. Insum tak chungin chu chu ka'n sawilang ve mai mai a.

NLUP hi kan thiante khan kan tangkaipui leh tangkaipui loh na kha an thlir thiam lo hle in ka hria a. Keini bial rethei deuh chuan a tira hmalakna tur, a trade turah pawh hmunphiah thlan vek tur kan han ti tawp mai a. Chumi avang chuan kan kuthnathawktute pawhin hma an la in kan hlawkpui hle a ni. Tun kum pawisa duh ang a hman theih loh a ni chung khan, khaw hnih entirna tur ka'n sawi ang a, North Tinghmun -ah ringawt hian kumin ah hmunphiah atang hian tualchhung ah tualchhung ami in an hralh na pawisa an tel hi nuai 25 (sawmhnih

panga) a tling a. Tin, Vaitin hian an khaw chung ringawta an hralh na hi nuai 43 (sawmli pathum) a tling a ni. Hei hi han ngaihnep mai chi chu a ni lo in ka hria a. Hetiang hi a hmu neptute khan min pe thei dawn a nih chuan pawl ka ti lova, a ropui tawh hle in ka hria . Khua zawng zawng atangin la khawm pheila chuan kan bial atanga NLUP hlawhtlinna kan tel kumin mai ah pawh hian a chhuanawm tham ve hle a ni tih ka'n sawi duh a.

Tin, Link-road lamah te hma min lak chhoh sak hi a lawmawm hle a, an la tih leh zel tur chungchang te pawh tarlan a ni a, hmabak kan la ngah a. Tin, a thlamuan thlakna thu hi kan Governor thusawi ah hian rawn tel sela, kan House Leader-in 'a tul apiang chu kan lai ang' a tih te kha rawn sawilang tel se a tha tur a nia. Link-road mamawh apiangte laih sakna tur thu ropui tak mai kha opposition lam pawh khan lo bye-heart ula a tha in ka hria. A thailan loh lam kha Pu Rinawma'n a vei bawh a, a thailan loh lamp te pawh hi ka'n vei ve deuh hlek a ni. Tin, helaia tarlan lem loh Darlawn-ah Multi Sports Complex an buaipui mup mup reng bawh a, khingte pawh khi a rawn thailang lova, rawn thailang sela tha tur a nia. Heng lo pawh hi heta thailan loh sawi dawn chuan hun kan hmang hnem lutuk ang tih a hlauhawm a.

Tin, gas chungchangah te pawh kan nau te an inhlawh ve thin a, hralhna tur hre lo hian an phur kual an phur kual mai a, a manganthlak khawp mai a. Chhun en ah pawh hralh zawhna an hre lova, zanah te an lo haw phah a. Chutiang khawp chuan gas chungchangah pawh hian kan awlsam a ni tih a hriat a.

Tin, Aizawl khawpui chhunga tui harsatna awm lo tawpa awm thei tura hmalakna avanga hetiang dinhmuna kan lo ding ta mai leh mipui chan tur pawh a thlaphanawm thin teh reng nen tunah chuan a thlaphanawm loh zia hriat nan chuan kangmei chhuah thut pawha veng hrang hranga herh chhuah mai theihna tur engkim ruahmana peih fel ani ta mai te hi sawilan loh zingah chuan sawilan tlak niin ka hria a, sawilan a chakawm in ka hria a, a lawmawm hlein ka hria a ni.

Tin, zirna lamah pawh hmasawmna nasa tak a kal a, keini bial ah pawh zirna kawngah kan sorkar hian hma ala nasa em em mai a. RMSA High School ringawt pawh hi panga (5) kan neih tawh bakah tunah hian Mauchar ah min han pe leh bawh a. Mauchar - in an han nei thei te pheila chuan ropui tak a ni.

Tin, sorkar building tam tak sak a ni ta hi a lawmawm hle in ka hria a. Tun hma kha chuan sorkar building sak tuma ministry in tan an han lak deuh pawh khan building neitu hoten a changtu Minister te kha be thiam in sorkar building sak loh dan kha an ngaihtuahpui a, an sak chuan an inluah man kha an tel thei dawn si lo a. Tunah chuan chutiang ni tawh lovin, Department hrang hrang changtu Minister ten mahni Department building sakna tur dal khawpa biak thiamna kha an hnawl ngam a. Chuvang chuan sorkar building hrang hrang kan lo neih phah ta teuh mai pawh hi a lawmawm ka ti hle a.

Tin, Kelkang Water Supply Scheme te pawh hi ni zung chakna hmanga tih niin ka hria a, a lawmawm hle mai a. Heta a rawn sawi tel loh Sawleng hi ni zung chakna hmanga tih tur a ni tih te pawh kha rawn tarlang tel sela a lawmawm tur a nia. A tih tawh chauh hi a rawn sawi a, la tih hmabak a awm a ni tih pawh kha Sawleng in kan la nghak reng a ni tih pawh kha ka'n sawilang duh hrim hrim a.

Tin, enchhinna khawl lam hi kan tlachham em em a, tunah chuan hnathawk theiin State Drug Testing Laboratory for Quality Control Drugs at Zemabawk kan lo nei ta a. Hetiang kan nei ve ta pawh hi a lawmawm hle in ka hria a. Damdawi in tha pawh nei mah ila, changkang viau mah ila, a that leh that loh test na lam kan neih loh chuan a famkim lo thin a. Chuvang chuan hei hi thil lawmawm tak kan Governor thusawi atanga ka'n lak chhuah ve duh hrim hrim a ni a. Tin, HPCD nena inbiakna thu lawmawm tak a rawn sawi chhuak hi, keini tan chuan a lawmawm leh zual a. Keini a concern biala awm te tan chuan thil namailo a ni a, ralmuang lovin kan awm a, kan campaign pawh an lo kidnap dawn che u an tih chuan hmanhmawh deuhin kan tlan haw a, min lo chhuah khalth hman loh tum te kan han ngaihtuah a, hlimna nasa tak min pe a ni tih kan sawi duh a. Tin, inbiak na tha tak kan nei a ni. Tin, HPCD pawhin kan Home Minister thusawi, silai an lak te, dah tura a ngenna pawh an rawn ti hlawhtling duh a, chuvang chuan sorkar lam leh HPCD lam te pawh hi an fakawm ve ve a ni. Chuvang chuan inremna hmawr bawh thei tura thu kan han hmu te hi a ropui ka ti a, a lawmawm dan hi lawmawm tak a ni. A hre phalo tan chuan ralkhat atanga hriat chuan engmah vakah an ngailo mai thei a, amaherawhchu keini tan chuan vanram kai tur ang deuha insawi theih a ni a. Hlimawm tak a ni,

phurawm tak, hriat nuam tak a ni. Chuvangin hetiang thu tha tam tak a sawi zingah HPCD nena sorkar inbiakna chungchang hmawrbawkw thuai tur anga a rawn sawi te kha a lawmawm ka ti tak meuh meuh a ni. Pu Speaker, ka lawm e.

SPEAKER : Pu John Siamkunga kha a phar hmasa.

Pu JOHN SIAMKUNGA : Pu Speaker, ka lawm e. Vawiinah kan Governor zahawm tak thusawi chungchanga Motion of Thanks kan sawi ho mek ah hian, ram tana pawimawh tak tak te rawn tarlan a ni in, kan hmalakna tlemte rawn sawichhuah a ni a. Kan Governor-in a tawp lama a sawi ah pawh ‘A brief achievement for the government’ a ti a. Heng ah hian a sawi vek seng lo a ni tih kan hriat pawh a tha in ka hria a. Chuvangin, sawi loh tam tak karah tlem te a rawn sawi a ni.

Ram hmasawn na atana pawimawh ber mai, remna leh muanna, Law & Order tha taka kenkawhna sorkar hnuai ah kan awm a. Chumi a nih avang chuan hmasawna ruhrel leh hmasawna lamtluang kan zawh dan te, vawiinah House chungah sawi thei a kan awm te hi a ropui tak zet in ka hria a. Hun te a tawi avangin kan sawi deuh zung zung mai ang a. I veilam ami ten NLUP hlawhtlinna a lang chiang lo ve an rawn tih te kan hria a, kum dangah khan kan sawi tawh thin a, kan hlawhtlinna hi vawiina kan pek, naktuka a hlawkna tel te an awm a. Vawiina kan pek thla leh mai a a hlawkna tel te an awm bawkw a. Tin, thenkhat chu kumkhat hnu ah te, thenkhat chu kum nga hnu ah te, thenkhat chu kum sarieh hnuah te a ni dawn a ni. Khami a nih avang khan vawiin ah hian statistic dik tak NLUP hnuai ah kan la la theilo a, chutichung chuan vawiin niah hian hlawhtling an tam em em a. Petty trade-ah phei chuan hlawhtling hi an tam em em a ni.

Luhmehna dawr hawng te, beauty parlor hawng te, tyre retread te, a tam a ni, Aizawlah pawh hmuh mai theih a tam em em a ni. Thingtlang lam ni se, serthlum a ni emaw, lakhuihthei a ni emaw, thil dang dang ah hian hlawhtlinna kan hmu hnem em em a. WRC 1, WRC 2 te, 3 te thlengin nasa takin hmasawna hi a awm a ni. Chuvangin helai ah hian rawn sawi tlem mahse, tam tak a awm a ni, tih kha nichinah ka rawn sawi tawh kha. Chutih lai karah chua, kan sorkar in hma a lakna ah permanent farming lam kan uar dan te a rawn sawi chhuak a. Tin, National Food Security Mission hnuai ah, District 8 ah hian, buh leh bal lama kan thar chhuah hlawkna turin tunah hian hma lak

chhoh a nih dan te, kan hmalakna hrang hrang a rawn sawi chho zel a ni tih kan hriat a pawimawh a.

Tin, kan sorkar hian thalaite hmakhua hi a ngai tak zet a, helaiiah pawh hian tam tak a rawn sawi theilo a ni kan Governor hian. Infiamna lama kan sorkar- in hma a lak nasat zia te, infiamna lama thalai a promote hnem zia te; chubakah craftment training ah te, UPSC exam ah kum tin a hna 800 vel awm ziah ah te pawh zirlaite tan coaching a hawn dan te, Staff Selection hnuaiia clerical exam hrang hrang ah a tam thei ang ber an luhna tura thalai tana hma a lak nasat zia te hi sawi theihngilh chi niin ka hre lova, henga an rawn tar lan hi tlem te mai a ni. He sorkar in hma a lakna tam tak zinga tlem te a rawn tar lang mai a ni tih kha kan hriat a pawimawh in ka hria a.

Tin, kut hnathawktute tana sorkar inpekna lam hi vawiinah hian ngaihthlak tur a tam hle in ka hria a. Kan Governor zahawm takin a thusawi ah hian, kut hnathawktuten pangang kan khawi na lamah te, rubber plantation hmun tam tak ah hectares tam tak tak kan tih te, mahse tun ah a la rah chhuak lo, nakin lawka rah chhuak tur thingpuife kan chinna hmun te, coffee kan chinna te, heng te hi NLUP kan sawi hian kan hre ve zel tur a ni. Thar chhuak har deuh, long term deuh hlek a ni, coffee te chu a rah kan la hmu mai dawn lo, nakin deuh a ni, khang te kha kan hriat a pawimawh a. Kut hnathawktute hian theihtawp in NLUP hnuaiiah hian he sorkar chak tak hian hma an la mek a ni tih kan hriat a pawimawh in ka hria. Tin, kan sorkar hian kawng tinrenga hmasawn a tum a, faina lamah pawh hma a la nasa a ni. A dik tak chuan kan thalai te pawh tun ah chuan an fai tulh tulh a, zuk leh hmuam lamah te an fihlim tam tial tial a. Tin, Aizawl, Champhai, Lunglei te hi Open Defecation Free-ah puan an lo ni ta te hi kan changkan tawh zia lantirna a ni. Kum 20/30 kan thlir kir chuan daikal in pawh nei mang lo kan ni, tun ah erawh chuan heng khawpui lian tak tak pathum ah te chuan, inthiarna changkang tak tak kan nei vek tawh. Chung ah te chuan a ni tangkai taka kan hman tawh ni tih te kha a hriat a ni.

Tin, mipuiten kan mamwh em em buhfai lamah pawh nasa takin he sorkar hian hma a la, tun ah chuan buhfai harsatna emaw, kan mipui ten buhfai kan khamlo tih lam hi an sawi kan hre ngai ta lo te hi he sorkar chak zia leh mipuite hma khua ngaia a thawh zia a langin ka hria a. Food security hnuaiiah kg 5 Rs 3 in an lei thei a, kg 3 dang hi he sorkar chak tak hian 'kg 5 an kham lo, kg 8 tal ni rawh se,' tiin, sum tam tak sengin a

subsidize sak a ni. Heng te hi mipui tana a thawh na, vawiina Governor speech-a lo lang te a ni a, a ropui hle in ka hria, vawiina a sawi hman loh, tlem te a sawi zinga tel lo te pawh kha kan sawi lan fo a ngai thin a ni tih kan hriat a tha a.

Tin, gas hi kan mamawh, kan essential needs, immediate needs tak tak a ni. Chung ah te pawh he sorkar in theihtawp a chhuah zia te kan hmu a, Mualkhang bottle plan pawh upgrade tum a ni a, 5 mega tons capacity a upgrade tur a ni. Chu chuan mipuite mar dek chung leh mipui te hmakhua ngai chungin he sorkar in kawng tinrenga an nitin mamawh lama a tlan nasat zia kha kan Governor thusawi ah hian a rawn langin ka hria.

Chutih rualin khawvel thang zel ah eng kan neih that a ngai,electric tel loin kan nung thei tawh lo, chu chu he sorkar hian a hre chiang, chumi anih avang chuan theihtawpin hma a la a, a tang a, 2017 March thla thleng keimahni in kan siam chhuah ve hi 29.5 MW lai a ni tih kan Governor zahawm takin a rawn tarlang. He sorkar zet hi chuan mipuite tan a thim a var pawh thlu lo in hmun dang ami eng lalut reng lova kan awm theih dan hi a dap hle a ni tih Governor speech-ah hian a lang. Chumai la ni lovin, Tuirial Hydel Project pawh 60 MW awm thei mai turin tunah an buatsaih titih tawh a, nakum lamah chuan kan hawng thei tawh tur ah te kan han ngai a. Hman deuh lawk khan keini pawh kan zu kala, hmun tin kan fang a, a ropui a ni. Hman atang khan hmangaih takin lo enkawl ilang khung te khu kan hmang tangkai tawh tur. Mahse tun ah chuan hman tangkai theih la ni lo mahse he sorkar hian hman tangkai theih turin a siam thuai dawn a ni tih kan hriat a pawimawh a. Tin, Tuivai hydro electric 210 mega watt pe chhuak thei te, Tuirini 24 mega watt pechhuak thei te kha kan hriat a tha in ka hria. Tin, member zahawm tak ten Mini Hydel project lam hi engatinge an tarlan tawh loh ? HEP an ti tih ah khan, a capacity atang khan Mini leh Mini lo chu a lang mai a. Chuvangin a speech ah khan mini a telh kher a ngai lo. 5 mega watt te a nih chuan a te a ni a, mini a ni tih kan hriat mai kha a tha in a lang.

Tin, tui thianghlim in tur kan neih a ngai. Khua leh tui ten sorkar-a kan beisei te tihhlawhtlin tumin he sorkar in a beih nasat zia, tui thianghlim in tur kan neih na atana tan a khawh nasat zia leh khua leh tui tha te tana tui in tur min pek nasat zia te pawh hi kan theihnghilh tur a ni lo. Helai ah hian kan Governor hian chiang em em in a sawi a, tui thianghlim kan in theihna tur atana hmalakna kal tawh mai bakah la kal mek

te pawh kha chiang em em in a sawi a ni. Chuvangin tui te, electric te, gas te, mipuiin kan mamawh tak tak te kan Governor hian a rawn sawi lang a. Hei hi he sorkar chak takin hma a lakna a ni a, lawmawm hle in ka hria.

Tin, motor kawng kan sawi thin a, communication a that loh chuan ram a changkang thei thin lo. Chu chu he sorkar hian a hre khawp mai. Chumi a nih avang chuan kawng 1326 km laia thui hi a lai zo tawh a ni. Kan ram hi google ah te han en thin ula, zawl a vang em em a. Kan zawng nasa a ni, zawl hi, amaherawhchu zawl hmuh tur a awmlo. Khaw te reuhte khel mual ang lek pawh hi zawl hmuh tur hi a vang a ni. Mahse chui chung chuan he sorkar hian awih pang kar ah kawng a zawng a, monsoon area ruahtui tamna ram kan ni chung hian a theihtawp hi chu a chhuah tak meuh a ni. Kawng tam tak kan black top tawh a, kan black top mek a, kan la black top zel dawn a ni. Laih pawh kan lai a, kan lai zel dawn baw. Chuvangin he sorkar chak tak hian inkal pawhna hi hnam thanna inngahna a ni tih hi a hrechiang. Chu chu kan Governor zahawm takin a rawn sawi lang hi a ropui hle in ka hria.

Tin, mipui vantlang hriselna lamah hi kan hrisel loh chuan khawi hmun mah hi a nuam thei lo. Chu chu he sorkar hian a hria a, chumi a nih avang chuan nasa takin tan kan la a, tunah pawh Medical College din turin nasa takin hma a la. Mi hrisel lo te te te kan ni a, phai lama kal thei lo te kan han in en ngawih ngawih te hi he sorkar hian a hrechiang. Chumi a nih avang chuan he lama hma kan sawn theihna tur in Cancer Hospital te pawh upgrade tur a ni a. Tin, cancer hem na cobalt therapy te pawh a natna lai te mai hem lova a bul vel hem thina kha simulator hmang in tunah chuan a natna lai chiah hem theih in an dah tawh a. Radiologist te pawh a nghet lova an lo dah thin te pawh mipui hmakhua ngaiin a nghet in an pahnih in an dah tawh a ni. Chutiang zel chuan hriselna lamah hian kan sawi seng lovang. Nurse lam a ni emaw, doctor lam a ni emaw, damdawiin lam a ni emaw, heng ah te hian kan hmalak nasat dan tlemazawng kan Governor hian a rawn tarlang a. A sawi dan takin, tlem azawng hmasawna a tih ang khan a zavaiin sawi dawn ila sawi sen niin a lang lo a ni.

Tin, kan sorkar hian Local Self Government hi a ngaihsak a ni. Kan Governor thusawi ah hian a chiang khawp mai. Chuvangin Mizoram Finance Commission Report sorkar-in a pawm tak kan han thlir chuan Village Council te, Local Council te leh khatiang ho tan khan State own Tax Revenue atangin 15 % kan pe dawn a

ni. Thingtlang kilkhawr ber thlenga VC te pawh he sorkar hian umi atan chuan a dah a ni. Chuvangin vawiin ah VC tam tak te an thla a phang, mahse he sorkar hnuaiah hian thlaphan tur a nilo tih kan Governor speech atang hian a chiang em em a ni.

Tin, hmasawwna dik tak nei tur chuan statistic tha kan neih a ngai tih kha mi tam tak in an sawi thin a, hetiang ti tur hian Economic and Statistic Department in nasa takin hma a la tih kan hria a. BPL pawh anmahni statistic department hian a figure dik tak thawhchhuah tumin hma an la a, figure dik tak kan neih chuan chumi base chuan hmasawwna hna kan thawk ang a, BPL mai nilovin thil dang dang ah pawh chumi hmang chuan thanna dik tak kan nei thei ang tih hi he sorkar hian a hria a. Chuvangin a hman tangkai turte hman tangkai atan a pawimawh a ni tih kha hriat atan a pawimawh a.

Pu Speaker, a tawp bera ka sawi duh chu he sorkar hian hmasawwna ruhrel kan khawihna ah hian a sorkar hnathawk te, a tana theihtawp chhuah tute hi a theihngilh reng reng lo tih hi kan hriat a tha in ka hria a. Kan Governor speech ah hian chiang em em in a lo lang.S hnathawk te tan Dearness Allowances a pek dan atang hian kan sorkar hnathawk te he sorkar in a hmangaih zia alo lang a ni. Chuvangin 113 % atang khan 119 % Dearness Allowance hi 1st April, 2016 atang khan tih pun a ni. Chumi hnu 1st September, 2016 khan 119 % atangin 125 % ah a ti chho leh a, chumai chu la nilovin 125 % atang khan 132 %-ah January atang khan a tisang leh. Chuvangin he sorkar hian a tana thawktu te leh a tana theihtawp lo chhuah thin te, ram thanna atana thi leh thau pawlha lo thawk thinte a theihngilh lo bawk a ni tih kha kan hriat a tha a ni. Chuvangin kan Governor Speech hi ngun taka han en hian lawmna tur a tam a. Sawi tur pawh a tam bawk a ni tih ka'n sawi duh a ni e. Ka lawm e.

SPEAKER : Pi Lalawmpuii ilo sawm ang.

Pi VANLALAWMPUII CHAWNGTHU : Pu Speaker, ka lawm e. Chawhma lam khan ka ding lo ang ka ti zet na a, kan sorkar hmalakna ropui tak tak hmuh in han dinchhuah pui ve loh chu ni theiin ka hre lova, chuvang chuan ka rawn ding leh a ni.

A hmasa ber ah chuan NLUP hma lakna thenkhat in kan sawisel a, ka sawi duh chu kan bial khaw pakhata Kuthnathawktute Ni kan hmanna ah MNF pachal hi a rawn ding chhuak a, “NLUP avang hian kei chu Pu Lal Thanhawla leh Congress hi kan chhungkaw min khaiding tu an nih avangin ka damchhung hian ka phatsan dawn lo, MNF chung in,” a ti a. Chuvangin sawi sawi ngai lovin a hlawhtling e, tling lo ve tih lam

ni lo in a chiang a ni tih hi ka rawn sawi chhuak ve duh a NLUP hlawhtlinna tilang chiang em emtu a ni a. Tin, link road chungchang te hi Aizawl tlang atang chuan kan hriatthiam pui lo a ni mai thei a. A chhawr tute han lawm zia leh an tangkaipui zia ringawt te pawh hi hahip in an sawi a ni. Trade dang sawilan tur tam tak awm mahse ka sawi atang hian a chiang tawk viau in ka hria.

PWD-ah Kaladan multi modal transport transit project te kan han ti a, chak takin hma lak a ni a, kan hotute nen pawh Estimate Committee ang khan kan va kal a, chhun zan zawmin thahnemngai takin an thawk a ni. Chutiang chuan ram tana tha turin theihtawp an chhuah a, nichin chawhma lam khan kan hria a, kawng chhe lai deuh te hi ‘Congress kawng’ an ti tihte kha kan hria a, a nih leh kawng tha zawng zawng hi MNF kawng kan ti ve dawn em ni ? tih ka rilru ah khan a lo awm a, a chhe lai zawn na na na chuan thingtlang kilkhawr ber thlalak hrang hrang kan han theh darh a, kawng thalai te pawh hi a tam zawk a ni tihte pawh hi kan hriat a tul in ka hria.

PWD hnathawh hi a ropui a, a department te pawh hi an fakawm ka ti. Tin, tunah thawh mek zel a ni a. India ram khawpui ber Delhi ah pawh kawng zawng zawng khu a tha vek lo reng reng a ni, kan khawpui berah pawh ring road chin te chu a tha em em a, village kan tih ang chi tlema hmawr deuh ang chi te khu kan ram kawng aia chhe tak tak khawpui chhungah khuan a tam em em a. Keini ramah hi chuan kawng zawng zawng thingtlang kilkhawr ber thlenga tha tura kan beisei thin te hi thil harsa tak a ni ve bawk. India ram khawpui ber ah pawh harsa an ti tih ka rawn sawilang ni se. Keinin kan ram chhung kawng zawng zawng hi tha thei ang ber, mam zuar reng tur anga kan ngai te hi a dik famkim lo a ni. Kan budget neih zat kan hria a, churang chuan kan budget ngaihtuah chuan kan ram kawng hi mi state te ai chuan a tha em em a ni.

Tin, PHE-ah te han sawi ila, sawi tur tam tak a awm, tunah hian kan bial chhung ngei ah pawh Biate Water Supply Scheme an thawk mup mup a ni. Chutiang chuan kan hotu dang te pawh hian an bial chhung rawn dinpui duh se chuan water supply scheme hmun hrang hrang ah thawh mup mup leh thawh zawh tawh te pawh tam tak sawi tur awmin ka hria. Khawpui chhung chu sawi ta lo ila. PHE hnathawh ropui tak tak te thingtlang hmun hrang hrang ah kan hmu thin te hi a lawmawm takzet a ni.

Tin, Sports Department phei hi chu an thawk tha lutuk hi ngai ah kan neih deuh tawhin ka hria. Sawi vak ngaihna pawh a awm lo, tun maiah pawh kan bial chhung

ngei East Lungdar-ah pawh nula kum 18 mi Emily Lalruatkimi chu French Open-a khel turin an rawn ti daih mai a ni. Chung chu engvang nge kan tih chuan kan Sports Minister chak tak in hma a lakna avanga hengte hi lo thleng a ni tihte pawh hi lo hre nawn leh ila, hetiang anga Badminton khel pha kan han awm te hi a ropui em em a, chawimawi pawh a phu a ni.

Mahni bial chhung kan sawi lo thei lova, East Lungdar-ah pawh Mini Sports Complex hna tan mek a ni a. Chutiang chuanin North Vanlaiphai-ah te pawh Rural Development kal tlangin, Rural Development Minister te leh Sports Minister te thahnemngaihna in Mini Sports Complex an sa mek a, an thawk mup mup a ni. Hengte hi a ropui em em a, Aizawl khawpui chauh ni lovin thingtlang mi te, harsa zawkte an talent-te phochhuak thei tura kan hotuten thingtlang khaw hmun hrang hranga hna an thawk te hi a ropui em em a. Football tih ang te hi chu sawi pawh a ngai tawh lo zawk a, kan hre hlei hlui a, hlawhtlinna nitin kan hmu zel a ni. An sawi ang khan India ram club lar tak takah hian Mizo inphum lohna hi a awm tawh lo a ni. Hengte hi Sports Deptt. hmalakna ropui tak vang a ni.

A dawt leh ah chuan Home Deptt. kha ka hmaah member zahawm tak Pu Pianmawia'n a rawn sawi tawh a. HPCD nen an inbiakna te hetiang a hlawhtling tur hmel kan han hmute a lawmawm em em a. Hetiang ang a hnathawh ropui Home Deptt. atanga kan hmu te, minister chak tak leh huaisen tak kan neite hi a ropui. Niminpih lawkah pawh Bru hel ho vangin Kanhmun daih harsatna kan tawh leh a, hengte pawh hi kan Home minister chak tak hian a tudai leh vat ang tih ka ring bawh a ni. Chutih rual chuan, hmeichhe police hi min laksak thei se tih kan Home Minister hi ka'n ngen duh a. Mizoramah hmeichhe police kan nei tlem em em a, chuvang chuan, a battalion a theih kher lo a nih pawhin hmeichhe police hi min laksak ve thei se tih kha helai House kaltlangin ka'n rawn dil nghal a ni.

Tin, P&E chungchang kha kan sawi nasa a. Power chungchangah inchirhthehna tam tak a awm a. Zoram mipuite hian sawi sawi ngai lovin hluihlawn a nih dan zawng zawng kan hre vek tawh, 'party party sawi lovin' kan ti a, vawiinah pawh party party sawi lovin Congress kaihhruai sorkar chuan a rawn sorkar veleh bul a tan chho leh a. Chutiang chuan BJP tan pawh, ZNP tan pawh, MPC tan pawh, MNF tan

pawh nakum maiah he power hi Zoram mipuiin kan chhi thei dawn a. Kan Chief Minister zahawm tak, he Deptt. changtu chungah pawh lawmthu ka sawi a ni.

Sawi tur tam tak awm mahse hunin a daih lova, sorkar hnathawh hmalakna leh hnathawh tawh leh thawh mekte sawi dawn ila nileng zankhuain min daih dawn lova. Ka ngaih pawimawh zual ka rawn sawi ve a ni. Ka lawm e.

SPEAKER : Sawi leh tur kan awm em? Aw, Pu Zawma.

Pu VANLALZAWMA : Pu Speaker, vawiin ah kan Governor zahawm tak thusawi sawihona kan han nei leh thei a, a lawmawm hle in ka hria a. Kan sawi duh dan a inang lo hret kha a ni mai a, amaherawhchu sawi awm tak tak, a sorkar lam ten a rawn buatsaih kan Governor-in a rawn sawi chhuak a. Chutih mek lai chuan i veilam amiten “khalai kha chu a fel tawk lo deuh a ni, a rawn ti mai pawh a” tih kha an han nei a. Sawi tur pawimawh deuha ka ngaih, ka lo ngaihtuah tam tak an rawn sawi tawh a, chuvang chuan kei chuan hun rei tak ka la lovang a.

Tin, i thlir dan a zir leh nichina kan member kalta Pu Zosiaman a ti an tih dan deuh khan thutna lamin a zir loh chuan tihdan hi a inang thei reng reng lo mai a. Kan Minister hlui pakhatin a ti e an tia, “Buaitlak ve deuh mai chu kan thil tih lam sawilo hian kan tih loh lam hi min rawn nawr vek mai a tute pawh hian, kan tih lamte pawh hi rawn sawi ve ula kan tih hian tih loh lam bawk hi an rawn sawi leh thin a” an tih ang deuh khan thutna a zir khan ngaihtuah dan leh thlir dan a inang lo thei a. Helaia Governor sawi awma ngaih lak khawm kan Governor-in a rawn sawi a, ‘kha kha a dik lo e a fel tawk lo e’ tih engemaw hlek chu thudang ni se, keini lama lo hnawl vak hleihtheih pawh a ni lova. Keini aia fng leh fel zawk ten helai House zahawm taka Governor sawi awma an rawn tarchhuah tawh kha kan sawiho a ni ber mai a.

Chutih mek lai erawh chuan, ka rilrua lo awm pakhat, helaia lang lo te pawh kha kan mover-te leh midangte pawh khan an sawi a, sawi lan ve lawk ka duh chu rampum huapa ka lo ngaihtuaha lawm em emna pakhat ka neih chu, nikum November thla khan, ram pumpui atan demonitisation an ti a, cheng 500 note leh cheng 1000 note tih thih thut a ni a. Khami chungchangah a ram pum, a state pum ang hian Mizoram hi a buai lo ber kan ni mai awm mang e aw ka ti a, a lawmawm ve reng rengin ka hria a, vawiinah sawi chhuah ka duh a ni. Lehkhatiam kan tam vang te nge ni, kan thingtlang kilkhawr deuhah te pawh remsiam dan te an lo hre ve leh zel a, a note lian a thih pawhin,

khatiang khan anmahni leh anmahni an lo in tanpui tawn lai vel boruak hi wawiinah hian sawi chhuah ve hrim hrim ka duh a. Kan ram tan hian Mizo mipuite kan chhuanawm ka ti a, sorkar lam a ni emaw, opposition lam a ni emaw tute mah fak leh sawisel lam ni lovin. He harsatna lo awm Zoram mipuiten kan hmachhawn a kan paltlang dan hi a ropui ka ti a, wawiina Governor thusawi sawihona ni ah hian record-a awm atan Pu Speaker, han sawi lan ve hrim hrim ka duh a ni. Chu chu ka point hmasaah ka'n sawi lang ni sela.

Tichuan, hetia han en vang vang hian kan point tam ber hi state project pawh ni chiah lo, central project atanga thil lo kal zel, engemaw chena kan lo involve ve na, kan lo enpui ve te chu a awm a, kha kha a ni tam khawp mai a. Chutih mek laiin, central project lo kal chho pawh a tha tho a, a lawmawm tho a, kawng thenkhatah erawh chuan a monitoring hi kan lo ti tha tawk lo deuh emaw ni chu aw tih tur hi a tamin ka hria a.

Thil pakhat kan sawi fo tawh, helai House-ah pawh, kan thlang lawka Buichali concrete leihlawn an dawh te pawh khu khulam atanga rawn tih angin kan ngai thin a. Engpawhnisela, kan lo enpui that tawk loh vanga tun thlenga khutia ding tawl ta rih te khu lehlamah chuan uihawm angreng deuh mai ania. Khungte pawh khu chak zawka nawr kal leh dan hi a awm lawm ni aw! tih te ka ngaihtuah a. Member zahawm tak Pu Ruatkima'n petrol pump a neih pawh khu petrol leh diesel lak tur kha a awm hleithei lova, a chhan chu khulai leihlawn ah khuan tanker a kal hleithei lova chuvangin duh ang in kan nei hleithei lo tih kha hmannah a sawi a. Chuvangin, khung leihlawn te khu a pawimawh em em a, a lehlam zawnga ngaihtuah chuan khulam atanga an rawn tih a ni a, contractor-te pawh an thlang kan ti a, a dik tho a ni. Mahse, lo enpui leh lo supervise kha Mizoram PWD mawh a ni a, engatinge a hunlai in kan lo tih that loh ? A foundation a tha lo an ti a, tunah khuan khuti khuan a la ding ta a ni a. Chungte chu example-ah ka'n sawi duh a ni.

Tin, rail kawng te pawh a lawmawm em em a, amaherawhchu, engemaw zawnga ngaihtuah chuan keimahni thu ve lem lohna, khulam atanga an rawn tih a ni a. Helai kan Governor thusawi point tam tak hi khatiang kha a awm a ni. Champhai North bialtuin a rawn sawi, Zokhawthar chhak lam chungchangte pawh kha a lawmawm khawp mai a. Amaherawhchu, khangte pawh kha kan state project pawh ni chiah lo, chutiang zel chuan, Kaladan Multi Modal Project te pawh saw House zahawm taka Pu Speaker

ka'n sawi lan duh chu Mizoram chin saw chu saw ti sawn kan ti chhuak tha viau a. Amaherawhchu, Mizoram piah chiah saw km 100 bawr velah sawn road project, contractor pawh an la thlan loh hi a awm a ni. Kan member zahawm tak, kan Chairman, Pu Rina hovin, Pi Awpi te ho nen, Pu Vena te nen kan han tlawh pawh khan, Burma lamah chuan lo buaipui vak duh suh u an ti a, India Ambassador ten. Mahse, tun thlengin kha hna kha a thawktu tur an la thlang lo a ni. Mizoram pelh chiah, ramri piah lam road project la awm saw. Sawngte pawh saw kan sorkar hian ngaih pawimawha neih a, bawh chak deuh hi a tha khawpin ka hria a. Mahni bengvar varin hmanni deuhah Delhi-a ka kalin an Joint Secretary ka'n hmu ve hlawl a, chu nu pawh chuan, 'nakum kumtirah chuan kan thlan fel theih ka ring,' a la ti det det chauh a ni, a contractor tur kha. Chu chu sawlai project hlawhtlinna tak tak tur chu kan ram pawnah sawn a awm a, amaherawhchu, kan nawr chuan awmze neiin a kal thei a ni tih he House zahawm takah hian ka'n sawi lang duh a.

Tin, kan hlawhtlinna tam tak kan sawi kha a lawmawm em em laiin sorkar hlawhtlinna a ni e kan ti a, a dik tho a, chutihmeklai chuan, heng I League kan han khel chho ve te pawh hi a lawmawm ka ti a, sorkar hnathawh a nih rualin mimal chungah te pawh lawmthu sawi a dikin ka hria a. Mimal takin han sawi ta ila, Pu Robert Romawia Royte, kan mi pawimawh tak leh helaia kan hriatlar vek inpekna leh mimal anga a thahnemngaihna te pawh hi vawiinah he House-ah hian sawi rik a pawilo in ka hria a, ka'n sawi ri duh a.

Kan hriat theuh ang leh, hetah pawh kan sawi rik tawh angin, team tha pui pui an lo kal a, exhibitin match mai ni lo, point 3 hmuh tumin an han inkhel ngar ngar mai te hi chu pui tak a ni, point hmuh ngei ngei tumin, point khat mai pawh ni lo, point 3 hmu ngei tura tang tak maia an han khel, chutah kan Aizawl Football Club ten an lo dang char a, point 3 an lo chhuhsak ang chi te hi a ropui lutuk a, Mizoram history atan hian a chhuanawma. Governor thusawiah te khan kan sawi kai bawk a member tam takin, chu chu ka'n sawi lang ve duh a.

Tin, thil pakhat ka sawi leh duh chu Pu Speaker, i hova nikuma Agartala-a kan kal tum khan, Agartala a Lord Port Station kan tlawh kha, khatiang chiah kha Tlabunga dah tur hi a ni tih kha vanneihthlak deuhin khami tum khan Lord Port Authority-a an hotupa bulah ka thu fuh hlah a, IAS senior a ni a. Tlabung pawh saw

thlan a ni tawh, hetiang chiah tur hian tih kha min hrilh a ni. Khangte pawh kha chak leh zuala um ni ta sela, Tlabung saw Agartala-a an tih ang chiah a sumdawna atana awmze neia kaltlang tur a ni a, Station ropui deuh siam tur a ni a, saw'ng te pawh saw bawhzui chak a tha khawp mai a. Tin, Zokhawthar te chu kan hriat sa vek a ni a, theihtawpin hman la mek a, heng te pawh hi ngaih pawimawh a tul a. Tin nichina kan sawi tak, Chhimituipui lam project te pawh kha chak leh zuala hmalak ni ta se tih kha ka'n sawilang tel duh a. Chutihlaichuan hei thil thenkhatah hian tlema han sawi ve chak deuh ka neih chu, gas te pawh a awlsam ta a, a lawmawm khawp mai a, a harsat vanglai te kha chuan sorkar mawh a nilo tih ang zawngte khan kan sawi ang lawi a, an awl tak viau hi chuan kan thil tihthat ah te hian kan sawi leh bawk a, a dik ve tho a, a lawmawm em em mai a, mahse hei hi chu nichina sawi ang khan thil chu a hun leh hmun azira kan sawi duh dan hi adang deuh mai mai te pawh chu a ni awm mang e aw. A harsat vanglai kha chuan kan in thiar fihlim lek lek kha chuan a lang a, amaherawhchu hei tunah alo awlsam ta te pawh a lawmawm em em a, sawrkar hmalakna kan ti a nih pawhin a lawmawm tho a, engpawhnisela, khati zawng khan ngaihtuahna hman ta ila a tha in ka ring a.

Tin, ka thu tawpna atan Pu Speaker, ka rilrua lo awm fo chu hetia kan debate lai hian, a chang hi chuan kan ti lutuk deuh lawm maw ni, Upa in a “mahni infak leh sakhi ngalah engmah a bet lo” an tih hi ka rilru-ah alo lang leh thin a, chutiang vel te pawh ka ngaihtuah mai mai thin a. Chutihmeklai chuan heti laiah Governor thusawi point tam tak kan tlar theih lai hian hmanni thla tir te khan party programme Lungleiah ka va kal a. Kan Sub – headquarter hruaitute chuan helai point kan ziah aia tam daih mai hi orkar tih awm tak an tih loh, sorkar fel tawk loh na lai hi an lo tlar ve teuh mai a, a copy te pawh whatsapp-in min lo thawn nghe nghe a ni. Engpawhnise vawiihah hetiang a hun tha tak kan nei ho hi a lawmawm kan ti a, zalen takin i kaihraina hnuaiah thu kan sawi tlang thei hi ka lawm a ni. Ka lawm e.

SPEAKER : Awle, sawi tur dang kan awm tawh loh ka ring a, kan House Leader kan sawm tawh mai ang a. Kan Chief Minister zahawm tak Pu Lal Thanhawla sawm ila, kan sawi tawh te kha khaikawm se, chhan ngai ngai te han chhang sela, tunah ilo sawm tawh mai ang.

Pu LAL THANHAWLA, CHIEF MINISTER : Pu Speaker, an sawi loh sawi i phal tho em? An sawi chin chauh kha i ti a, an sawi loh kha sawi i phal tho em ka

ti? Tin, experience nei tha i ni a, ka zawh duh pakhat, ka sawi hma in, Obituary reference avanga question hour nek ral deuh thak hi i tawng tawh ngai em? Parliament-ah te, State Assembly-ah te tih kha ka hre duh a. He House-ah hian Pathian leh mipuite zarah term kua ka thutna a ni a, helaiah chuan kan la hrelo a, tukin ah khan khatiang kha kan tawng a, chuvangchuan khatiang kha a awm tawh ngai em le?

(SPEAKER : Pathum lai vawikhatah kan sawi bakah kan sun a te kha an pawimawh viau tihna aniang e.)

A tha e, hei vawiin a Governor address tluang taka kan sawiho thei hi a lawmawm hle a. Mi state-ah chuan tluang tak hian an sawiho hi a awm mang lo a ni tih kan hre vek ang a. Helaiah chuan opposition e, opposition lo e, kan sawi dan ki te pawh a inang deuh vek zel a. A duh thawh kawngah chuan keimahni te pawh kan in duhthawhna tam tak a awm a ni. Sum lo avanga kan tih theih loh te, Central lampang thu a nih avanga kan tih theih loh te, mahse kan tih theih chinah te hi chuan kan theihpatawp kan chhuah ve a, miten eng angin nge an ngaih chu thudang ni sela.

Tin, i vei lama mi member zahawm tak tak te Governor's address a an reaction kha ngun takin ka lo ngaithla a, a positive em em vek mai kha lawmawm ka ti a, constructive takin thu an sawi a, I dinglam ami leh veilam amite thusawi kalphung kha a inang tlangpuiin ka hria a, kha kha lawmawm ka ti a. House danga awm ve ngailo a ni a, a lawmawm ka ti takzet a ni, a lawmawm hle in ka hria a ni lo a, a lawmawm ka ti. Chutiang chu kan kalphung a ni hi thil lawmawm tak a ni.

Tin, eng eng emaw ni a induhthawhna thil te pawh kha, a pawng a puia in duh thawh taka in sawi khum emaw ni lo in thahnemngaihna vanga in duh thawhna awka te a ni zel te kha thil lawmawm tak a ni a, State dangte entawn atan pawh a tha hle in ka hria a. Tin, eptu lampang te atangin an reaction atang te leh an thusawi atang te khan a hminga sokara thu te tan pawh hian ngaihtuah zui tlak te, ngaihtuah zui tur te, "chutiang chu alo ni tak a ni maw? engtin nge kan tih ang le," tia ngaihtuah tur te tam tak a awm a, thurawn, infuihnate a ni tlangpui a, chuvangin in zavaia hnenah lawmthu sawilo thei ka ni in ka inhre lo a, a lawmawm ka ti a ni.

Tin, kha opposition group leader in a rawn sawi demonitisation chungchanga Mizoram in harsatna kan tawk ve miahlo kha ka rilrua lo awm reng a ni a, a remchan chuan ka sawi chuak ang ka tih kha minrawn fin khalh a, a lawmawm hle a ni.

India ram pumpuiaah demonetization avang khan an buai deuh vek a ni. Keini ramah kan buai ve miahlo kha thil mak tak a ni a. Ka tawng tu huat thu suh ah, anhnah zuar pawh, street hawker pawh, tute mai pawh khan a tawp thleng khan tangka hlui kha an pawm vek mai a ni.

Tin, thingtlang, zokhaw hmun kilkhawr takah te pawh an pawm vek mai a. Khata Zofate, Zoram chhunga awmte kan tanrualna kha a lawmawm ka ti a. Thahnemngai takin helaiah hian Bank hrang hranga thawk hote Reserve Bank of India-a an representative awmchhun te nen sawihona kan nei a, phai rama an buaina angte hi lo thleng ta ang sela engtin nge kan tih ang? Mizoramah chuan buaina kan neih ve loh nan, harsatna kan neih ve loh nan ti in kan sawipuaia, an ni pawhin tan an lak dan tur an sawi a. Mahse Bank lamte tih buai ngai miahloin keimahni leh keimahni ah khan kan fihlim der mai kha thil ropui tak, thil lawmawm tak a ni a, Mizo leh Christian nih chu alo la danglam hle mai a tih ngaihtuahna kha a rawn piang lo theilo a ni. Chutiang chu a ni a, thil lawmawm tak a ni.

Rahul Gandhi an min rawn phone a, “Hesitation te leh eng eng emaw in lo siam ve tur a ni a; tin, Reserve Bank of India-ah pawh protest, darshan te pawh kha in lo ti ve tur a ni,” min rawn ti a. Mahsela, ‘Kan ramah harsatna pakhat mah kan neilo a, chutiang tihna chhan tur kan nei miah lo,’ ka ti a. ‘Tu tu te emaw ka rawn tir dawn’, a ti a, rawn tir mah lan tih tur an nei chuang miah lo ang,’ ka ti a. Chutiang khawp chuan helaiah chuan harsatna kan neilo a, mi ramah chuan an harsatpui zia kan hria a. Engzatnge anmahni pawisa dah ngei ngei lakchhuah tum thi kha? Za bawr vel an niin ka ring a tun hnu ah hian.

Tin, chumai ni lo in anmahni sum neihsa, thawh chhuahsa ngei pawh kha Bank atangin la chhuak hleitheilo te leh la chhuak tur pawhin nileng deuh thaw nghah ngai a han ni te kha an phun nasa a. Keini ramah khatiang an awm ve miahlo kha, a bik takin thil zuartuten sum tih thih tawh leh tih thih mai tur an lo la pawm tlat te kha thil lawmawm tak a ni a. Khang mite hnenah khan lawmthu sawilo thei lo niin ka inhria a, chu chu Pu Speaker, kan sawi hmasa a ni.

Er.Lalrinawma, member zahawm tak in a sawi kha a lawmawm hlawm tlangpui hle a. A tlangpuiin Governor thusawi hi a tha a ni, a ti a, a lawmawm a. Tin, sawrkar hmalakna thenkhat, a bika an thlur bing ang te ah pawh khan lawmthu lampang

hlir a sawi te kha thil lawmawm tak a ni. Hei hi a hminga helaiah mipuite aiawha kan awmnaah kan ngaihtuahna a inpawh tlang a ni tih lantirtu a niin ka hria a, a lawmawm khawp mai.

Sainik School chungchangah hian Chhingchhip khaw mipuite chungah khian lawmthu hi kan sawi tawp thei lova. Chhingchhip khua, an VC te leh mipui zawng zawng hnenah hian lawmthu kan sawi a ni. Tin, tunlaia kan buaipui ber chu sorkar ang chuan kut tling lova sum lak pawisa lo, compensation claim tam lutuk hi a ni a. Hei han sawi kai lawk ilar, Japan tanpuinain JAIKA pawisa-in Aizawl khawpui atanga Tuipang thleng sawn National Highway hi four lane-a siam tur a ni. Chu chu ka rilru chhungrilah chuan Japan sorkar, duhsak taka hetiang min tanpuitute lakah hian kut tling lova sum lak duhna avangin kan intimalpho mai mai ang em aw! Chuvang chuan double lane tha deuhin siam ilar a taww zaww ang em tihte ka rilru chhungrilah ka ngaihtuah a ni. Tunah hian ka lo hriat dan chuan hemi a kal pheina tur hmun tam takah hian hetih huna compensation lakna tur in lo khaww lawk te, LSC lo nei te, khatiang kha an phe leh sup sup taww tih ka hria a.

Tin, nimin chanchinbuah khan in pangngai tak pawh ni chuang lem lo in 50000 chuang compensation lakna tur ringawt in an sa a ni tih kan hmu a. An lo sak thar leh turte nen khan eng zat nge ni ang tih hi ngaihtuah tham tak a ni a, Pu Speaker, chuvangin compensation duh avanga kut tlinglova sum lak pawh pawisak lohna avang hian Japan sorkar lakah hian kan intimalpho mai mai ang em tih hi tunlai hian ka ngaihtuah ngun nasa a ni. A chhan chu mi thahnemngaite hmalaknain University of Korocco buatsaihin Japanese tawng zirtirtute helaiah an rawn tir thin a. Kan thalaite eng emaw zatin an zir a. Working knowledge an neih hnuah khilamah an chho va, placement tha tak takte lo pein an la zir zel baww a. Chutiang chuan eng emaw zat hi thawnchhuah taww an ni a. Tin, eng eng emaw complaint a awm ang tih hlauhthawn thu ah tunah hian Japan ramah han en thlithlai mekte an awm a. Tin Japanese khawpui kan Embassy leh Consulate-ah te Zofate kan nei a, Consul General te. Chung te pawh chu a khat tawka tlawh turin kan han request a, an han tlawh a. Chutih laiah chuan helai atanga khilaila lehkha te zira hnathaww mai tur engemaw zat kan thawn theih avanga lawmthu sawi nan an khaw thenkhat Mayor te pheih chuan eng eng emaw rawn tihte pawh an duh hial ni awm takin thu kan lo hria a, kan Embassy-a kan palaite hnen atangin. Chutiang a nih lai

chuan helaiah hian kan kawng zauhna atang khan kan intimualpho mai mai ang tih hi chu hlauhawm tak a ni a, ngaihtuah tham niin ka hria a. Chu chu kan ngaihtuah zuiah ka'n sawi lawk a ni.

Tichuan, Sainik School hi kan duhna a rei tawh a. Kan hun hmasa lamah khan a hunte pawh kan lo year mark tawh a. Engemawchen a reh leh ta a. 2008-a kan lo kir veleh khan kan han ti leh vat a, vanneihthlak takin a tlang thei mai a, kan lawm hle a. A hmun tur kan lungngai hle a, a chhan chu compensation component-ah hian a hna aia tam zawk hi a kal leh mai ang tihte kan hlau a. Chutih lai chuan Chhingchhip khawtlang mipuiten an ramah engzata zau pawh ram leh hnam tan a ni tih hriain compensation pawisa pakhatmah phut lovin min han pe hi kan lawm takzet a. Tichuan khi an sa mawp mawp a, tunah chuan an peih fel tawh a, tichuan, tun academic session atang hian an tan dawn a. Zirlai engemaw zat an interview a, a duh pawh an lo tam khawp mai a, a lawmawm a. Amaherawhchu a tan tirh nan an la la tam thei vak lova, 47/50 vel emaw awrh chauh an la thei dawn ni awm tak a ni.

Tin, sipai lam mithiamte thurawnin India rama Sainik School 25 velah hian hmeichhe hostel leh hmeichhe admission la hi a la awm ve miah lova. Tunah Indian Army-ah Permanent Commission hmeichhe tan an phal tawh takah hian dil ve ula a va tha awm em, a nei hmasa ber pawh in ni maithei a,' min ti a, thurawn min pe a. Kan han bawhzui nghal a, engenge a an dawn chu kan la hre rih lova. Chutiang chuan beiseina sang tak kan nei a ni. Chu chu a hmasain kan sawi duh a. Tin, Sainik School neih hi sipaia luh nan chauh a ni lova, khua leh tui tha chher chhoh nan School tha tak a ni. Heng India rama politician lar tak tak tepawh hi, kan thenawm mai India hmarchhakah te pawh hian Sainik School chhuak hi engemaw zat an awm a ni.

Tin, a tangkai nangiing nia ka rinna chu ram buai hlim khan Meitei unaute sawn Commissioned Officer, Army-ah pathum chiah an nei a ni. An zinga pakhat chu Major Ainam Singh a ni a, Aizawlah Assam Rifle-ah a rawn awm nghe nghe a, kan inhre tha hle a. Tichuan Sainik School an nei ta a. Keini kha rambuai vangin sipai lamah kan tlem tial tial a. Tin, khatih lai khan kut zungtang pahniha chhiar sen loh Commissioned Officer kan nei ve thung a. Tichuan tunah chuan kum 20 zet hnu ah Sainik School te an han neihah chuan tunah hian Meitei unaute sawn Commissioned Officer hi sang chuang an nei a, Lieutenant General pawh an nei tawh a ni. Chutiang chu a ni a, chuvangin he

Sainik School hian chutiang zawngah chuan kan thalaite tan khawvel thar kan hotuten kan buatsaih ang an tihnaah hian nasa takin hma min sawntirtu a nih kan beisei a.

Tin, Governor address-a sipaia lut figure kha, a latest figure, nimin piah lawk ami a ni a. Tun kan hun chungah ringawt hian a sang tel hi an lut ve tawh a ni, Army leh Paramilitary Forces dang dangah hian. Tin, sipaite pawh kan duh dan te chu kan han hrilh a. Recruiting Team-te Aizawl khawpuiah chauh ni lovin District Headquarters-ah te kal turin kan ti a. Tin, Assam Rifles ho hi an fel em em a. Engemaw ti zawng zawngin khatianga sipaia inpek duhte khan training-na te an lo nei a, Serchhip-ah te, Aizawl-ah te. Chutiang chuan theihpatawpin sipaia an luh theihna turin min tanpui a ni.

Tin, tunlaiin sipai nih hi sum lam chungchangah pawh a hlawk hle a, an hlawhte a tha a. An awmna hmun apiangah engkim ei tur, uniform, insukna nen lam a free-in an dawng a. Chuvang chuan zuk leh hmuam ti lo leh ruih theih thil ti lote chuan an hlawh pumpui a sing tel hi inah an thawn thei a. Chuvangin, thalaite tana khawvel thar siamna kawngah leh mahni nun uluk zawka nunpui chhohna piah lamah inhlawhna, sum siamna tha tak a nih avangin a tam thei ang ber kan inthawn lut chho mek zel a. Tum khat phei chu 300 vel lai passing out parade Mizo 200 vel lai awmna Assam Regimental Centre-ah Chief Guest-ah minrawn sawm a, ka zuk tel nghe nghe a.

Tin, kan thalaite an titha hle a, Centre-a thil eng eng emaw discipline hrang hrangah leh kawng hrangah lawmman hmu engemaw zat an awm a ni. Chuvangin kan sorkar hotuten sipai lamah tam zawk kan kal theihna turin tunah hian hma an la a. Commissioned Officer tur atana training mekte pawh engemaw zat tunah hian an awm tawh a ni. Chutiang chuan thalaite tana khawvel thar siamna kawngah nichina member zahawm tak Pu Pianmawia'n RMSA School leh khatianga lama kan than nasatzia a sawi ang deuh khan, sipai lama lut tur pawh hi kan innawr hle a ni.

Tin, tun hnai maiah khan Chhingchhipa khawtlang hruaituten eng eng emaw hna awlai zawk, IV Grade emaw khatianga chite-ah chuan tualchung mite min duhsak se tiin rawtna anrawn siamna, thuneitute hnenah a theih ang chinah chuan chutianga chuan tualchung mi, a bik takin Chhingchhip khaw mite duhsak theih dan a awm em tia ngaihtuah tur pawhin kan lo inhriattir tawh a ni. Chutiang chuan Sainik

School chungchangah hmalakna tha tak kan neih theihna turin Chhingchhip khaw mipuiten min tuipui hi kan lawm takzet a ni.

Tin, Burma leh India inlaichinna kawngah leh a bik takin keimahni Zo hnahtlakhte inpumkhatna kawngah kan hotuten theihpatawp an chhuah a. Nikum Chapchar Kut kha min sawm angin kan han tel ve a, khaw engemawzat kan han tlawh a. Min lo sawngbawl dan tur kan hre lo lutuk a, angaihna pawh kan hre vak lo va. Chutah chuan khaw hrang hrang kan han tlawhnaah khan Zohnahtlakhte an lo phur hle a, an ti hlimawm hle a. Tin, Zohnahtlak chi hrang hrang inunau nachang hre vak lo te pawh an thanharh pah hle a ni an ti a, a lawmawm em em a ni. Tin, tawng chungchangah hian Duhlian tawng hi tunah hian vanneihthlak takin Pathian in hnam anga min tawnkhawmna tur atan a hman a ni a. Chuvangin tunah hian a thiam, hre thlawt lo an awmlo te hi thil mak tak leh danglam tak a ni. Chu chauh ni lovin tunah hi chuan khi lampang te leh khawilam ami pawh hian Duhlian tawng hi hman nasat zawk an tum emaw ni chu aw tih tur khawpin tunah hian an ngaihven hlawm a ni.

Chuvangin heng te hi Mizo tawng a ni, chutiang / khatianga ti a hauh bik tlat lo va kan zavaia min phuarkhawm theitu tur a nih chuan a hming chu engpawh ni se ti zawng khan zau taka kan ngaihtuah a tha in ka hria a. Chutianga chuan insuihkhawmna lama rilru put theihna tur atan kan tih a ngai a ni.

Tin, kan thil han hmuh thenkhatte kan lo haw veleh kan External Affairs Minister hnenah leh Prime Minister hnenah kan thlen a, thu leh hla in kan sawi nghal baw a, an ngaihven hle a. Khampat bungpui kan tlawh a, thli chhia in vawi engemawzat a nuai tawh avangin leh a sir lui kha erosion avangin a derthawng hle tawh mai a. Chung te chu khilai Consul-General kan awmchung zawng ni 3 leh zan 3 min zui tir a. Chupa min finchhuahna atang te chuan anmahni Embassy-ah te pawh kan han sawi nghal piah lamah helaiah kan sorkar-ah Delhi-ah kan thlen a. “Hei hi Mizote tan chuan thil pawimawh tak a ni a, chutianga khatianga chu a history a ni,” tiin kan hrilh a. “Chuvangin a protection hi min ngaihtuahpui ula,” kan ti a. Tichuan Burma sorkarah an han zia vat a. Burma sorkarin an va en vat a. Burma sorkar chuan thudiktakin an rawn chhang a. A bungpui tak tak kha chu a chhe tawh a, tun ami hi chu enge Mizo tawngin kan tih ka hre lo a, a zar lei atanga indo chho hi ani a. Chu chu kum 70 a upa chu a la ni tho e an ti a.

Tichuan a protection lam leh thil dang dangah khan min thawhsak an tum niin a lang a. Chutiang chuan kan sorkar pawhin ngaipawimawhin Burma sorkarah a han ziaak vat a ni.

Tin, a bulhnai ah khan Kawl Pagoda a awm ve a. Chu chu nakinah a la hnawk thei ang tih te a hlauhawm avangin khilai kan Mizo hnenah te pawh, 'in LSC chin kha humhalh tlat ula, in Burma sorkarah te leh in bialtu MP hnenah te pawh thlen ulangin, chutiang chuan tha takin tih a ngai ang,; kan ti a. Chutiang zawng chuan an kal niin ka hria a. Tin, a bul Khampat khuaah khan Khampat Bungpui Hall an lo sa mek a. Chu chu Khampat Bungpui Hall an tih kher avang khan, (Khampat Hall pawh ti mai lovin) Mizote tan a pawimawh a nih chu tiin a sak zawhna tur sorkar angin tanpuina te pawh kan pe ve a, an lawm hle a ni.

Tin, inkalpawhna kawng kha UPA sorkar lai atang pawh khan kan lo sawi tawh thin a. Anni pawh khan Zokhawthar-Tiddim, Zokhawthar-Falam an ngaipawimawh hle a. Amaherawhchu khatihlai ah khan Burma sorkar khan thawh kha an chuh a. Chu chu keinin tha kan ti si lo a, khatiang avang khan thawh lohvin rei deuh a awm chho ta a.

Tichuan tunah democracy a lo kir leh takah khian annin an thawh pawh kan remti tho a, engtinngge hma an lak dawn tih erawh chu tunhnai mai ah chuan kan hre lo va. Khami sanction kha chu a la awm reng a ni tih erawh chu kan hria a. Kan hmanhmawh hle a ni.

Tin, helai House-ah hian sawi mai ilangin, China lampang activity a nasa khawp a, sumdawanna lamah te leh kawng hrang hrangah. Chuvang chuan chu pawh chu kan sorkar laipui ah hei hi counter balance a kan tih ve loh chuan a tha lovang kan ti a. Chuvangin, khawmualah phei chuan inkalpawhna Moreh-ah leh Zokhawthar deuh chauh hi a hmunpui awmchhun a ni a. Chuvangin daily bus service ang chi te pawh ngaihtuah ni se la tih te rawtna kan siam a, an ngaihven viau a ni. Tin, kan ram bikah chuan sawtah chhim tawp thleng-a inri kan nih avangin kan theihna chin chinah chuan ramri thleng-a kan kawng sial ah hian (Burma ram chhungah pawh kan sial ve a, hmun 3 hmun 4 laiah) leilawn dawh te pawh kan mamawh dawn a, sum kan nei si lo a kan tih te pawh chu lei 4 dawh kha min rawn phal a ni, leilawn ni lovin lei 4 dawh kha min rawn remtihsak a.

Mahsela Mara rama kan unauten a pangana (5) a pawimawh ber zawk hi hmaih a ni e an ti a, chung te pawh chu kan ziaak nawn leh a ni. Chutiang chuan

inkalpawhna kawngah pawh a tam zawk kan hotuten ruahmanna an siam chu an rawn ti hlawhtling dawn niin a lang a, a lawmawm hle a.

Tin, weekly bazaar ang chi te pawh hi tichak deuh turin kan hotuten an nawr a, chutiang chuan kan tanpui a ni. Tin, Rih Dil, Mizote tan a pawimawhzia kan thlen tel a. Anni pawhin an rawn ngaipawimawh aniang hmanni lawkah khan an President te, an Tourism Minister te leh mi pawimawh tak tak chin, Chief Minister Pu Sangai Lianluai te pawhin an zuk tlawh a. Helamah kan hotupa Pu Lalrinliana Sailo Champhai awm remchanlai a ni. “Nang leh i thiante tu tu emaw nen lo han hmu ve ula, lo han titipui ula. Rih Dil Mizote tan a pawimawhzia leh, humhalh a tulzia te pawh lo han hrilh ve ulangin a tha ang e,” kan ti a, tlawmngaih chhuahin an lo han kal a. Inbiakna tha tak an han nei nghe nghe a. Chutiang chuan tourist spot ang deuh te pawhin siam an tum ni awm tak a ni.

Tin, tourism han sawi takah chuan nichinah kan hotuten an rawn sawi nual hlawm a. Tuna chhim lama kan hotuten 6-7 lai an va hawn kha hun hmasa lam atanga kal tawh chungchang kha a ni a. Tin, Tourist Lodge awm hrim hrim kha a tha kan ti a. Khawi khuaah pawh khan awm se a tha kan ti a. Amaherawhchu a operation hi chu a theih loh a ni. Sum kan nei lo va, chuvangin a operation a theihloh a, losing concern deuh vek an ni kan tourist lodge te hi. Chuvang chuan privatization kan ti a, a Minister pawhin a khaw mi te hnenah pawh, entirnan Darzokai ah te pawh kan nei a, tourist kha an thleng khat hle in a rinawm a. Chungah te pawh chuan sawrkar tan a hekna a nih lohna turin a khaw mi te pawhin an lo hman tangkai dan emaw, kawng hrang hrangin policy thar kan nei a. Privatisation-ah pawh privatise theih chin ang kha chu kan privatise chho mek zel a ni. Chutiang chuan heng te hi losing concern a nih lohna turin kan ti a ni. A lehlamah chuan sum a lo lut hrim hrim a, in kan sak hi a tha kan ti a. A hmanna tur ang zelah kan hmang theilo a nih pawhin sum a lo lut a, in an awm hrim hrim kha tha kan ti a. Chutiang chuan kan hotuten ngaihtuahna an neih kha a kal chho mai a ni. Tin, tourist attraction an tih kha ni e Tourist Lodge ringawt hi tourist attraction a ni lo a. Nichinah khan an rawn sawi chhuak a member zahawm tak ten, a lawmawm ka ti a.

Tunah hian kan tourist spot te leh engemaw attraction kan neih tur ang chi hi kan tichhe mek zel em aw tih hi ka ngaihtuah thin a. Entirnan, Thasiama se no neihna tlang chu hmana kan kal hmasak berin kan inlawnsiak a. Kei kham hlau chi leh engemaw

sang deuha luhai chi ka nih avangin a chhip ka lawn ve ngamlo a ni. Ka nupui leh kan thiante kha chu an lawn thei vek a. Ahnu ah khan kan kal lehin ‘kxawngxe inlawn siak leh ang ,’ ka ti a, kan han ding a, kawng atang khan ka han hawi thla a, ralling tha deuh deuh, step tha deuh deuh kha lo awm thluah mai a, ‘Ekhai, a tenawm em mai ka kal duh awzawng lo’ ka ti a, ding lovin kan tlansan leh ta a ni. Chuvangin kan tourist attraction te leh hetiang hi tourist lo kal te hian domestic an ni emaw, foreigner an ni emaw an rawn hmuh duh ber chu a original, a natural kha a ni. Chuvangin kan lo tihchhiat zel hi a hlauhawm a, chutiang zawng chuan kan department te a bikin Tourism Department te, LAD te leh Art & Culture te pawhin an ngaihtuahna an hman hi a tha in ka hria a, Thenzawl bial ah sawn Tuirihiau a awm a, Vantawngkhawhthla te a awm a, Tuirihiau te saw Jeep kawng siam talh tum te hi an awm thin a, ka khap tang tang a ni. Jeep kawng kha an rawn hmuh duh a ni lo, Mizo te kan kal na chin kawng angah khan original leh a natural beauty kha an rawn hmuh duh chu a ni. Tin, a hmun ah te inbualna te leh eng engemaw siam an tum a, kha lampang kha a ni lo tih hi ka tan ve dan a ni a, ka dik leh dik loh chu ka hre lova. Mi ram ah te pawh kan kal ve a Pathian leh mipui te zarah, khawi khawi emaw kan kal duh chuan ke a kal tauh tauh a ngai a ni. Hmun thenkhat te chu km 10 deuh thaw kal angai, kan hmuh duh si chuan. Chutiang khawp chuan mi ram ah chuan a natural beauty, originality kha an protect a ni. Keini’n tih chhiat zel kan tum hi thil awm lo tak a ni a, Chawngchilhi Puk an tih ah te pawh step tha deuh a awm chho a ni. Step tha te chu keini ai hian an ngah zawk a, kawng tha te chu keini aiin an ngah zawk a, chuvangin anni in an rawn hmuh duh chu original leh natural beauty kha a ni tih hi kan Department hrang hrang te hian an hriat a tha in ka hria.

Tin, model village kha kan sawi a, ka bial ah pawh Buangpui saw ka thlang ve a ni, thlan tur an tih miau avangin. Mahse, ka thlan ni khan an lawm khawp a, ran te an talh a, mahse engmah hi an nih phah dawn chuang lo. Model Village atan hian pawisa additional a awm chuang miah lo. Central sorkar atangin neih tur an rawn ti a, kan nei mai a ni. Kan fund chhung atangin kan theih ang ang chu kan pe ang che u ang a, chumi bak chu hmun dang atangin source dang a awm miah lo. “Model Village in nih avang hian eng emaw takah lo in ngai reng reng suh ang che u,” ka ti a, an lawm viau kha ka thusawi hnu kha chuan an lawm ta lo viau a ni. Tin, lawm na tur hi a awm vak lovin ka hria a, a guidelines-ah chuan engpawh a inziak ang, mahse kha’ng zawng zawng

hlawhtlinna atan khan sum kan mamawh miao a. Kan MP te pawh in Serchhip khawpui bul mai, Chhiahtlang te pawh model village-ah an thlang a, tun thlang khian a model na tehchiam vak a awm chuang lova. Chutiang deuh vek chu niin ka ring a, kan hotu ten in thlan ve pawh. Amaherawhchu, kan fund neih ang chin chin ah chuan kan duhsak theih ang ang in kan duhsak ang, chu model vVillage an ni miao a. Chuvang chuan model village kha model viau a siam kan tum a nih chuan keimahni a chhung ami tho kha a ni tih hi, ka hawn ni pawh in ka hrilh dan a ni a, chu chu sawilan a awm avang khan ka'n sawi lang lawk a nih chu.

Tin, faina thil ah hian Swach Bharat, Mizoram ah chuan Clean Aizawl in kan tan a, Clean Mizoram kan ti a, Prime Minister zahawm tak Pu Modia'n arawn ti ve hi a lawmawm khawp mai a, Swach Bharat, Clean India, 1994 ? ah chuan chutiang khatiang chu kan ni tur a ni tih a ni a. A sub-group an siam a, chumi sub-group pakhat ah chuan North East mi zawng zawng aiawh in member- ah min dah ve a, kan Chairman chu Chandra Babu Naidu a ni a, India ram Swach Bharat Prime Minister dream tihhlawhtlin hi kan tum tur a ni nachungin a huhphurawm zia ka sawi a, "Delhi khawpui ringawt pawh a tawp si a, engtingge kan tih ang? Thingtlang ah chuan, entirnan Mizoram-ah te chuan kan khawpui ber Aizawl khawpui chu India rama state capital ah chuan a fai ber pawl a nih ka ring a, tin, khawi khawi ah emaw te chuan open defecation hi a awm tawh lo a ni," ka ti a. Chumi kan sawi zel na ah chuan kan recommendation kha Prime Minister Modi khan a vai khan a pawm a, chuta pawimawh deuh pakhat hmun dangah pawh tih an lo tum ve tur chu, "Panchayat leh Village Council ang chi election reng reng ah hian candidate ni tur chuan inchungah inthiarna a nei tur a ni' tih hi a ni. "Inchungah inthiarna a nei tur a ni, inchungah chhungkaw inthiarna nei lo chu candidate an ni thei lovang," tih kha a awm a, chu chu Mizoram ah chuan an lo hre tawh a ni.

Hmanni khan Champhai-ah ODF nih lawmna an nei a, minrawn sawm ve a, ka rilru chuan kan free tak tak ang emaw tih ka ngaituah deuh a. Khilayah kan hotuten min din tir tirh chuan 78, 79 engemaw thlang khan thlenin apiang ah kawmchar ah hulhu zarah in ban tang teng tawnga beih kha a ngai thin a, a thingtlang kil khawr leh zual te khan an ti tak tak angem? Keimahni leh keimahni kan inbum angem aw tih kha ka ngaituah a. Tichuan, a lawm ni ah pawh chuan thusawitu zawng zawng khan open defecation free lam sawi zawm kha an awm ta miah lova, ka hlauhthawna kha a confirm

ang em tih kha ka ngaituah a ni. Amaherawh chu, ‘kan ni e’ an tih miao kha chuan a lawmawm a. Entirnan, OPF ah hi chuan pawna inthiarna neih kha an awih tawh lo a, mahse chuti chungin ‘ODF kan ni e’ an ti thei hi a lawmawm a, district dangte pawhin entawn se tih hi kan duh dan a ni.

Tin, Burma ram kha han sawi leh ta ila. Tunah khian Zo-hnahthlak Duhlian tawnga biak theih ang chi hi MP 25 kan awm e, an ti a, a lawmawm hle a. Chung te changchawi chuan central-ah pawh thu leh hla kan thlen a. Tin, khi lam atanga mi an rawn luh tam chuan keini thleng pawh hian a thalo thei a, chuvangin kan inlaichinna hi tih that a tul a, chungte avang chuan kan inkalpawhna mai piah lamah social leh cultural ang pawhin ngaih pawimawh ni se kan ti a. Tichuan, Kala University kan tlawh a, chutah chuan an Vice Chancellor hi anni chuan Director an ti a, “Student 5000 vel kan nei a, chung chu a tlangpui in nangmahni Zohnahthlak vek in ni e min ti a, India mi te pawh zirtirtu/Professor an lo awm ve a. Tin an Director chu Kawl mi a ni a, chu chuan cultural exchange te leh University of Minnesota te nen MoU an sign a, sap ramah te an in exchange thin a, chungte chu kan neih ve theihna tur chungchang te an sawi a, anni pawh an phur hle a, chutiang chuan University lamah pawh insuihkhawmna lam hawi in tan lak a ni a.

Tin, sorkar leh private Hospital an nei a, a tha khawp mai a, an Doctor te an fak em em vek a, anmahni nupui fanau aiin damlo te an ngaihtuah zawk a ni tih te thlengin min hrilh a. Tin, oxygen-ah an in todelh a, a duh te hnenah an pe chhuak thei a, tui ah an in todelh a, hralh tur an nei thei a, chutiang chuan private Hospital in neih theih si chuan engatinge keini ramah hian kan neih theih loh ang tih te min ngaihtuah tir a. Tin, Doctor Exchange kha an lo rawt a, chungte pawh chu helai ah kan hotute nen kan sawi tawh a, zin te pawh an tum ve in ka hria a. Chutiang chuan kawng hrang hrangin kan bond of decent, chhul khat kual kan nih na angin kan hotuten hma an la a ni.

Tin, nikum lam khan Manipur-ah sawn central sorkarin helaia kan rama border fencing rawt tawh ang khan fencing neih an tum a, mahse lang in sawng Mawre te leh a chhim lam zawng zawng saw keimahni hnahthlak Kuki unaute majority deuh vek a ni a. Mawre khawpui thleng sawn Kuki khawpui a ni a. Chuvangchuan, Kuki inpui hotute lo kalin, ‘theih tawpin hma min lak pui teh min ti a. Kei teh lul hian Prime Minister hnenah ka ziak a, Home Minister ka hrilh

bawk a, tunah saw chuan ramri hung lamah kha chuan hma an la ta lo niawm takin ka hria a, engmah an rawn sawi tak loh avangin. Chuvangchuan, helaiah member zahawm tak ten in hre vek a khilam chungchangah chuan chu chu ka sawi theih ni sela.

Tin, Doctor Beichhua'n Saiha-ah mi thi mai tur a chhanchhuak kha ka lo hmu a, TV-ah te ka lo en a tha ka tiin ropui ka ti khawp mai a. Tute emaw chuan anmahni professional ethics te an ti a, chutiang lam ngaihtuah a ngai lo, mi thi mai thei damlo chhanchhuah kha a pawimawh ka ti zawk kei ka ngaihdanah chuan. Khatiang kha a lawmawm ka ti a. Member zahawm tak Pu T.T. Zothansanga'n Champhaia awm atana an duh viau pawh kha ka support khawp mai.

Tin, NLUP kan tih hi a hlawkte chuan an hlawkpui a ni. Helaiah House-ah chhawr ve kan awmlo a nih pawhin a chhawr hi an tam khawp mai. Tin, an tam nia ka rinna chu a figure atang hian a hriat theih a. NLUP hi kum 2000-2011 khan Mizoramah chuan per capita income `50,956 a ni. Kum nga vel a vei hnu kum 2014/15 NLUP kan han operate hnu ah chuan per capita income hi `90,015 a ni. Hei hi kan Economic & Statistics leh Planning Department te tang hova an figure a ni. Hetiang hi a ni a. Tin, kum 2010-1-ah Mizoram GSDP za zelah cheng nuai 6,38,788 a nih laiin 2015-16-ah chuan Mizoram GSDP chu `1,249,869 a ni a, a punna hi a sang viau a ni, 8.46% lai a ni. Hetianga growth rate sang hi a vang viau a ni. Chuvangin, NLUP hi a tha viau a niang tih hi a rin theih a.

Tin, lawmte lawmpui thiam hi a tha a, an dawn avanga lawm hi tam tak an awm a. Tin, an hlawhtlin leh leh hlawhtlin loh hi chu mihringte an inang lova, chungte avang chuan tunah pawh hian NEDP in kan hotuten NLUP i chhonzawm ang an ti a ni. Tang si, ke la phet deuhte an awm a. Tin, tang hlawhtling an hlawhtlinna kha senghawipui la ngai, a market te la ngaihtuahpui ngai engemaw zat an la awm bawk a. Chutiang a nih avangin tangte tanpui pahin a hlawhtlingte hlawhtlin zelna turin hma lakna tur atan a tawi zawngin NLUP changtlung zawka chhonzawm theihna a ni an ti a.

Tin, kan Planning Minister-in a sawi danah pheih chuan vawinahn hian ei tawk tawk economy, subsistence economy ah ding a, hemi hi kan han tipuitling chho ang a, tichuan market oriented economy-ah hlangkai teh ang tih hi kan hotute ngaihtuahna a ni a. Chuvangin, NLUP term hi lo zo tawh mah se a la mamawhte hnenah chuan kan chhonzawm ang a. Tin, a hlawhtling tawh te leh tang te tanpui ngai an awm chuan chungte chu kan tanpui dawn a ni.

Tin, NLUP trade awm tamna ber chu Agriculture leh Allied sector a ni a, 2014-15-ah chuan 7.21% in a thang a. Tin, Forestry Sector bikah 2014-15 ah 0.10% in a thang a. Fishery sector bikah hian 5.83% in a thang a. Tin, manufacturing industry bikah hian 11.82% in a thang a ni. Hetiang anih avang hian NLUP operate tute chauh hi an hlawhtling lova, sorkar leh party chauh hi an hlawhtling lova, a dawngtute pawh hi an hlawhtling viau a ni tih helai figure atang hian a lang thei a. Tin, a bikin Petty Trade kan tiha mite hi an hlawhtlinna percentage hi a tha tlangpui viau a ni. Chutiang chuan kan NLUP chu a chhawrtu chuan an chhawr a.

Hei Siaha District lamah pawh Strawberry atanga sum la lut teuh teuh te pawh an awm a, a nuai tel lalut te pawh an awm a, a lawmawm a. Mahselangin, Member zahawm tak Pu Beichhua-in a RKVY sawlamah sawn a beidawnthlak a ni a tihte kha a beidawnthlakna hi hria ila chuan a siamthat dan leh a kawngte pawh kan hre theiin ka ring a. RKVY hi kan thatpui viau a ni. Tin, RKVY te leh thil dang dangah sum kan neih pun hluai theihna chhante hi NLUP sum atang hian state matching share kha kan dah a, kha khan a crore tam tak a rawn hnuk lut thin a. Chutiang chu sorkarin NLUP a hman tangkai dan a ni a, chutianga a hman tangkai chu mipui teah a luangchhuak a, chutiang chu kan awm dan chu a ni.

Tin, power chungchang hi han sawi leh ila. Power hi a pawimawh a, tun lai khawvel ah than dawn chuan a pawimawh a. Chu chu kan hotuten an hria a. Tun hma atang tawh khan tuna JAIKA an tih hi tun hma chuan Overseas Development Fund of Japan a ni a. Chumite tanpui nain Tuirial leh Tuivai hi khatih laia Power Minister Pu C.L.Ruala hovin nasa takin kan buaipui a. Tuirial khu a te zawk a, a hmasa zawk a, lung te kan phum a 1998 inthlan hma khan mahse kan

awm ta lova, chhonzawm a ni ta lova. Kan lo kir veleh kan han chhonzawm leh vat a, tunah khuan harsatna tam tak quarry chungchangahte, kawng chungchangah te kan tawk chungin tunah khuan an peih tep tawh a. Mahse vanduaithlak takin hmanni lawka thli leh ruah, rial lo thlengah khan a Dam pakhat a chim leh tlat mai a. Chumi han siam leh chhung October thla chhung hian mega watt 30 zawk hi kan hawng thei ang em aw an ti a, a hnu thla hnih/khatah 30MW, tichuan 60MW a lo ni dawn a ni. Chu chu tunah Tuirial kan dinhmun a ni a. MW210 pechhuak thei tur Tuivai hi a thawktu atan NEPCO bawk kan inbia a, an remti a, tan an tum a. Helai Aizawlah pawh office te an rawn inhawng tawh a, chutiang chuan hma an la a ni. Amaherawhchu, thil hlauhawm tak chu kut tlinglova sum lak tum te an rawn in hmur leh tuam tuam chuan kha khan a tikhawtlai leh dawn a, a pawh hle a.

Tin, Tuirini hi 42MW pechhuak thei tur atana ruahman a ni a. Mahse, State thuneihna chin chu 25Mw a ni. Tun hma kan hun hmasa lampang zawng zawngah khan 5MW hi state thuneihna chin hnuai a ni a. Chuvangchuan, a te chi hlir khan a kal loh theih loh va. Tin, a lian khuah dawn chuan khawi lama tangin nge sum lo kal ang tih kha ngaihtuah a ngai a. Hei hi mithiam tak takte pawhin chanchinbuah an ziak thin a, Zoram mipui hian hria se ka duh chu 5MW chunglam pang a nih kha chuan Central-ah clearance tam tak sut tlang a ngai a, kha kha kum 5/10 chu a ral thuai a ni. Deva Gauda a rawn sorkar khan Chief Minister conference a koh hmasak berah khan hei hi sawichhuah a ni a. Chutah chuan 25MW chin hi state sorkar thuneihna ni rawh se tih kha a puang a, kan lawm tlang hle ani, party party sawi lovin. Chumi atang chuan 25MW a lo ni ta a. Chuvangin Turini pawh hi mega watt 42 tur kha kan thuneihna chinah Clearance zawng zawng kan tih theihna chinah mega watt 25 ah ti thla ila kan ti a, a khuahna tur atan hian sum puk kan dil mek a India sorkar Finance Ministry leh Economic Affairs Department pawhin min recommend a, hmuh thuai kan beisei a ni. Chutiang chuan a dang dang pawh hi company dang dang kan bia a, mahse a khuahna tur tih theih hun hi chu a sawi theih hrih lo a ni. Tin, a zawng zawng hi kan khuah hi a tha ber ang em? environment leh thil dang dang ah te tih chu mithiam te la ngaihtuah a ngai ang a.

Tunah hian intodelh hi chu kan hnaih viau tawh a ni. Tuirial pawh hi tihchingpen nilose chuanin Tuirial pawh hi mega watt 60 kha a vai khan kan ta tur a ni dawn a, mahse tunah chuan MIFCO ten anmahni sumin an khuah anih avangin kan chanvo tur hi mega watt 12 chauh a ni dawn a ni. Chutiang zelin Tuivai mega watt 210 pawh ani dawn a ni. Chu chu power lama kan dinhmun a ni a, a te nau ho chu kan hria a, a kal chho mek zel a ni.

Pu Speaker khang ho a tlangpui kan hotuten an rawn sawichhuah an rawn mamawh tlangpuite a ni. Tin, Kristian state kan nih avang hian ngaihtuah tur tam tak a awm a, chung zinga pawimawh deuh chu, Cancer ngah ber hnam nih ringawt mai hi zah na chang hriat a, a chhan leh vang te hi sim a tih loh a tha in ka hria a. Mithiam ten an sawi tam ber chu Vaihlo zuk leh hmuam vang a ni an ti a. Tin, khawvel in a hriat loh tuibur kan la nei leh nghal a, tuibur hian nasa takin mit a ti chhe thei a India doctor thenkhat Kolkata ah te, Guwahati ah pawh an fin phah ve tawh a ni. Mit lam tha lo an kal chuan tuibur i hmuam em tihna chang te pawh an lo hre ve tawh a ni.

Tin, ei leh in fimkhur a ngai bawk a, heng hi Kristian kan nihna zawnah pawh hian chik taka kan ngaihtuah a pawimawh in ka hria. Tin, HIV (Aids) positive tamna ber state pathum zinga pakhat kan ni ve mai pawh hi ngaihtuah tham a ni in ka hria, drugs ti chi ten hriau an hman tawm atang te leh mithiamten hmeichhiat mipat hman diklo atangin heng hi kai theih ani an ti a, chutiang anih chuan ringtu kan nihna zawn ah pawh thil zahthlak a ni thei ang em tih chu House a mi pawimawh hmaah ka sawi duh a.

Tin, kum tlinglo tihchingpen ah tunah hian kan sang leh ber tawh a ni, heng zawng zawng hi ringtu kan nihna zawn atangin ngaihtuah ta ila engtinng kan tih ang? engtinng tan kan lak ang tih te kan ngaihtuah nasat a ngai a ni.

Tunah hian Vairengte Jungle Welfare Training School khu kan chan tep a, a chhan chu zauh an duh a, an dawl tawh lova, khawvel ram hrang hrang atangin an rawn trained a. Hmanni khan an General mangang a lo chhova, an sawi a mahse vanneihthlak takin an duhna ram an lak ho zawng zawng a kha kuttling lova sum lak tum vek compensation claim duh vek an ni a, a genuine chu tlem te chauh an ni. Tichuan Court ah an kal a, mahse court ah kan chak ta

hlauhva, harsatna kan tawh lai kha chuan kan thenawm state zawng zawng hian, 'kan state ah lokal rawh u in duh zat zat ram kan lo pe ang che u,' tiin an rawn sawm sup sup a. Chan kan hlau hle a, mahselangin kar hnih thum kal ta khan Court ah khan kan chak ta hlauhva, min ti buaitu tur an awm tawh lo turah kan ngai a ni. An General pawhin lawmthu a rawn sawi a hmalak dan tur te kan sawi hova chutiang chuan kan retained thei hram hram dawn ni awm tak a ni.

Tin, Health Care ah hian chak zawka kan kal a ngai a, thawmhnaw te kan nei tha lo hle mai a, chuvangin district hospital tinah hianin MRI awm se City scan awm bawk se kan ti a, Dr.Beichhua MLA zahawm takin a rawn sawi ang khan khalai hmunah khan Dialysis han tih mai theihna awm ta sela chuan nunna hlu tak kha kan chan lo mai thei a ni. Chutiang zawngah chuan chak takin hmalak zel tur a ni kan ti a chutiang chuan health care chungchang pawh tan kan la a ni.

Tin, cancer nei hnam kan ni tih hria hian an rawn kal deuh laih laih reng a ni. Thawhpui tha tak sum leh pai thawhpui tur hi kan la nei mai in kan ring a, chutiang chuan kan hotuten hma an la a ni.

Tichuan, Pathian malsawmna dawng chho zel turah kan in ngai a ni, Assam in khawvela a lar chhoh pui kha Mizoramah a rawn in sawn chhoh te hi maximum advantage la in a tha thei ang bera lo capitalize kan tum tur a ni kan ti a, kan mithiamte pawh an phur hle a, hemi a kan hlawhtlinna tur atana pawimawh chu keimahni mipuite hi kan ni leh dawn a ni tih kan hriat a tha a.

Tin, Institute of Hotel Management kha MNF sorkar atang tawh khan an lo tan a ni a, insak te pawh peih a ni. Amaherawhchu, kan run theih lohna chhan hi Pu Speaker a sum sen tur hi neih ngaihna a la awm rih lo a ni tunah chuan. Student chuti zat lo nei ta sela ti a han chhut chhoh pawhin a intum thei dawn lo a ni.

Heng medical fellowship hi kan duh a amaherawhchu health care lamah hian sum kan seng tam a, state pawnsah refer case avangin sum leh pai kan pe chhuak tam a, chuvangin, kan state chhungah hian tha tawh tak kan neihve a ngai a kan damdawi in zawng zawng hi thawmthat a tul ani tih kan hotuten an hria a chutiang zawng chuan kan hotuten hma an la a ni tih hi kan member

zahawm tak te kan hriattir duh a ni. Tin, a thawktute pawh hi an phur ve a mithiam ten keini aia an thiamna heti lama an hman tangkai hi a pawimawh a, chutiang tur zawng pawh chuan member te hma min lakpui a tulin ka hria. Kan zavai ta tih hriat a kan thawh tlan pawh a pawimawh khawp mai.

Tin, Bangladesh nen insum dawn tawna neih tha kan ti a, kan sawi fo angin chanchintha hril tura koh hnam kan ni a, chutiang atan chuan Pathianin kan hnaah min pe nghal a ni. Chhak lamah Buddish thlang lamah Mosolman hmar lamah Hindu heng te hi kan hna turte an ni a. Chhak lamah chuan in kal pawhna kan nei tha tawh a. Bangladesh nen hma kan lo lak tawhna hi ngaih theih in a awm a, an Prime Minister pawh vawihnih ka hmu tawh a, an phur hle a. tunah hian nasa takin hmalak chhoh mek a ni a. India sorkar pawhin min phurpui a, Bangladesh Minister pawh a hmun ah vawi tam tak an lokal tawh a ni. Tichuan he Rel kawng kan lak tur hi, rel kawng te hi member ten an hriat atan an rawn tan chhoh tirh kha chuan 2017 min tiama an han thawk tan a, mahse ram palaileng emaw kan tih kha mi ram hlir alo ni a, khami buaipui chhung ringawt pawh khan kum a lokal leh a, 2019 hi min tiam tha ngam chiah lo a ni. A chhan chu compensation min pek loh chuan ti a pal lo pin khum mai mai te hi an la awm zeuh zeuh reng a chutiang chu kan ni a. Chuvangin heng harsatna te pawh hi kan hriat tlan a tha in ka hria a. Kohhran Inkhawmah te, zing inkhawmah te ram hruaitute tan kan tawngtai thin a, thahnemngai takin, a lawmawm em em a, tam tak chuan chhawr pawh kan chhawr in ka hria a. Chumi rual chuan Zoram mipuite tan hian kan tawngtai hi a ngai em aw tih te kei teh lul hian ka ngaihtuah a ni.

Sorkar hmalakna project lian zawng zawngah hian kan harsatna ber chu kut tlinglo a sum lak pawisak lohna a ni. ‘Sum ngainat hi soal tinreng bul a ni,’ tih a ni a. Vawiinah hian chu soal tinreng chuan min rawn luh chilh ta emaw ni chu aw, duham na soal nen lam. Aizawl te hi kan va chep em, kan kawngte hi mi hill town kawng aiin a te bik pawh a ni si lo va, kan van chep em. Ringtu, rawngbawltu vantlang tana hnawksak nih pawisa miah lo. Dan bawhchhia a kawng nek rana In sa, malsawmna kan dawn zawng zawng motor leh JCB nen lam vantlang kawngah ngat dah ngam, motor chutiang chu kan ni tlang ta emaw chu aw tih hi in en a tul a. ‘Duhamna hi soal tinreng bul a ni, duhamna hi milem biakna a ni,’ tih Bible in a sawi leh nghal a. Chuvangin heng ang

kawng zawng zawngah hian kan in en a tul a. Chuvangin ram hruaitute, kan kohran hruaituten thahnem ngai taka an tawngtai rual hian mipui te hi dikna, rinawmna, takna ngaina tura kan in tawngtai sak hi a pawimawh em em tih te heng avang hian ka ngaihtuah a ni.

Pu Speaker, vawiinah helaiah Governor Address tha taka kan han sawiho thei hi a lawmawm a. Heng hmalakna tam ber hi chu Centrally Sponsored Schemes vek a ni tih chu a dik ang chu. Keini ang thawhchhuah nei lo, buh ah pawh in chawm thei lo, vai buh ring kan ni a. Tute nge kan zuk nghenchhan a hi vai ho, milem be ho kan tih te kha anni a. Tunah hian ei leh bar sum leh paiah intodelh turin programme hrang hrang NLUP, NEDP leh thildang dang kan hotuten an rawn duangchhuak chho a ni. Vawiina kan awmdanah chuan min ko tu, khawvel zawng zawng a kal a, thilsiam zawng zawng hnena chanchin tha hril tura min ko tu hi kan ti zahawm lo a ni. Milem be ho, sum leh pai, buh leh bal ring lo thei lo a han awm te hi buh leh balah chuan kan intodelh ve thei a ni. Vui hmui pu in Pathian in ram kil khawr berah, tlangram chhengchhe takah min dah a kan ti thin a. Mahselangin vawiinah hian he tlangram chhengchhe tak Pathianin ram kil khawr a min dahna hi khawvel a boruak tha ber, leilung tha ber, thlai leh thei chi tinreng that theihna ram a ni. Chung ang zawng zawngah chuan hma la in vawiinah hian Pathian ropui nan, Pathian hi kan lo tih zahawm nan, ringlo mite tan pawh a Pathian hi kan tih itawmna tur atan vawiina sorkar hian he ram hi khawvel hriatah pho chhuah kan tum a ni.

Kolodyne Multi Modal Project hi vawiinah hian keini aiin India sorkar te, Bangladesh sorkar te, Nepal te, Bhutan te, anmahni Myanmar ngei pawh in an nghakhlel a ni. A chhan chu chhuahkaah an rawn hmang vek dawn. Chungte avang chuan Mizoram University-ah hian tum 2 Chamber of Commerce te, mi thahnemngai ten seminar an rawn ruahman tawh a ni. Chuta a thupui chu 'Mizoram, Gateway for Trade & Commerce with South East Asian Countries, what needs to be done' tih a ni. Chutiang khawp chuan tunah hian ngaihtuah a ni a. Bangladesh atang khuan an nghakhlel ve hle a ni ang Minister in Delegation hi an rawn hruai ziah a ni. Nichinah member zahawm tak, opposition group leader in a sawi tawh ang khan Burma ram chhungah kawng sialna tur atan hian Prime Minister in cheng vaibelchhe sang tel a sanction tawh a. A thu hnuhnung ber ka hriatah chuan Burma in thawh an tum avangin tender pawh an float mek an ti a, ka

confirm lova, ka lo confirm ang a. Chutiang chuan, Central sorkar, UPA anni emaw NDA anni emaw min tuipei em em te hi a lawmawm kan ti a Pathian malsawmna kan dawn na tur hnar anih kan ring a. Kan han in sumdawn tawn ang a, chumi rual chuan Chanchin Tha hrilna kawngka tha tak a rawn in hawng dawn a ni. Cambodia an tih te, Laos, Vietnam, khing zawng zawng khi kan ruangam, kan hmel ang pu, ringlo mi vek an ni. Chungah chuan Chanchin Tha hrilhna tur atan hian kan hotute thinlungah hian tunhma kum 10/15/20 kal taah khan he kawngte pawh hi a lo tuh tawh a ni tih hi ka pawm dan a ni a. Chutiang chuan vawiinah hian he ram, ram kil khawr, tlangram chhengchhia, mahse boruak tha ber, sik leh sa tha ber, ram leilung tha ber, engkim that duhna ram hi khawvel hriatah kan phochhuak ang a. Pathian nung min ko tu hi ringlo mite pawh in an rawn it a, an rawn beisei ve a, an rawn chak ve khawp in kan siam dawn a ni. Chumi atan chuan vawiinah hian Pu Speaker, Governor Speech atang ringawt pawh khan kan duh khawp awm lo mahse, kan theih chin a la ni rih a. Kan theih chin bak thei tur hian he ram hi kan sawngbawl chho mek a ni. Chumi atan chuan vawiin a sorkara awm te chauh hi kan pawimawh lo va, ram leilung fa zawng zawng hi neitu kan ni a, a mawhphurtute kan ni a. Chuvangin kan mawhphurhna hi a in chen vek a ni tih hi kan hriat a, neitu rilru pu a kan thawh chhoh hi a pawimawh tak zet a.

Tin, Zo hnahtlak insuihkawm chungchangah pawh hian vawiinah hian a darh zau tawh hle a ni. Zo hnahtlak zing a rawn tel chak hi an tam hle tawh a ni. Hmanni lawkah “Chavang Kut” Kuki unau ten min rawn sawm a Churachanpur ah ropui deuhin kan va hmang a, mi nuai chuang an kalkhawm a ni. Burma ram atang te, Arunachal atang te leh hmun hrang hrang atangin Mizo hnahtlak nih an duh ang tih kan hriat ngai loh te pawh kha an rawn tel teuh a. Arunachal a mite phe chu a phur phurah an tang a. Keini chu Manasea thlah te kan ni tih te kha an chhuan a ni. Chutiang zel chuan vawiinah hian he hnam hi hnam ropui tak ni tura buatsaih kan nih hi hria in, a ti ropui tu zing a hmanraw tha ber nih kan tum tlan hi a pawimawh hle a ni.

A tawp atan chuan he Mizoram kan tih bik a hi Zoram pawn a Zo hnahtlak zawng zawng hian an Jerusalemah an pawm a, an Jerusalemah an ngai a, an ngai em em hlawm a ni. Chuvangin keini a chhung a awm te hi nu leh pa nih kan tlinglo anih pawh in, nu leh pa tling nih kan tum hram hram a, a huikhawmtu kan nih hi min beisei dan pawh niin ka hria. Chuvangin, chumi hriatna nung nen chuan kan kal a, keini

hi a huikhawmtu kan nih a pawimawh in ka hria a Tin, Pathian thu thu a ni kan future chu engkim tithei a ni Ama kutah kan inngah phawt chuan tun aia ropui zawkin min siam thei a ni tih hria in, chumi beiseina nung nen chuan kan hotute hian min kaihruai a ni.

Pu Speaker, vawiinah helaiah Governor speech sawina hun tha tak kan nei a, a bik takin eptu lam atanga rawn ding zawng zawngte puitling taka, constructive taka min sawi sak thei hi kan lawm a, hei hi min tiphurtu a ni a. Kan sorkar vek a ni a, chuvangin a neitu rilru pu a kan tlin loh na in phawrh a, engemaw in sawi mawi loh tumna lampang ni lova neitu rilru tak pu a duhthawhna ang te zalen tak leh tlang taka in hrilh tawna kan tih tur in kawhhmuh a, kan in siamthatna tur in kawhhmuh a sawihona kan nei hi a lawmawm ka ti takzet a. Pu Speaker, nangmah leh member zawng zawng, a bikin eptu lam te hnenah lawmthu ka sawi a ni. Ka lawm e.

SPEAKER : Awle, Motion neitu Pu Lalrobiaka sawm ila, ani hian khaikhawm se, pawmpui turin House rawn dil nghal tawh mai se a tha a, tunah i lo sawm ang.

Pu LALROBIKA : Pu Speaker, kan rilru a positive hle a, opposition pawh awm lo ang tlukin kan duhna te leh kan hmathlir te a inang a. Chuvang chuan keiin thu tam tak sawi ngai pawhin ka hre lova. Chumi bakah chuan kan House Leader zahawm tak khan hemi atanga thil awm thei te leh vision thui tak te a rawn sawi tawh a, a bengvar thlakin kan ram tan pawh thil ropui tak thleng thei leh thleng tur la awm te a nih avangin a lawmawm ka ti a. Chuvang chuan member engemaw zatin ka Motion hi kan sawi a, chutih rual chuan opposition member atang te in kan ngaithla bawka, rilru inthural takin duh inang, Mizo te hi Pathian in min siam dan ang takin ropui takin par chhuak ila tih duhna nei chungin kan han sawiho a, a lawmawm ka ti a. A bik takin opposition te chungah pawh lawmthu ka'n sawi a ni.

Tichuan, he Motion of Thanks, Governor speech hi i phalna leh House phalna in min pass pui ngei turin ka ngen e.

SPEAKER : Awle, Motion chu saptawngin hei hi a ni 'The members of the Mizoram Legislative Assembly assembled in this Session I deeply grateful to the

Governor for the Address which he has been pleased to deliver to the Assembly on the 14th March, 2017' tih hi a ni a. Hei hi pawmpui a pass remti ti zawng in 'Remti' ti rawh ule. (Member : Remti) Remti lo kan awm em? Awm lo.

A lawmawm khawp mai, he Motion hi lungrual taka pawm a ni e tih ka puang e.

Pu LALROBIAKA : Pu Speaker, i chungah leh House chungah lawmthu ka sawi e.

SPEAKER : Pathian hi hmu thei lo mah ila, khawih thei lo mah ila he House chhungah, kan zingah a awm a ni tih hi a chiang hle a. Vawiin a kan tih tur chu tluang takin kan zo leh thei ta a, a lawmawm hle a ni. Kan hawng rih ang a, naktuk zing dar 10:30 ah kan kal khawm leh dawn a nia.

Sitting adjourned at 3:50PM